


CIKONDO CYÀ ÈKÈLEEZIYÀ

WA LAÒDÌKIYÀ

 Mpindyewu, kàvwa mujikije aci to. Mème kwamba ne: “Mvwa mufike pashiishe bwà dibàkà dyànyì... Ngààkalediibwa pashiishe ndambù, mufike pashiishe ndambù bwà dibàkà dyànyì, bu mèmè mwà kufikaku ànu pashiishe bwà lufù lwànyì’s!” Ki dibà dimwèpelè dīndi njinga bulelèlè kufika pashiishe, pashiishe menemene.

² To, bìvwa mmabiikila à ku nshinga kwànyì kumbèlu, ncìvwa ne mùshindù wà kuumuka to, bìvwa bikolè. Nènku dibà adi paanyimà pàà mukàjàànyì ne bwònsò bamanè kuumuka kumpàla kwà dibà, mvwa ne bintu byàbùngì byà dyenza. Nènku pashiishe bantu bàà mu myaba mishìilèshìilàngàne, bàà kusambidila, ne ndi mfùma ku dibwela ànu mpindyewu; ne dibuulula dyà kùdi Mukalenge kulwa bwà mwanèètù wa balùme kampànda; kùdi mwanèètù wa bakàjì mwimane lwà paanyimà pààpa, ùsaama; nudi bamanyè cīndi nswa kwamba aci, ndi ànu ntwà eku, ntwà kwàka, ntwà eku, ntwà kwàka. Ne ncyènà nànsha mupete mpùngà wa kulabulangana ku cyanza ne bàmwè bàà ku balunda bàànyì bàà ku Georgie bàdi mwab’ewu to ne bàà mu myaba mishìilàngàne ku nseke yònsò, ne bàà ku Canada kwaka. Ndi ànu mudyumvwe bibì bitàmbe bwà mùndi ncìyi mupete mwà kunùlabula ku byanza.

³ Nènku, nànsha nànkù, Fred ùdi penyì dilòòlò edi, Fred Sothmann? Fred, udi muvùlùke cikondo ciwàkambiikidila ku Canada aci, uvwa ukeba kupweka kuneeku, ki mèmè kukwambila ne kulù dyà mashinyi to anyi? Wèwè kulwa, ànu’s; kupetakanaye ne njiwu, mwamba . . . kusùnsula kashinyi kèndè, kwambabi kushipeesha mukàjèndè, ne dīkù dyèndè, kutapikaye dyulu dyèndè, ne kushàalabo bwònsò mu lùpitaadi.

⁴ Mu katanci emu pàmvwà nguumuka, ànu mu nkànkala emu, Mwanèètù Ben ewu ùvwa mwimàne pambèlù pààpa, kulwayè mutàngile kùndi. Ki Rosella kulwayè mwaba awu, kwambayè ne: “Nkàadi nya kumbèlu.”

Mèmè kwamba ne: “Rosella!”

Yèyè kwamba ne: “Kùdi bwalu anyì, Mwanèètù Branham?”

Mèmè ne: “Ncyènà mudyumvwe ànu bìmpè bwà diya dyèbè adi.” Nwamònu anyi?

Yèyè kwamba ne: “Kùdi bwalu bwàngenzekelà anyi?”

Mèmè kwamba ne: “Ncyèna mumanye to. Bìdi bimwèka bu ne, Cintu kampànda ncindimwije.”

⁵ Mmumbiikile kwenji tusunsa tukesè, ne mmupetakane ne njiwu. Nàнку awu, muntu nànsa umwe kí mmujúke to, kàdi cìvwà ncyanza cyà Mukalenge. Nènku mmufinùnùke (Njila yònsò ùdi ne mabwe à nêjè mu Nord mwàmwa.) nènku mmufinùnùkile lwà mu Indianapolis, kàdi kutwadija kufinunuka wàtwa eku ne eku kwà njila mu lubilu lwà njààjàmà mùshindù ewu. Ki kwelayè lubilà lukolè ne: “Éyi Mukalenge, nkwàcishèku!” Kàshinyi kutwà ncintà kusenunuka mùshindù ewu cyàkàbìdì, kwalukila ne kuyaku ku dyàbalume, ne kutwadija kuya ànu bîmpè. Kubàndàye ne njila awu, kwambayè ne: “Ekèlekèle, ekèlekèle, mùshindù mwinè wùndi ne kusàkidila bwà mùndi mupàndùke ku cyòci aci, bwalu màshinyi makwàbò àvwa alwila ànu luseke lùmwèlùmwè alu, munzùlùle mbilu yà dikèma.” Ki kusambukaye njila, ne pashìishe kwimanayè kuntwaku. . . Ngèèla meeji, cintu kampànda, kwimanayè bwà kunwàku dikopo dyèndè dyà káfè anyi cintu kampànda. Kàdi ànu kàyi mwanji kupatuka mu kàshinyi amu, kakwàbò kàshinyi kudibyanukulaku ànu lwà paanyimà pèndè apu, kakwàbò kàshinyi paanyimà pèndè apu, kakwàbò kàbìdì ànu paanyimà apu, nènku kudikùngwijatu twònsò mwaba awu. Kàdi kwambayè ne ùvwa munyùkùshìibwe ndambù, kàdi kí mbyà bibi to, kàdi ùvwa muswè kusàkidila Mukalenge, ne kubìikila bwà kwambila èkèleeziyà bwà kusàkidila Mukalenge bwà mùvwàye kàyi mujiwuke anyi ní ncinyi ní ncinyi, ne ùlomba èkèleeziyà bwà kutùngunuka ne kumusambidila bwà wàmòna mwà kufika kumbèlu. Nwamònu’s, ùcidi mwendeshi mupyamùpyà, ngùcìpetelaku mukàndà wèndè wà bwendeshi. Pa nàнку, ndi ne kusàkidila kuvulè be.

⁶ Kàdi bitu misangu yònsò ànu ne dikwàcisha bwà kwangata didìmwija dyà Mukalenge adi ne mushinga. Yèyè ne: “Èè,” yèyè ne, “S’ndi mufwànyine kupangila ditùkù dyà mudimu.” Ditùkù dyà mudimu ki cinyi’s? Bìdì bimutùùdisha mfranga mipite bwà kulongolweshwa paanyimà pàà kàshinyi apu, nwamònu’s. Nàнку mbitàmbe bwîmpè bwà—bwà kukuwjija. . . kushààla ne Mukalenge. Kí mmwòmò anyi? Yèyè mutwambile ní ncinyi ní ncinyi cyònsò, mbîmpè twètù kushààla naaCì. Bwalu Yèyè ùtu misangu yònsò ànu mubinge. Kí mmwòmò anyi? Misangu yònsò!

⁷ Mpindyewu, kaa, eci ncyenze ànu bu. . . cìvwà lumingu lulenga lwà dikèma. Ncyèna ànu mumanyè mùshindù wà kwambila Nzambi ne kunwàmbila bwà lumingu lulenga lwà dikèma elu to. Aa àvwa àmwè à ku matùkù mwandamukùlù à disànkà ditàmbe ànkaadiku muyiishe kacya bandela. Mbulelèlè. Ndi—ndi muyiile bikolè be kùdi Mukalenge ne luse Lwèndè lujaalàme, ne byònsò bìdiYe mutwènzèle abi, bwà kumòna Nyumà Wèndè ùkwàtulula mudimu mu èkèleeziyà. Nènku ndi ne disànkà dyàbùngì dyà kumòna mapà àbanga kukwàta mudimu mu èkèleeziyà. Nwamònu anyi?

⁸ Mpindyewu, pàdiwumù apu, pàndi nciiyipù, mbyenze ànu bu

ne muntu kampànda neálwe kubwelamù, wíkale ànu—ànu mwà kuànyangakaja, nudi bamanyè's, mbafwànyine kubanga kwenza ní ncinyi ní ncinyi. Kàdi nwènù bafwìshe mapà awu bundù, Nzambì neànùfwìshe bundù. Nwamònu anyi? Ncyà bushùwà. Bikèngela nùkwatè naawù mudimu mu mùshindù mujaalàme. Nènku, mùshindù utùdi baàswè mpàdìwù ànu àkwàta mudimu mu bulongame, mùshindù udibò bààkula mu myakulu. Kí ng' ànu kwambulula Mufundu to, kàdi nkwamba bwalu kampànda bùdi bwamba kwenzeka. Nènku nwènù mwà kutùngunuka ne kwikala ne kaneemu kàà menemene naawù, neàtwàdije... Muntu yèyè mupàtùke mu bulongame mu èkèleeziyà, Nyumà Mwímpè neàcyèle patòòke kubàmbila ne n'nganyi awu. Nènku dìbà adi, neà—neàdymvwe munyookiibwe ne kuyaye ku cyoshelu. Ki mudimu wà mapà ngwòwò awu.

⁹ Nènku pa kumòna mpaasàtà wetù ewu, Mwanèètù Neville, ùvwa nsongààlùme wa bundù, uvwa kàyì muswè kuumvwika to. Kàdi ndi nwambila, yèyè ùvwa . . . ùvwa ùmweka bu ne kàvwakù mwà kukwata ku byà Mpenta to. Kàdi pa kumòna ujuuka ne wandamuna myakulu ne wamba cipròfètà, ndi nnwàmbila ne, yèyè mmwèle cidya cile citàmbe. Cyà bushùwà. Tùsambidilàayi mpaasàtà wetù.

¹⁰ Nènku, nwamònu's, mapà mmabangè kubwela mu èkèleeziyà. Ne mukwàbò mwanèètù mukesè, mupwekele mwab'ewu, ùdi kaaba aka, ùdi . . . ùdi ne cyà kwikala kaaba aka mwaba kampànda. Ngèèla meeji ne ùdipù, ùtupu ànu misangu yònsò. Mmwabilaayi mukesè mupwekele wa dikèma, ùvwa umwe wa ku balubuludi kaaba aka mu èkèleeziyà emu, Mwanèètù Higginbotham, muntu wa mushinga mukolè, wa difwànà dyà Nzambì. Ne pa kumòna ne mmupete dipà dyà dyakula dyà mu myakulu, nganyi uvwakù mufwànyine kwela meeji ne Mwanèètù Higginbotham mmufwànyine kwenza nànkù? Muntu mukesè mwena bundù, wa mùshindù wà kàyì muswè kudileeja to, kàvwa muswè nànsha bàmmumanye, mu mwaba nànsha ùmwe to, usòmbela ànu paanyimà pààpa. Kàdi, nwamònu's, Nzambì ùdi mwà kwangata muntu wa mùshindù awu ne kukwàta nendè mudimu, nwamònu's, bwalu yèyè kèna muswè kucyènza to, dyàmbedi. Yèyè muswè kucyènza, mmufwànyine kushààla mwena madìleeji. Kàdi pàdiye mu mwaba wà kàyì muswè kucyènza to, pàmwàpa Nzambì ùdi mwà kukwàta nendè mudimu mùshindù awu.

¹¹ Junie ùdi kaaba aka, ùdi . . . kaa, ùdi paanyimà pàà dikunji didi dìnjike edi.

¹² Ndi ngàmba nùnkù, nkààdikù mumvùmvwe bantu bààbùngì bààkula mu myakulu. Ne ndi ngèèla meeji ne byònsò mbifùmìne kùdi Nzambì, bwalu kwena mwà kwenza cyònà cidi kaciyi cyumvwija cintu kampànda bwà muntu kampànda, mu mwaba kampànda nànsha. Nudi bamanyè's, Bible ùdi wamba ne: "Kakwèna cyònà cidi kaciyi ne dyumvwija to," mbwena kwamba

ne kakwèna cyônà cidi kaciyi cyumvwijaku cintu kampànda to. Kwèna mwà kupàtula mwàkù ní ngwà mùshindù kaayi ùdi kawùyi umvwija cintu kampànda nànsha. Mvwa misangu yònsò ndikonka mùvwabi bifwànyine kwikala too ne pangààkaya mu Àfrikè ne kuumvwa mitooyi yònsò ayi, ki mèmè kujandula dîbà adi ne civwa ndíyì dyà muntu kampànda. Misangu mikwàbò ndíyì dyà mwanjèlò, ne bikwàbò.

¹³ Kàdi Junie Jackson, muyiishi wa ku musòkò wa kàyì muswè kudìleeja, ùdìciina, wa lumùmàmùmà ndambù mupàtùkile mu èkèleezià wa ba-Méthodiste, lwà kwinsì—kwinsì eku mu matongu à mu Elizabeth, mu Indiana, lwà paanyimà mu meetu amu. Mupùwe, kàyì mufwànyine kwambaku cintu to, mwenze bu udi udìciina, ùmwèka bu udi . . . mvwa mwà kumòna misangu mikwàbò, bu ne ndi muswe kumwangata, kumunyùkulaku, kwamba ne: “Aakulaku’s, Junie, nwamònu’s, lekèla kwikala ànu kacya washàala musòmbe mwaba awu mumbàngàmèene.”

¹⁴ Tuvwa mwà kusòmba pa cikuuku mu meetu amu, ne yèyè ùvwa mwà kusòmba mwaba awu kwamba ne: “Èè, . . . ngèela meeji ne . . . bidi ànu bimpè’s.”

¹⁵ Mvwa mwà kwamba ne: “Kaa, Junie, ndi—ndi nguumvwa bu ne ‘undekèlè nkwambidile bwalu ebu,’ nudi numòna’s. Bwànyì mèmè udi—udi ne lujòoko be, wamònu’s.” Kàdi Nzambi mmumupèeshe di—di—dipà dyà kwakula kwà mu myakulu; kacya ncitukù mwanji kumvwa ngààkwilù kampànda mutàmbe kutòoka tòò kacya bandela to. Nwamònu anyi?

¹⁶ Mutàngilaayi mu èkèleeziyà. Nwamònu mukàjì mukesè awu uvwa wakula mu dindà emu kàyì mumanyè mukàjì mukwàbò awu anyi? Wa bwalu ewu kàyì mumanyè mukwàbò awu to, ne ewu ewu, cyônà cyà díyì civwaye wàkwilamu aci; kàdi pààkandamunyiibwaci, mu cyônà cimwècimwè aci, maleetà majìkùke, bimanyinu byà mu difùndà; ànu bìmwèbìmwè, byàlukila. Ne mukenji wùvwa mupwàngàne, kùdì èkèleeziyà. Nwamònu mùdì aci anyi? Mpindyewu, tudi beena dibànzà dyà kusàkidila Nzambi. Mpindyewu, kwikadi wàlwà kuditàmbisha to. Wèwè mwenze nàнку, neùdyele cibùlà, ne dyabùlù neàkutwè byanza. Ikàlà ànu mudipwekeshe; wamba ne: “Èyì Mukalenge, nsokokèku, kundekèdì njuuka kumpàla kwà dîbà nànsha.”

¹⁷ Kàadyàkukulekelaku ùpàtuka mu mulongo nànsha. Wèwè mupàtùkemù, misangu mikwàbò, aci kacya—aci kacya kwenza bwalu to. Wèwè mwenze nàнку, mòna’s, mpaasàtà ewu neà—neàkwambile. Nwamònu’s, ma—mapà kaèna ne cyà kukwàta mudimu paùdì . . . patùdì munkaci mwà kuyiisha to. Pa ciibidilu, mapà ówò mafikè ku dikwàta mudimu bimpè mu èkèleeziyà, nebikèngele bwà nudisangishe ntàntà mule kumpàla kwà disangisha dikwàbò; Mukalenge àkwate neenù mudimu kuntwaku, nudi numòna’s, bwalu dîbà adi mu eci citùpà kabyàkucìpangisha to nànsha kakesè. Mpindyewu, patùcidi mu

disangisha apa, míngà misangu bikèngela nùshaale bapùwe bwà katançi kakesè. Kàdi piikalàbi ne Nzambì ùdi ne mukenji, mwaba kampànda anyì kasanga Yèyè neàwùtwalè, nwamònu's, Mulekèlaayi nkàâyendè, kàdi nucyenzè bilondèshile dilongesha dyà Bible. Nènku Mwanèètù Neville pàmwàpa neikale mwà kulongesha bintu ebi, bwà twàmòna mwà kubyènza. Nenteetè bwà kumwambulwisha ne mwànyì pàànyì mwònsò, twètù bwònsò pàmwè, bwà kubítwala ne kunùleeja mùshindù wà kukwàta naabi mudimu.

¹⁸ Udi udyumvwa bìmpè anyì, wèwè mwanèètù wa cyena Pologne? Mbìmpè. Kaa, mùshindù mwine ùvwà Mukalenge mumubènèshe's wè! Kukaadi bidimu mwandamukùlù, mwva mumwambile ne cintu kampànda civwa mwà kwenzeka. Ùvwà mupete cibwejàkàji, mwena dilongesha dyà búsàtù wa kàyì tuseku. Ki Mukalenge kwamba, ditùkù adi ne: “Nekùlwe muntu mulùme kampànda, ùdi ne nsukì mifiike ne mèsù makùnzùbile, munène wa katankù. Kumwipàci to, Mèmè ngudi umutùma kùdi aku.” Mèmè kubàkula Mufùndu ànu mwaba ùvwaye upetela cibwejàkàji awu, mèmè kuwùfùnda pa cipese cyà dibèji ne kuwùtèeka mwaba awu. Paanyimà pàà katançi ki yèyè ewu pwàa.

Mukàjàànyì kwambayè ne: “Kùdi muntu pambèlù ùkèba kukumòna.”

Mèmè ne: “Nyèyè, mubweje munu.”

¹⁹ Nènku yèyè—yèyè kungambila civwàbo bamwambile mu...mu busonsodi bwà Nyumà Mwìmpè. Mùshindù ùvwaye wítabuujà misangu yònsò ne mwele nzadi ku Mukenji, ne bikwàbò, munkaci mwà cisambà cyèndè; nànsha mwàkadyùdiibwaye, yèyè wàkashàala ànu naaWù. Kwambaye ne, kukaadi cikondo kampànda, mu masangisha, ngaakaakulangana nendè ne kumutèela mu dìnà. Ne mùshindù mene ungàakamba dìnà adi, ncyèna mumanye to. Kwambaye ne byàkakèngela bwà—bwà mèmè kuditèela dileeta ku dileeta, anyì cintu kampànda, mu disangisha amu. Yèyè ne ùvwà mwambule mwànà wa mu dibòko mu mabòkò èndè uvwa ne bijùjì kwìsù, ne kwambayè ne mwànà mukesè wa mu dibòko ewu wàkakezudiibwa yèyè yònsò, ànu mu kaabujimà. Ne mùvwà Mukalenge...

²⁰ Ki mèmè ne: “Èè, cintu cyùdi naaci dijinga mpindyewu ncyà kupweka ku èkèleeziyà kwaka bwà kubàtijiibwa mu Dìnà dyà Yesù Kilistò.”

²¹ Mwva mutuutàkèene nendè kwènji katançi ku lusongo lwà mukùnà kwaka, bwalu wàkapweka, wàkabàtijiibwa mu Dìnà dyà Yesù Kilistò. Mpindyewu mmusànkishiibwe mu byònsò, udyumvwa bìmpè, munkaci mwà kwalukila kumbèlu. Ndi ntèkemena ne neànkudimunku mu Pologne mwàmwa dimwè

dyà ku matùkù aa, ne mu Allemagne, ne mu, mwàmwa mu myaba ayi amu. Mukalenge àkubènèshè, mwanèètù wanyi.

²² Bintu binène bibanjike búngì cyanààna byenzenzà Mukalenge wetù's wè! Ànu bwà kumòna luse Lwèndè—Lwèndè, mùshindù wùdi kuumukila ku esètè, ku wesètè, ku nord, ne ku sud, mùdiYe ùlombola bânà Bèndè bananga; badìkwingija, bènda bàpàtuka, badìnyukusha. Byàbúngì be byà kwamba's!

²³ Mpindyewu, kanùpu mwoyi to, mu dyàlumingu dilwalwà dilòòlò, bu Mukalenge wetù mwà kwanyisha, dilòòlò dyà dyàlumingu dilwalwà edi, netwikale ne...mu dyàlumingu dilwalwà edi mu dindà, èyowà's wè, disangisha dyà dyondopa. Cìndi ngambila cyòci aci, pàmwàpa dībà adi kwòkò kwikàle bààbúngì batàmbidile mu dindà dyà dyàlumingu amu nengàangate dyàlumingu dilòòlò bwà kujikija, nudi numòna's. Kàdi mèmè mwà kubangata bwònsò mu dyàlumingu mu dindà, èè, mbìmpè.

²⁴ Mu diisàtù dilòòlò kùdi masangisha à milòmbò à munkaci mwà lumingu. Mpindyewu, bwènù nwènù bàdi pabwìpi pabwìpi aba, disangishaayi mwab'ewu, ne enzàayi masangisha à milòmbò. Kanùàpùmbishikù to, shààlaayi ànu naawù, nwamònu's. Nènku nusambile, nukebe mwà kutàmba kuseemene pabwìpi ne Nzambì. Kanwitabiku bwà dikolesha dyà maalu kubweladi munkaci mwènù nànsha. Lamàayi... Kùdi bishùwashùwàlà byàbúngì be mu mùshindù wà katùyi ne cyà kwitaba cyà mashimi to, nwamònu's, kanù—kanùyiku ku luseke lubi to. Shààlaayi mu bulelèlà.

²⁵ Ngùmùvù "Amen" dībà adi ùntù mumùmùvwe pa ciibidilu kukaadi bidimu, wa Mwanèètù Russell Creech. Mbangambile ne Patty ke uvwa wakula mu myakulu lwà paanyimà pàpa dilòòlò adi. Patty, udi kwepi? Udi kaaba aka anyi, munanga wanyi? Èyo, ekèlekèle, ncyèna mufwànyine nànsha kumumanya to bu mèmè mumumòne's. Kàdi ngèèla meeji ne ngàakambula mwànà awu mu mabòkò àànyì emu ne kumulàmbula kùdi Mukalenge, mwab'ewu mene. "Kàdi's ukaadi mushikankùnde," Meda mmwame ne: "nsongààkàjì wa citende, mulenga kumòna, citendetende cyà cisàkuka," mwikàle ne bukòlè bwà Nyumà Mwìmpè pambidi pèndè, wàkula mu...Russell, wèwè's udi muntu mubanji. Èyowà's, ke cyùdi's.

²⁶ Mwanèètù wa bakàjì Creech ùdi kwepi? Ncyèna mumumòne to. Ùdi kaaba aka anyi? Lwà paanyimà. Kaa, Mwanèètù wa bakàjì Creech, mùshindù mwine ùndì ne disakidila bwà mùdi Nzambì mukupèeshe mwànà bu awu, mòna's, kwena mumanyè mùndì—mùndì ne kusàkidila to. Mu cikondo cidì nsongààkàjì yà bitende munkaci mwà kukenyangana ku mènù ne kuseka ne kwenza maalu à lukutukutu, nudi bamanyè's, ne musùmbà wa lukutukutu kùdi balùmyànà aba, bàdi ne nsukì mikosa bu milùndù yà mpaatu ne bikwàbò byònsò aba, mùshindù awu; kàdi

mwânà mukesè ewu ne bukolè bwà Nyumà Mwímpè, wàkula mu myakulu mwab'ewu. Kaa, ekèlekèle!

27 Hmm! Mbantu búngì kaayi dilòlò edi, bayiishi bàà beena Mpenta, bàdi bafwànyine kufila mwoyi wàbò mujimà bu bwòbò mwà kumòna wabo nsongàakàji wa citende, udi muye ku maja à bidundadùndà awu, wenza nànkù.

28 Mwanèètù, anji—nji citwekù mushinga. Ndi mumanyè cyùtù wenza kwàka ku Cibeeba aku, ntu mwenze cintu cimwècimwè aci, mukwàte mudimu bu wakufwilakù, kàdi, mwanèètù...bwà kukolesha bânà abo. Kàdi wàvùluka ne, Nzambì ngwa lulamatu, Ùdi ùfuta. Èyowà's, mmwòmò! "Nèmfutulè."

29 Nzambì àkubènèshè, Patty. Munanga wanyì, ncìvwa—ncìvwa mufwànyine kukumanya to bu mèmè mukumòne, ngèèla meeji, kàdi kùdìdingi walekela njila mululàme awu to, munanga wanyì. Kudìdingi kulekela dyabùlù utèeka ní ncinyi—ní ncinyi cyònsò munda mwèbè to, cifwànàngàne ne pomme mulenga wa ùbàlakana to, bwalu neciikale didimà dyà mpùsù, wamònu's. Imànshà cilumyànà aci ne cilekèle ànu nànkù. Lamà mèsù èbè ànu pa Kilistò, ànu pa Nkùrusè. Kàdi ùtùngunuke ne kuya kumpàla, bwalu dībà dikàadi pabwīpī. Nwamònu anyì?

30 Kùdi bintu búngì cyanàànà byà dikànkamika bìndì ànu mwà kwamba, bwa mabènesha à Nzambì. Ncìvwa mukùmbàne mwà kukùmbula bààbúngì, nènku lumingu lujimà elu ncyèna musambidile bantu bapite pa makumi àtaanu to, ngèèla meeji, ne dipàtuka dibwela, ne maalu à makolè à lukasa ne bilwalwà ebi, ne bikwàbò, kàdi mwà mutàmbe kufila dībà ku dilonga. Kàdi mpindyewu, mu dyàlumingu dilwalwà edi, netwikalè mwà kusambidila bantu, ne kulòmba Mukalenge bwà kutùluka ne kutùpèèsha bukolè bunène abu, ne kuDìmwenesha kutùdì mu dindà dyà dyàlumingu dilwalwà edi, bu Mukalenge mwà kwanyisha.

31 Kaa, ncyèna muswè kubanga cikondo cyà èkèleeziyà eci to bwalu ndi mumanye ne ki cyà ndekeelu ku byònsò. Nènku mpindyewu, mu eci, neciikalè nde—ndekeelu wa Bikondo Mwandamutekètè byà Èkèleeziyà. Nudi basànke naaci anyì? [Disangisha dīdi dyamba ne: "Amen."—Muf.] Mpindyewu, vùlukaayi ne, ndi ngamba eci ku ndekeelu ànu mùmvwà mwambe ku cibangidilu amu, kùdi mwà kwikala bintu byàbúngì, kùdi mwà kwikala bintu byàbúngì byùdì kùyì upetangana naanyì to, kàdi kùnkwàcidi ciji to, wamònu's, nnangeku ànu, nànsha byà munyì, bwalu cyònsò cyùdì mwà kwenza anyì cyùdì mwà kwamba kacýàkushintulula bwalu to, mèmè nenkwelèle meeji ànu mùshindù ùmwèùmwè awu; kòkò cingà cintu, matàmbidile, wamònu's, kòkò cingà cintu, nenkwelèle meeji matàmbidile. Kàdi ndi munùngè, Nzambì mmumanyè nànkù, kakwènakù muntu udi mwà kutèèla Dìnà

dyà Yesù Kilistò ûndi nciyi mufwànyine kunanga to. Nwamònu anyi?

³² Nènku ncyênaku muswè bululu nànsha bùmwè anyi dibenga kucyùkangana, nànsha twètù mwà kupangilanga byà bibi. Bu ne tuvwa basòmbe ku mèèsà ne ewu ùdya dyàmpà dyà mùshindù kampànda, ne mûngà, dyà mûngà mùshindù, aci's ncifwànyine kwikala ànu cìmpè mwaba ewu mene, nwamònu's. Bwà pa bìdì bitàngila bwobùmwè bwà muntu ne mukwèndè, tudi banangàngàne. Kàdi twètù katùyi twenza nànkù to, dîbà adi bikèngela twenze nànkù. Nènku bu . . . katwàdyàkuyaku ntàntà mule ne Nzambi twètù katùyi benze nànkù mu bulelèlè to.

³³ Kanùpùku mwoyi to, kanùpù mwoyi ne dipà ditàmbe bunène dyà ku mapà wònsò n'dinanga to. “Nànsha mèmè ngàakula mu myakulu yà bantu ne banjèlò, mufile ne mubidi wànyì bwà kwoshiibwawù bu mulàmbù, ngumvwa dimanya dyònsò, ne bikwàbò, mèmè ncyèna cintu nànsha cìmwè to. Pa nànkù . . . Kàdi pàdì cìdì cipwàngàne aci, cìdì dinanga . . .” Piikala mapà wònsò à nyumà kaàyi maswikakaja pàmwè kùdì nshàmenda wa dinanga to, kaàkukwàta to. Dinà nshàmenda mukwàbò kanà yònsò ewu neàvingutukè ne: “Kàdi dinanga neditungunuke kashidi.” Nwamònu's, aci's n'Kolintò wa Kumpàla 13.

³⁴ Mpindyewu, dilòlòlò edi, munkaci mwà kubwela mu cikondo cinène cyà èkèleeziyà eci. Kaa, ekèlekèle! Mpindyewu, tudi mwà kwikala bu ne tusunsa dikùmi ne tùtaanu paanyimà pàà citèemà (dilòlòlò edi.) Nènku mpindyewu ndi bushùwà muumvwe bibi be bwà mutùdì katùyi ne mwaba mukùmbàne, kàdi . . . bwà kusòmbesha bantu bwònsò, kushikamija bantu bwònsò, èyowà's, kàdi katwèna ànu naawu to, nènku pàmwápa dîngà ditùkù netùpete.

³⁵ Kàdi mpindyewu ndi muswè kunùlòmbe bwà nungenzèlèku dyèsè kampànda. Nudi bamòne ngiimànyinu wanyì ne nudi bamanyè cyànkèngelaci dîngà ditùkù, nudi numòna's, ne dîbà dikaadi pabwípì mene. Nwamònu anyi? Mpindyewu, ndi muswè bwà nwènzè eci, nùnsambidilèku misangu yònsò. Nènku vùlukààyi ne, ndi ne meeji matòòke ànu mùndì mumanyè mwà kwikala ne meeji matòòke amu, nwamònu's. Nènku ndi mumanyè ncicyèna kàbìdì mwànà mukesè to, ndi ne bidimu makumi àtaanu ne cìmwè. Nènku ndi—ndi pàdì wanyì . . . ncyèna mwà kuya pàdì Nzambi kàyì mumbiikile to. Nènku nényè mùshindù ùdìYe muswè bwà mèmè kuya, nènku neciikale nànkù. Nwamònu anyi? Kàdi ndi ne cyà kwikala ne meeji matòòke ne kwamba Bulelèlè, nànsha byà munyi. Pa nànkù ndi mumanyè ne misangu mikwàbò ndwendu lwà kalumankààya, kàdi bu mùdìYe neebè, nebishintulule cinyi? Nwamònu anyi?

³⁶ Mpindyewu, kumpàla kwà twètù kubwela mu cikondo cinène cyà èkèleeziyà eci, ndi ndikonka ní tudikù mwà kwimana kuulu mpindyewu bwà disambila, bwà katanci kakesè cyanàana

kàbìdì. Bìdì byenzaku ne nudyolòleku ne nudyûmweweku bîmpè. Mu disangisha dyà dijikija naadi edi, kùdiku...Mbanganyi mwab'ewu bàdì baswe bwà kubàvùluka kumpàla kwà Nzambì? Elàayi ànu byanza muulu kùdì Nzambì ne: "Wamvùlukakù, Éyì Mukalenge, ku ndekeelu kwà cikondo. Pààjika mwoyi wónsò, wàmvùlukakù."

³⁷ Taatù wetù wa mu Dyulu, katwèna ne myakulu mikùmbàne to bwà kukuleeja patòòke disàkidila dyètù bwà Bwikadi bwà Nzambì udi ne mwoyi uvwa munkaci mwètù lumingu lushààle elu, bwà bintu bitùdì bûmwè Kùdì, mùshindù Ùdì muDìbuulile kutùdì munda mwà bikondo, ne mùshindù Ùdì mutùtòokeshile Dìyì Dyèbè. Mùshindù mene utùdì baKweyèmène, ne mùshindù utùdì—utùdì batèète kuleeja patòòke dinanga dyètù, kàdì kupangila bwà kucyènza, Mukalenge, bwalu myakulu yà cifwàkà kayivwa mwà kwenza nàнку to. Bwà kus-...bwà kutùsùngila mene, ne Wèwè...bwà kutùpèèsha mene nzala Bwèbè. Bwalu mbafùnde mu Dìyì ne: "Bàà disànka ng'aba bàdì ne nzala," (ànu bwà kwikala ne nzala, ndibènesha) "nzala ne nyòòtà yà bwakàne." Pashiishe Wèwè wákamba cikùmà cinène cyà dìyì adi ne: "Bwalu nebùkucishiibwè!" Mpindyewu, tudi twitabuuja nàнку, Mukalenge. Tufwileku luse ku mapanga ètù.

³⁸ Nènku patùdì tubwela mu dilòlò edi apa ku...ku cikondo cyà ndekeelu cyà èkèleeziyà eci apa, cìdì ciikale Laòdìkiyà, paanyimà pàà twètù bamòne Mifùndu ne maalu-malonda bituutakeena dìbà dyònsò ànu mu byòbì menemene. Pa nàнку, Taatù, tudi bamanyè dìyì dyamba dyà ku cipròfètà Cyèbè cinène eci mwaba ewu, cyà cikondo cyà ndekeelu eci, neciikale ànu bu mùvwà bikondo bikwàbò bisambòmbò abi. Taatù, ndi ndòmba bwà Wèwè kulekela Nyumà Mwímpè alwe kutùdì dilòlò edi, mpindyewu, nènku túbènèshèku patùdì tutùngunuka ne kuKwindila apa. Mu Dìnà dyà Yesù. Amen. Sòmbaayi.

³⁹ Bu Mukalenge mwà kuswa, mukàndà newikale... dyàkàmwè patùdì ànu tupeta mùshindù. Mwanèètù Leo ùdì munkaci mwà kubyàngacila pa mukàbà wà mèyì, bwà kutùngunuka too ne ku...kutùngunuka ne kudibifùnda ku byanza, kuumukila aku kubìtuuta ku màshinyì, pashiishe kubyènza mukàndà.

⁴⁰ Nènku twakula bwà mikàndà, Rosella neàpatulè mukàndà wèndè dyàkàmwè wa ne: *Kanwàyì Musungidùbwe*. Nwènù bònsò nudi bavùlùke bwalu bulonda bwèndè abu, mwàkamubiikilà Nyumà Mwímpè mu disangisha amu. Nènku yèyè ùvwa...ukaavwa mulekelela kùdì nzùbu yà byondopelu yinaayi minènanènààle yidì yitangila tunwàyì, ne mwipata mu mpitaadi yivwà yisanganyiibwa mu Chicago ayi. Kàdì Mukalenge Yesù, mu katùpà kakesè kàà dìbà, kubipàtula byònsò mu yèyè. Yèyè ùyaaya kuumukila ku buloko ne ku myaba mikwàbò, wènda ùlondela bantu mùdì Nzambì mukùmbàne mwà kupikula, uyiikilangana ne tunwàyì ne

bakwàbò. Ùkaadi...ku bujaadiki bwèndè, mupetèle Kilistò bantu bààbùngì.

⁴¹ Mpindyewu, cikondo cyà kumpàla cyà èkèleeziyà, nudiku mwà kungambila ne civwa ncinyi anyi? Efèsò. Ciibìdì? Seemùnà. Ciisâtù? Pègàmò. Ciinâyì? Twatilà. Ciiitànù? Sàadi. Ciisambòmbò? Filàdèlàfiyà. Cyà mwandamutekète? Laòdikiyà.

⁴² Cyà kumpàla civwa mpankaci pàà cidimu cyà 55 ne 170 cyà cikondo cyètù eci, Efèsò. Seemùnà, 170 too ne ku 312. Pègàmò, 312 too ne ku 606. Twatilà, 606 too ne 1520. Sàadi, 1520 too ne ku 1750. Filàdèlàfiyà, 1750 too ne ku isambòmbò...1906; mpindyewu, kubangaci cikondo cyà Laòdikiyà, kutentamanganaci, nènku dilòòlò dishàale tuvwa babwele mu ditentamangana dikesè adi. Mpindyewu, tudi dilòòlò edi, twangata ndekeelu wa Laòdikiyà.

⁴³ Tudi twitabuuja ne èkèleeziyà wa Laòdikiyà wàkabanga mu cidimu cyà 1906 Paanyimà pà Lufu mu cikondo cyètù eci. Ndi ndyanjila kwamba...Mpindyewu, nwàvùlukaayi ne: “kudyànjila kwamba,” nangananga nwènù bàdì batèeleja mukàbà wà mèyi. Ncyèna ngàmba ne nebùikale nàнку to, kàdì ndi ndyanjila kwamba ne neciikale ne cyà kushùikidila lwà mu cidimu cyà 1977, ne èkèleeziyà neikale mudibwinke yèye yònsò nkòong mu dipambuka ne neikale mulùka mukana mwà Nzambi. Ne Dilwa Diibìdì, anyi Dyambwibwa dyà Kilistò, ndifwànyine kulwa díbà kanà dyònsò. Mpindyewu, ndi mwà kutùpakana ku aci mu cidimu cimwè, ndi mwà kutùpakanakù mu bidimu makumi àbìdì, ndi mwà kutùpakanaku mu bidimu lukàmà. Ncyèna mumanye kùdici...Kàdì ndi ànu ndyanjila kwamba ne bilondèshile cìkèènà-kumòna cyàkandeejàYe, ne mu ditàngila dyà cikondo, mùshindù ùdìbi byenda biya, ndi ngàmba ne nebyenzeke misangu mikwàbò pankaci pàà cidimu cyà 1933 ne 1977. Kàdì—kàdì nànsna nàнку, ditunga dinène edi nedìditwè mu mvità yìkalà mwà kudisùnsulula mu tupesetupese, nwamònu’s. Mpindyewu aci’s cidi papwipi menemene, cidi pabwipi pàà dikèma. Kàdì ndi mwà kutùpakana, ndi munkaci mwà didyanjila kwamba. Bantu bwònsò mbumvwa anyi? Ambàayi ne: “Amen,” panwìkalà bumvwa. [Disangisha dìdì dyàmba ne: “Amen.”—Muf.] Nwamònu anyi?

⁴⁴ Kàdì Mukalenge wàkandeeja cìkèènà-kumòna cyà mukàjì munèna wa bukolè, mu cidimu cyà 33, 1933, cidi pa dibèji. Cyà mùshindù ùwà “Roosevelt mufwànyine kwenzeja... wàkafikisha buloba bwà kuyabù mu mvità.” Mùshindù ùwà “Mussolini mufwànyine kwenza dibùcikila dyèndè dyà kumpàla mu Ethiopie ne mùvwàye mwà kumwangata, kàdì ùwà mwà kufika ku ndekeelu wa bundù.” Ne mùshindù ùwà “Dìbà adi tusùmbù túsàtù: Nazisme, Fascisme, ne Communisme, mùvwabi byònsò mwà kulwa kutùkina mu Communisme.” Nènku mbanganyi mwaba ewu bàdì bavùluke mùmvwà ànu mutungùnuke, mushàale munwimanyike kuulu, ne ncyàmbulula

ànu kucyàmbulula, mvwa nwàmabila ne: “Tàngilàayi Russie! Tàngilàayi Russie, mfùmù wa Ku Nord! Tàngilàayi Russie, mfùmù wa Ku Nord!”? Mbanganyi bàkaadiku bangumvwè ànu ncyàmba, ncyàmbulula, kàbìdì? Beena kale, nudi numòna’s, mu cikondo cyà ntwàdijilu cyà èkèleeziyà ewu. Mwimane ànu mwaba awu ngenda ncyàmba ncyàmbulula ne: “Tàngilàayi Russie, mfùmù wa ku Nord! Nwamònu’s, cìikalaye mwà kwenza, bwalu tusùmbù twònsò atu netùkungwile mushiki mu Russie.”

⁴⁵ Pashiishe mèmè kwamba ne: “Ditùngà edi ndekeelu wa byònsò nedibwele mu mvità ne Allemagne. Ne Allemagne neikale mwibàkiibwe mu lumbu lwà nshàmenda.” Nènku aci’s cìvwa Cimanu cyà Maginot, bidimu dikumi ne cìmwè kumpàla kwà cyòcì kubanga kwibakiibwa, bidimu dikumi ne cìmwè kumpàla. Ki mèmè kwamba ne: “Beena Àmèrikè nebàtucike bibi byà menemene ku cimanu aci.” Bàmwè bàà ku bàna bèètù kaaba aka bàvwa basanganyibwa ku cimanu aci, Mwanèètù Roy Roberson ne bakwàbò; bakonkaayi cyàkenzeka. Bààkatuucika bushùwà. Eyo. “Kàdi ndekeelu wa byònsò,” mungàakambà, “netùcimune ne netwikalè bàmwè bàà ku bacìmunyi mu mvità yìkala pankaci pèètù ne Allemagne.”

⁴⁶ Mpindyewu, mèmè kwamba ne: “Pashiishe paanyimà pàà cikondo aci, maalu à mamanya awu neikale mwà kutanta menemene.” Àkatanta, s’mbenze bòmbè bwà mushindà ne bikwàbò byònsò. Mèmè kwamba ne: “Mu ditanta dyàbò adi, nebìikale mwà kwenza...tùshinyi netùbange misangu yònsò kwangata mbungakeenu wà diyì.” Nènku s’nudi nuvùluka cibwikidi cinène cyà kale cyà mu 1933, cyànyimà cipwekelele mùshindù ewu, ne lukata lwà dishintulula paanyimà pààkù apu anyi? Tàngilàayi numòne mùdìbi mpindyewu, nwamònu’s: kapunga be, nwamònu’s, kafwànàngàne ne diyì. Ki mèmè kwamba ne: “Ndekeelu wa byònsò nebènzè kàshinyi kùkàla kakàyi dijinga ne yèndà munda mwàkù amu nànsha. Mèmè kumòna díkù kampànda dyènda dipweka...Kucibiikila ne: ‘njila,’ mu kàshinyi kàà cibwikidiji cyà lumwènù, njila minène yà mmwèkelu mulenga kumòna ne kàshinyi kalenga. Nènku bàvwa basòmbè, batàngilàngàne muntu ne mukwèndè, ne kàshinyi munkaci mwà kudyendela nkààyaku, kènda kaya katùngùnuke mu bibèndà amu ne bikwàbò byònsò.” Kàdi’s bakaadi ne kàshinyi aku patùdì twakulangana apa, bakaadi bamanè kukènta. Bàdi ne kàshinyi. Ki mèmè kwamba dibà adi ne: “Kaa, maalu à mamanya neàtante mu ditùkù adi’s wè!”

⁴⁷ Mèmè ne: “Pashiishe mèmè kumòna...Nebàanyishile bakàji ne bàdi munkaci mwà kwanyishila bakàji bwà kwenza masungula. Ne ku disungulangana, nebàsungule muntu mubì dìmwè dyà ku matùkù aa.” S’ki cinwakenza ku masungulangana mashààle aa. Mmasungula à bakàji àkasungula Kennedy. Tudi bamanè aci, nwamònu’s, pankaci pàà màshinyi à diibila ne

bintu byà diibila, bivwa FBI mwele patòòke abi. Ne mùshindù úvwà ní nganyì ní nganyì mwà. . . Mbwà cinyi kabèèna bènza cintu kampànda bwà bwalu abu? Mbwà cinyi kakwèna ní ncinyi cyakùdiibwe? Ha! Bàdi ne bwôwà bwà ne muntu kampànda mmufwànyine kujimija mudimu wèndè. Nudi numòna's, cidi ànu musùmbà wa cidiidi cyanààna, mubole too ne penyì. Kwajiki. Cyà bushùwà!

⁴⁸ Kawèna nànsha—kakwèna nànsha. . . kakwènakù, mfwilaayiku luse. Kakwèna lupàndu mu ditùnga edi to, kakwèna lupàndu mu ditùngà nànsha dimwè to. Lupàndu lùdi mu Yesù Kilistò ne mu Yèyè nkààyèndè! Uh-huh! Ncyà bushùwà. Mpindyewu, ndi ne kusàkidila bwà Àmèrikè. Mbipiciibwe ne mèmè musòmbèle kaaba aka kutàmba mwaba kanà wònsò mukwàbò pa buloba, bwalu. . . pambèlù pàà Canada. Canada ne Ètats-Unis mmapàsa, aci kaayi tudì bamanyè, matùnga matwàngàne mutumba, mwaba mulenga wà kacya, kàdi ndi—ndi ngiitabuuja ne mbipiciibwe ne mèmè musòmbèle muneemu kutàmba ní mpenyi ní mpenyi pàndiku mumanyè, bwalu nkwètù kundela. Ndi ne disànkà dyà ne ndi mwena Àmèrikè, ne kusàkidila bwà bwalu abu. Kàdi ndi ntwàmbila, didi bushùwà dikèngela ditàbuluja dyà dikandameena, ki cidi cikèngela. Kàdi kadyàdyàkudipeta to! To, mukalenge. Kààdyàkujuukakù kàbidì to! To, mukalenge. Bwàdi mbutùukè! Nudi bavùlùke, kùkaadi bidimu bitwè ku bitaanu mu Chicago mwàmwa, aci's cidi pa mukàbà wà mèyi. S'udi naawu, Gene. Mèmè kwamba ne: "Anyi nebàCiitabe cidimu eci, peeshi nebàtungunuke ànu ne kudishinda." Kàdi's bàkaadi bacyènze, nwamònu's, ne nebàcyènzè too ne mwàfikaye ndekeelu wa byònsò ku nshìkidilu wèndè.

⁴⁹ Kàdi nekwikalè mukàji wa bukolè! Mpindyewu, nwàvùlukaayi! Eci cidi pa mukàbà wà mèyi, kàbidì. Mukàji wa bukolè, mukàji munène, yèyè neikale anyi Mfùmù wa ditùnga, anyi neciikale mukàji uleeja mpàla wa èkèleeziyà wa Kàtòlikè (ùndi ngèèla meeji ne nyèyè) neàkòòkeshe mwab'ewu dingingà ditùkù ne yèyè nealombole ditùnga edi. Ditùnga edi nditùnga dyà mukàji. Dibèndele ndyenza kùdì mukàji, n'nombà wa dikumi ne isàtù. Dyàkabanga ne, mìtootò dikumi ne yisàtù, mishoonyi dikumi ne yisàtù, matùngà makesè dikumi ne asàtù. Byònsò bidì ànu dikumi ne isàtù, dikumi ne isàtù, dikumi ne isàtù, bitùngunuke ànu nànkù. Mìtootò dikumi ne yisàtù pa ndola wèndè wa cìcyele awu mpindyewu. Byònsò bidì ànu dikumi ne isàtù. Bidì ànu nombà wa dikumi ne isàtù, nènku ùdi ùmwènekela mu nshapità wa 13 wa Bwàkabuulwibwà. Byònsò nkòong ànu dikumi ne isàtù! Byònsò bidì ànu "mukàji, mukàji, mukàji, mukàji, mukàji," ànu kacya bimònàngàne. Nènku ùkaadi mukòòkesha midimu yònsò yà biro. Yèyè's mmukòòkeshe Hollywood. Yèyè's mmukòòkeshe matùnga. Yèyè's mmukòòkeshe midimu yònsò. Yèyè's mmukòòkeshe cintu cyònsò cidiku eci;

manèème à dyàcimwè ne mulùme, wenza masungulangana pàmwè ne mulùme, ne bwakulàvi bu mulùme, ùnwa maalà bu mulùme, cintu kanà cyònsò. Nènku ànu ciishi ku ndobo bwà èkèleeziyà wa Kàtòlikè, bwà dikuukwila dyà mukàjì's! Bakaadi munkaci mwà dikuukwila mukàjì, twamb'eku twamb'eku.

⁵⁰ Yèyè's mmutàmbe . . . Mukàjì wa masandi nciishì cyà ku ndobo citàmbe bwímpè cikaadiku kacya dyabùlù mupeta. Yèyè's mmubi mutàmbe nzùbu yònsò yà binwinù byà maalà yitùku eyi. Yèyè's ùdi mwà kutùma misùukà mipite bùngì mu iferno kutàmba nzùbu yònsò yà binwinu byà maalà yidi mu ditùnga emu. Ncyà bushùwà.

⁵¹ “Mukàjì mwímpè ncilengà cyà ku cifulu cyà butùmbi cyà mulùme,” mwàkambà muntu wa lungenyi lutàmbe wa pa buloba. Bikèngela mulùme apeeshe mukàjì mwímpè bunème, nwamònu's. “Kàdi wa mubi yèyè mmâyì mu mashi à mulùme,” pèndè mashi èndè ki mwoyi wèndè. Nwènù balùme bàdi ne bakàjì bimpè, kanwèna nànsha bamanyè muvwabi bikèngela bwà nwènù kusàkidila Nzambi bwà mukàjì mwímpè to! Bwalu bu Nzambi mufwànyine kupèèsha mulùme cintu citàmbe bwímpè bu mumukwàcishi, s'Úvwa kwikala mucyenze. Kàdi mukàjì ke mukwacishi mutambe bwímpè wa mulùme udi Nzambi mufwànyine kumupèèsha. Kàdi pàdibo bàkùdimuna . . .

⁵² Mukàjì ke uvwa Sàtaanà musungùla mu budimi bwà Edènà bu cyamu cyèndè cyà mudimu. Kààkangata mulùme to, wàkangata mukàjì. Cyàkabèngelaye kuya kùdi Adàmà bwà kumupèèsha nkùkà nciyni? Wàkalwa kùdi mukàjì ne kumupèèshaye, nwamònu's, bwalu yèyè ke uwayne musungùle. Nzambi wàkangata muntu mulùme, ne Sàtaanà wàkangata muntu mukàjì.

⁵³ Nènku tàngilààyì ànu ku mbangilu too ne ku ndekeelu . . . Pààkashiibwa Baabùlòonà ku ntwadijilu, mu *Baabùlòonà Yibidi* yà Hislop, mukàjì kampànda! Pààkapwekabi too ne mu cikondo; mpindyewu cikondo cyà Bisàmbà byà bendè cidi munkaci mwà kwenda kujika. Baabùlòona wàkabanga mùshindù awu, ne ùdi ùjika ne dikuukwila dyà mukàjì (Màriyà) mu èkèleeziyà. Ditùkù kaayi ditùdi ne mwoyi edi's wè!

⁵⁴ Mpindyewu, *Laòdikiyà* awu, cikondo cyà—cyà Laòdikiyà, mwakù awu wùdi wùmvwija ne “civùmvù.” Ncyùle tètè ne mabanji, ne cyèla meeji nekacyèna dijinga ne cintu to. Kàdi Bible ùdi wàmba ne cidi “cikèngeledi, mpofò, cyena dikènga, ne butakà.” Ngiikàdilù kaayi's wè!

⁵⁵ Difutu dyà aba bàdi bàcimuna mu cikondo cyà èkèleeziyà eci, ndyà “kusòmba pa nkwasà wa butùmbi ne Mukalenge.”

⁵⁶ Mpindyewu, mùtootù awu, anyi mwanjèlò, anyi mùsànjeela wa cikondo cyà èkèleeziyà eci, kí mmumanyike to.

⁵⁷ Mpindyewu, mùsànjeela wa cikondo cyà kumpàla cyà èkèleeziyà, ùvwa nganyi? Pòlò, Efèsò. Seemùnà? Irenée.

Peegàmò? Martin Munsantu. Twatilà? Colomban. Sààdi? Luther. Filàdèlàfiyà? Wesley. Ne mu...cyà Laòdikiyà eci, katwèna banji kumanya to, ne pàmwăpa katwăkumanya to too ne pààjika byònsò.

58 Kàdi ndi muswè ànu kufila àànyi mèyi bwà cìkala mwanjèlò ewu, utùdì bîndile ewu. Mbifwànyine kwikala bîmpè anyi? [Disangisha dîdì dyàmba ne: “Amen.”—Muf.] Bu mùdibi ne tudì ne kaacikondo kakesè, ndi mufunde ànu kaadîyi kakesè mwaba ewu kàà cîndì ngèèla meeji.

59 Mwanjèlò wa èkèleeziyà wa Laòdikiyà ewu, bwà kucijikija. Mpindyewu, yèyè neikalèku ku ndekeelu wa cikondo, ànu bu bakwàbò bwònsò abu, bu mùdì Bible. Yèyè neikalèku ku ndekeelu kwà cikondo. Kî nku mbangilu kwàcì to, ku ndekeelu kwàcì, bwalu mwanjèlò ùtu misangu yònsò ùlwa bwà kutàndisha...bwòbò abu bwà cìvwabo benze. “Fùndila mwa—mwanjèlò wa èkèleeziyà wa Laòdikiyà bintu ebi.”

60 Nwamònu’s: “Fùndila mwanjèlò wa èkèleeziyà wa Seemùna bintu ebi.” Nwamònu’s, cyònsò ncyambila mwanjèlò ku ndekeelu kwà cikondo. Pòlò, ndekeelu wa cikondo. Ànu nànkù too ne kwinshì, ku ndekeelu kwà cikondo. Ditentamangana, ndekeelu wa cikondo. Ndekeelu wa cikondo, ke cìdì cìcìvwijà ditentamangana ncyòcì aci. Nwamònu’s: “Kùdì mwanjèlò,” wàkula cìvwàku. Eci ncitentàmàngàne mwab’ewu ne: “Kùdì mwanjèlò,” ku ndekeelu wa cikondo aci. Nwamònu’s, wàmbwila ànu apa, wenza ditentamangana ànu bu mutù bidyacilu byà cibàndilu bibànda amu, Bikondo Mwandamutekète Byà Èkèleeziyà.

61 Mpindyewu, mwanjèlò udi ubwela mu ditùkù edi awu, ndi muswè ku...Ndi ne cintu kàmpànda cìfùnda kaaba aka, ndi muswè ànu kucibala. Kàdi yèyè neàmanyiibwè mu citùpà cyà ndekeelu cyà cikondo. Ne bwalu tudì pabwìpì menemene ne aci—pabwìpì menemene ne cikondo cyà Bukènkè aci, pàmwăpa yèyè ùdì pa buloba patùdì twakulangana apa. Nwamònu’s, katwèna bamumanyè to. Yèyè neikale mupròfètà wa—wa bukolè wàbèngiibwa kùdì bukwa èkèleeziyà, bwalu bwòbò nebàtùngùnùke ànu mu mpèkaatù yàbò ne ndekeelu wa byònsò Nzambì neàbàtwile mukana, kubàpatula mukana mwà Bwikadì bwà Nzambi.

62 Ngèèla meeji neikale bu Eliyà. Nemfilè twànyì tubingilà. Mpindyewu, tubuululàayi ànu kaaba aka mu Mukànda wà Maalàki, bwà katancì kakesè cyanààna, nènwambile bwà cinyì ndi ngèèla meeji ne neikale muntu mulaaba kùdì Nyumà wa Eliyà. Mpindyewu, ndi muswè bwà nùvwalè kafulu kèènù—kèènù kàà ngàsà aku mpindyewu. Maalàki, nshapità mwì4. Mpindyewu, tèèlejàayi pàndì mbala apa, ne nwènù nubala mu Bible wenù amu. Mpindyewu, anjì elàayiibi meeji ne ntèmà yònsò

mpindyewu bwà tusunsa tukesè tùdi tùlondà etu, mpindyewu, kumpàla kwà twètù kubwela mu cikondo cyà èkèleeziyà.

Bwalu, mōnaayi, ditùkù dilwalwa, diikalà mwà kwosha bu cikitu cyà kapyà; ne beena dyambu bwōnsò, èyowa, . . . ne beena lwonji bwōnsò, nebùkale bu bisōnsà: ne ditùkù dilwalwà adi nedibàbùtùlè, mùdi MUKALENGE wa bilwilu wamba, ne kadyàkubàshùla ní muji ní ditàmbà.

63 CidiYe wamba ncinyi? Yèyè ùdi wàkula bwà ditùkù dilwalwà. Udikù mwà kwitaba aci anyi? Ku ditùkù dyà dilwa dyà Mukalenge.

Kadi kunùdi nwènù . . .

64 Mpindyewu tàngilàayi, mpindyewu Yèyè ùdi wàkula ne Izàlèèlà. Mpindyewu, cyàkambàYe ncinyi? “Bwalu, mōnaayi ditùkù dilwalwà (dicidi dilwa) diikalà mwà kwosha.”

Kadi bwènù nwènù bàdi bàcìina dìnà dyànyì . . . Dìbà dyà bwakàne nedìjuukè ne dyondopa mu mapwàpwà àadi; ne nwènù nenùpatuke, ne kutùpika bu twànà twà ngombe twà mu cikumbi.

Ne nwènù nenùdyatakaje beena lwonji ku makàsà; bwalu nebùkale butù mwinshi mwà bidyacilu byà makàsà ènù mu ad- . . . mu ditùkù ndingèza eci, mùdi MUKALENGE wa bilwilu wamba. (Kì . . . Ditùkù diikalàYe mwà kwosha buloba, netwèndelè pamutù pàà butù. Aci’s ki Bukalenge bwà bidimu cinunu, mu bushùwà bwà bwalu, nwamōnu’s.)

Vùlukàayi . . . mikenji yà Mòsà musadidi wanyì, ungàakatamina dìyì . . . yèyè mu Holebà bwà beena Izàlèèlà bwōnsò, ne mèyì matùma ne cilumbulwidi.

Mōnaayi, nènùtùmìnè Eliyà mupròfetà kumpàla kwà dilwa . . . ne ditùkù dinène ne didì dikwacisha bwòwà dyà MUKALENGE adi:

Ne yèyè neàkùdimunè myoyi yà baataatù bwà kuyààluja kùdi bàrà, ne myoyi yà bàrà kùdi baataatù abu, bwà ncilu kutuuta buloba ne mulawu.

Ndekeelu wa Dipungila Dikùlukulu.

65 Mpindyewu, Yesù wàkamba . . . Maatàayi 17:10, wàkula bwà cyòci eci. Beena Yudà bwōnsò mbìndile Eliyà ulwàlwa awu. Mpindyewu, tàngilàayi nùmonè cidi Yesù mwambè pa bwalu abu, Maatàayi 17:10. Netùbangilè ku mvensà wa 9, Maatàayi 17:9:

Nènku bu mùvwàbo bènda batùùluka ku mukùnà, Yesù wàkabòmekela bujitu, wamba ne: Kanwàmbidi muntu nànsha umwe . . . Kanwàmbidi muntu nànsha umwe cikeènà-kumòna to, (Nwamōnu’s: “Kanwàmbi

eci to. Nudi bacimanyè, kàdi nuci lamè bwènù nwènù nkaayenù.”)...*Kanwàmbidi* muntu nànsha umwe cikèèna-kumòna eci to, *too ne pààbùka Mwànà wa muntu... ku bafwè.* Kanùcyambi to.

Ke bayiidi bèndè kumukonkabo, bàmba ne: Kàdi mbwà cinyi bafundi bàmba ne Eliyà ùdi ne cyà kulwa dyàmbedi? Bwà cinyi bidi ne Eliyà ùdi ne cyà kulwa dyàmbedi bangabanga ne Kilistò ewu kulwayè, Dìbà dyà bwakàne adi? Mbwà cinyi mbàmbe nùnkù? Mwab'ewu, Wèwè ukàadi kaaba aka, kadi bafundi mbambè ne—ne Eliyà ùvwa mwà kulwa dyàmbedi.

Mpindyewu, tàngilàayi:

Ki Yesù kwandamuna e kubàmbila ne: Mbulelèlè ne Eliyà neàlwe, neàlwe dyàmbedi, ne kwalujulula bintu byònsò.

Kàdi ndi nkwàmabila ne: Eliyà awu ùkaadi mumanè kulwa, kàdi nwènù kanwàkamumanya to, (Nwamònu's, Yèyè kàakamba ne ùvwa nganyi to, nwamònu's.) kàdi nwàkamwenzela cyònsò cinùvwa baswè aci. Mùshindù awu ke wàkengeshiibwa Mwànà wa muntu kùdìbo.

Ke bayiidi kuumvwabò ne ùvwa ùbàmabila bwà Yone Mubàtiji. (Mpindyewu—mpindyewu, Yone Mubàtiji nguwva Eliyà uvwa ne cyà kulwa awu.)

66 Mpindyewu tàngilàayi, ndi ngàalukila ku Maalàkì nshapità mwi4, cyàkàbidi. Mpindyewu vùlukàayi ne, Yèyè wàkamba kaaba aka ne: “Kumpàla kwà Dìtùkù dinène ne dyà luumù, ne didi dyenza bwòwà dyà Mukalenge kulwadi, Nènnùtùmìnè Eliyà mupròfeta.” Mvensà mwi5:

Kàdi Nènnùtùmìnè... mupròfeta... Nènnùtùmìnè Eliyà mupròfeta kumpàla kwà dilwa dyà ditùkù dinène ne dyà dikwacisha bwòwà dyà... [Disangisha didi dyamba ne: “MUKALENGÈ.”—Muf.]

67 Ncinyi citùdi tusangana “mu Dìtùkù dyà Mukalenge”? Ku ndekeelu kwà cikondo! Ki dìbà diikalà bàà pa buloba mwà kwoshiibwa. Nudi bavùluke mutwàkaMwangata mwikale ne kafulu katòoke ku mutù, nudi bamanye's, ne—ne cyàdi Cyèndè, ne mukàbà musenya lwà pa cyàdi. Nudi bavùluke aci anyi? Nènkù twakajaadikila ku Bible ne, kacivwa ditùkù dyà *nsabatu* anyi *dyàlumingu* to, cìvwa n'Ditùkù dyà Mukalenge. Ncyà bushùwà anyi? Nènkù ki ditùkù didiYe ùlwa bu Nzuji ne: “Ne neàtuute buloba ne mulawu.” Ncyà bushùwà anyi?

Nènkù nènnùtùmìnè Eliyà mupròfeta kumpàla kwà dilwa dyà ditùkù dinène ne dyà dikwacisha bwòwà dyà MUKALENGÈ:

68 Mpindyewu, tàngilàayi dilwa dyambakàne dyà Eliyà. Mpindyewu, bu nwènù mwà kumòna, Mufundu wònsò ewu

wùdi ne dyumvwija dyambàkàne: “Kàdi Ncisokoka ku mèsu kwà beena meeji ne badimuke, ne cibuwila bàna bakesè bàdi baswè mwà kuyiila.” Kanwèna nwitabuuja aci anyi? Mpindyewu, lamàayi Maalàki 4 ànu mwab’awu.

⁶⁹ Nènkù mpindyewu twàlukilàayi ku Maatàayi 2 katanci kakesè cyanààna, ànu luseke lukwàbò lwà dibèji alu, Maatàayi 2. Ngèèla meeji ne bivwa bikèngela bwà mémè kwamba ne Luukà 2 pamutù pàa Maatàayi 2. Ndi naaci cifundà kaaba aka, kàdi mvwa ndwijakaja ànu mu katanci kakesè emu, ne Nyumà Mwîmpè ùvwa pambidi pàanyi mu cibambalu amu ne mvwa munkaci mwà kupicila mu cikondo cîmpè citàmbe. Pa nànkù mvwa nswa kwamba...2, twànjiibi kumòna ní ncyòci. Mpindyewu, ngànjiibi kulonga eci ànu bwà katanci kakesè. Maatàayi 2 anyi? Aci kî ncîndi nkeba to, kî mmwòmò anyi? Mpindyewu, indilaayibi kakesè, nencipete ànu mu...Anji mpèshaayibi kaacikondo kakesè kaaba aka bwalu ndi muswè bwà nwikale batwishiiibwe ne nudi bacimòne, ne Mufundu ùtu ne dyumvwija dyambàkàne mu Wòwò. *Dikuukwila dyà Anna; Dyalukila ku Nazàlèetà; Paasàkà; Mudimu wa bwambi wa Yone.* Mpindyewu, ngànji mmonèbi ní mvwa mwà kwikala mwambe Luukà, mvwa mbala mwaba kampànda ne...Ndi—ndi njinga kwamba ne Maakò pamutù pàa Luukà, mbifwànyine kwikala Maakò. Kàdi ndi muswè bwà nùpetè Mufundu ewu bwà—bwà nwènù kumanya ne mmudimu wa Mukalenge, ne Yèyè bushùwà ngudi wenza cyòci eci mu mùshindù ewu. Mpindyewu, nennwambile mwaba ùndi nkebangana naawù, mwaba wà ne: “Ngàakabiikila mwan’Àanyi pambèlù pàa Èjiipitù.” Kùdiku muntu kampànda udi ne mèyi à kumpenga kwà dibèji udi mufwànyine kufikakù ne lukàsà lwònsò ne kucipeta anyi? “Ngàakabiikila mwan’Àanyi pambèlù pàa Èjiipitù, Ngàakabiikila mwan’Àanyi.” Mpindyewu, anji indilaayi kakesè.

⁷⁰ [Mwanèètù kampànda ùdi wàmba ne: “Luukà 1:17.”—Muf.] Luukà 1:17. Twasàkidila, mwanèètù. Ncyà bushùwà, Luukà 1. Maakò...Luukà 1:17, pamutù pàa 2. Ndi muswè kupeta mvensà wa 14, ki mwaba ùdi...Ki cyòci aci, mwanèètù. Ncyà bushùwà menemene, Luukà 1:17. Èyo. Mpindyewu, mpindyewu nudi mwà kucifunda. Mpindyewu, ncinyi aci, mpambèlù pàa mabènesha à Mukalenge, kwàkabèneshiibwaci.

Ne wèwè neùpetè disànkà ne musàngèelu; ne bààbúngì nebasankè ku dilediibwa dyèndè.

Bwalu yèyè neikale munène ku mèsu kwà Mukalenge, ne kàakunwà ní mvinyò ní mmaluwu makolè;

⁷¹ Muntu ulwàlwà ewu neàlongeshiibwe kacya ku dilediibwa dyèndè bwà kàyì kunwà maala to anyi bwà kwikala ne cintu kampànda cyà dyenza ne mpèkaatù wa mùshindù awu. Nwacyùmvù anyi?

...ne yêyè neikale mûjìibwe ne Nyumà Mwîmpè, kacya ànu munda mwà mamwëndè.

Ne bààbúngì bàà ku bàà Izàlèlèlà neàbaalujè kùdì Mukalenge Nzambi wabò.

Ne yêyè neàye kumpàlà kwèndè mu nyumà ne bukolè bwà Eliyà, bwà kwaluja myoyi yà baataatù kùdì bàà, ne bantòmbòjì ku lungenyi lwà baakàne; kulongolwela Mukalenge cisàmbà ciikale pabwìpì.

⁷² Mpindyewu, mpindyewu tudi tufika ku dyumvwa ne yêyè ùvwa mwamba mu cipròfetà, ne muntu awu ùvwa Yone's! Ncyà bushùwà anyi? Yone ùvwa Eliyà awu, wa ditùkù adi, uvwa ne cyà kulwa.

⁷³ Mpindyewu, tudi kàbìdì bamanyè ne Mufùndù misangu mikwàbò útù umvwija bintu bibidi. Newikale mwà kwamba cintu kampànda, bu mùdì lwà mu Maatàayi mùdìWu mwàmbe ne: “Ngàakabiikila mwan'Àanyi pambèlù pàà Èjiipitù.” Èyo, ngèèla meeji ne aci ki cìmvwà ngenda nkeba ne: “Ngàakabiikila mwan'Àanyi pambèlù pàà Èjiipitù.” Nènkù díbà adi wènú bakèbùlùlàngàne ne “mwànà” mu byà dileedila amu, Yêyè ùvwa . . .kàvwa . . .Ncyalùkile mu Hoshèyà, cìvwa kaciyi cyùmvwija ne Yesù, Mwan'Endè to; cìvwa—ùvwa ny'Izàlèlèlà, mwan'Endè: “Wàkabiikila Izàlèlèlà pambèlù pàà Èjiipitù.” Kàdì cìvwa ne muumvwija mambàkàne ne luumvu lutàmbe bunène mu cyòci pàvwàci cyumvwija ne cyàkula bwà bwalu bwà—bwà dilwa dyà Yesù, uvwa munène mutàmbe Izàlèlèlà awu, pàakabiikilaYe Izàlèlèlà pambèlù. Èyo.

⁷⁴ Mpindyewu, tudi kàbìdì tusangana ne . . .mu dilwa Dyèndè dyà kumpàla kadìvwa ku Ditùkù dyà Mukalenge to. Ncyà bushùwà anyi? Mpindyewu, twàlukilàayi ku Maalaki, twànjìbi kwolola eci dyàmbedi ne: “Kulwa ku Ditùkù dyà Mukalenge.” Mpindyewu, tàngilàayi dilwa Dyèndè dyambàkàne, dilwa dyeèndè dyà kumpàla ne Dyèndè diibìdì. Nudi ne ngeelèlù wènú wa meeji wa nyumà awu pabwìpì anyi? Mvensà mwi6 mpindyewu: “Yêyè neikale . . .”

...Yêyè neatumè . . .Eliyà . . .kumpàlà kwà . . .ditùkù dinène ne didì dikwàcisha bwòwà dyà MUKALENGE: (Ncyà bushùwà anyi?)

⁷⁵ Mpindyewu, tudi bamanyè ne awu kàvwa Yone to, bwalu kacìvwa Ditùkù dyà dikwàcisha bwòwà dyà Mukalenge to (mmwòmò anyi?), ne Yêyè . . .Kàvwa nànsha mwòshe buloba to. Pa nànkù cìvwa ne cyà kwikala cyumvwije mudyanjidile, anyi—anyì dilwa dikwàbò dicilwalwà dyà Yone . . .anyì dyà—dyà Eliyà. Mmwòmò anyi? Bwalu Wàkamba ne: “Nèntumè Eliyà, ne Nèngiikale ne cyà kwòsha buloba bujimà, nènkù Nèmbùkezùle, ne nenwènde pa butù bwàbò.” Aci's ke Bukalenge bwà bidimu cinunu, aci kaayi tudi bacimanyè. Paanyimà pàà bòmbè bwà mushìndà humanè kubùtaayisha mu tupesetupese,

dìbà adi nekwikale. . . buloba nebùlongoloke. Nènku nekwikale Ditùkù dinène pa buloba apa, ne Èkèleeziyà neàkòòkeshè ne Yesù pa buloba munda mwà bidimu cinunu. Ncyà bushùwà anyi? “Kàdi kumpàla kwà Ditùkù dinène ne dyà dikwacisha bwòwà dyà Mukalenge adi, pààtaayishiibwabo, Nènùtuminè Eliyà mupròfetà.” Mmwòmò anyi? Pa nànkù kabìvwa biswa kuumvwija ne n’Yone Mubàtiji mu ngiikadilu awu to, bwalu Ditùkù dyà dikwacisha bwòwà dyà Mukalenge kadìvwa dìbà adi to, bidimu binunu bibìdì bitùùke. Ncyà bushùwà anyi?

⁷⁶ Mpindyewu, tàngilàayi mvensà udi ulonda awu. Nènku bu nwènù mwà kwikala bàà nyumà menemene mpindyewu; mpindyewu, eci’s mmukàndà wà dinanga, ne bìdì bikèngela nwènù kuwùbadila munkaci mwà milongo nènku dìbà adi nebyumvwike bimpè. Nudi bamanyè cìndì njinga kwamba aci. Vùlukàayi mùmvwà mwambè, Mufundu ne: “Yesù wàkasàkidila Nzambi bwalu Yèyè ùvwa muWùsokòke beena meeji (ku mèsù ààbò) ne batàlame, muWùbuulwile bânà bakesè.” Mpindyewu, ntu misangu yònsò mfwànyikija ànu mùtù mukàjàànyì pàtùye umfùndila mukàndà; Ndi mwà kumòna cidiye wàmba mu mukàndà, kàdi ndi mbala munkaci mwà milongo bwà kumanya cidiye muswè kwamba, nwamònu’s, bwalu ndi mumunange ne ndi—ndi mumanyè ngiikàdilù wendè. Nènku bìdì bikèngela ùmanyè ngiikàdilù wa Nzambi ne ùMunange, dìbà adi Mifundu yìdì yìvwijiibwa yà bushùwà kùdì. Yèyè ùdì ùCibuulula.

⁷⁷ Mpindyewu, tàngilàayi mvensà udi ulonda awu:

Ne yèyè neàkudimue myoyi yà baataatù kùdì bânà,
(Mpindyewu, tàngilàayi.) *ne myoyi yà bânà kùdì*
baataatù, . . . (Nwamònu anyi?)

⁷⁸ Mpindyewu, pààkalwà Yone bu Eliyà, wàkakùdimuna myoyi yà beena Izalèlèlè, myoyi yà bânà bàvwà dìbà adi bìitaba mukenji wendè, myoyi yà baataatù kùdì bânà. Kàdi pàlwalwàye ewu musangu, neàkudimune myoyi yà Èkèleeziyà kuyààluja kùdì baataatù bàà ku Mpenta. Nwamònu’s, bìdì mùshindù anyi mukwàbò mwaba awu. Nwàcyùmvù anyi? Mpindyewu, Cìbalàayi’s!

⁷⁹ Mpindyewu, tèèlejàayi ne ntèmà mpindyewu:

Ne yèyè neàkudimunè myoyi yà baataatù kùdì
bânà, . . .

⁸⁰ Mwakwidi mukùlumpe wa ngiitàbijilù yà cyena kale; neàbàmbilè ne: “Mòna’s, Nzambi ùdì ne bukolè bwà ku mabwe àdì kaaba aka aa kujuudila Abraham bânà. Kanwikadikù nwela meeji ne nudi mwà. . .” Nwamònu anyi? Mpindyewu, neàngate myoyi mikàyàbale yà baakwidi bakùlumpè bàà ngiitàbijilù wa cyena kale abu ne kukùdimuna myoyi yàbò ku Diitabuuja dìvwa naadi bânà kaaba aka. Nwamònu’s: “Mpindyewu, aba bwònsò bààkabàtijiibwa ne bàdì bindile dilwa dyà Maasiyà abu. Nganyi udi munudimwije, nwènù ndelàngànyì yà nyòka yà ntòòkà eyi,

bwà kunyeema ciji cìcilwâlwa?” Kaa, ekèlekèle! Nudi numòna ne: “Úvwa ùkudimuna myoyi yà baataatù kùdi bânà.”

⁸¹ “Ne myoyi yà bânà kùdi baataatù.” Mpindyewu, pàalwà Eliyà munène ewu mu ndekeelu wa cikondo eci, yèyè neàngate Mukenji wa Mpenta bwà kukùdimuna bânà ku Diitabuujja dyà baataatù, bwalu neàbàtandishe bwà mùdibo kabàyi balamè Diitabuujja dimwèdimwè edi dyàkadiku kale wàwa ku cibangidilu. Amen! Mpindyewu, ngèela meeji ne tudi bamanyè bîmpè menemene ne necìikalè Eliyà. Kí mmwòmò anyi? Mpindyewu tudi bacìmanyè.

⁸² Ne cìdi ne...Mpindyewu nudi numòna’s, Ditùkù dyà dikwàcisha bwòwà dyà Mukalenge kí ndyanji kulwa to. Ntu ndikonka misangu yònsò ne: “Muntu ewu mmufwànyine kwikala muiishi, dîbà adi anyi?” Eliyà wàkenza bishimà byònsò, kakùyi diyiiisha to. Kàdi pàvwà Nyumà wendè, pambidi pàà Yone, wàkenza diyiiisha dyònsò kàdi cishimà nànsha cimwè. Bwà cinyi? Yesù ùvwa ne cyà kumulonda, Úvwa mwà kwenza bishimà: “Bwalu Dîbà dyà bwakàne nedijuuke,” mwàkambaye, “ne dyondopa mu mapwapwà àadi.” Pa nàнку Yone kàvwa ne dijinga dyà kwenza bishimà to, wàkamanyisha ànu dilwa dyà Kilistò. Nènku bwòbò . . .

⁸³ Mpindyewu, vùlukàayi ne, ne Yone ewu . . . anyi Eliyà wíkala mwà kulwa ewu, nebàmùmwè bibi, neikale muntu munène wa bukolè kumpàla kwà Mukalenge mu mùshindù wà bantu beela meeji ne yèyè mene ke Maasiyà.

⁸⁴ Bwalu balundà bèndè bàà batàmbe bwîmpè bààkamwambilà ne: “Wèwè ki Maasiyà awu.”

⁸⁵ Yèyè ne: “Mémè ncyèna mukùbànyine bwà kusùlula bisàbaatà Byèndè to, kàdi Yèyè ùlwalwa paanyimà pàanyi apa!”

⁸⁶ Bwalu bàvwa munkaci mwà dindila ne myoyi yizùka, dîbà adi, bwà kumòna Maasiyà, bàakadyàmbidila ne Maasiyà ùvwa ulwa . . . Pààkamònabo bwalu bwà cikùmà bunène ebu bujuuke munkaci mwàbò, kwambabo ne: “Yèyè ke Maasiyà awu.”

⁸⁷ Yone wàkamba ne: “Mémè ncyèna Yèyè awu to! Kàdi Yèyè ùlwalwa paanyimà pàanyi!”

⁸⁸ Kaa, ekèlekèle! Nwàcyùmvù anyi? Pa nàнку balundà bèndè bàà katàpùlà katèèkà nebelè meeji ne m’Maasiyà.

⁸⁹ Mpindyewu, mònaayi cikwàbò cintu cyènzeka, ngiikàdilu wa cyòci eci, yèyè nealwe ànu kumpàla menemene kwà Ditùkù dyà Mukalenge. Mpindyewu, buloba kabùtukù bwòshike mu matùkù à Yone to, nàнку mmu matùkù àcilwâlwa. Pààkalwaye musangu wà kumpàla, wàkayiisha ànu cyanààna; musangu mwibìdì, yèyè—yèyè neènzè byònsò bibìdì kuyiisha ne kwenza bimanyinu bilaya kùdi Yesù Kilistò. Èyo, mpindyewu, tùtàngilàayi ngiikàdilu, ciikalèye, ngiikàdilu wa mupròfeta ulwàlwa awu.

⁹⁰ Mpindyewu, tudi basànkishùbwe ne mwanjèlò wa cikondo cyà ndekeelu cyà èkèleeziyà eci, ùvwa mudyànjila kwamba kuumukila mu Dipungila Dikùlukulu; mpindyewu, bakwàbò abu kabàvwa bóbò badyànjila kwamba to. Pòlò, Irénée, kabàvwa badyànjila kwamba to. Kàdi cikondo cyà ndekeelu eci, ku ndekeelu kwà dikumbana dyà maalu wònsò, ndekeelu wa buloba, neciikale cikondo cyà mikùùkùkù citùdì naaci ànu kumpàla kwètù eku, mu mùshindù wà ne mwanjèlò wa eci cikondo ùvwa mudyànjila kwamba kacya kale wàwa mu Mifundu, Mifundu yà Kale, ku ndekeelu wa cikondo eci. Ng'Elìyà, mulaaba munène awu.

⁹¹ Mpindyewu, tàngilàayi! Ngiikàdilù wa mùshindù kaayi wíkala nendè Elìyà? Dyàmbedi, yèyè neikalè mupròfetà wa bukolè wa lulamatu ku Dìyì dyà Nzambì, bwalu Elìyà ùvwa ne lulamatu, ne Yone ùvwa ne lulamatu. Ncyà bushùwà. Wenza bimanyinu ne maalu à kukèma, neàlujè myoyi yà bânà ku Diitabuuja dyà baataatù bàà ku Mpenta. Neàkine màngumba ànu mùvwa Elìyà muàkina amu. Ncyà bushùwà, neenzè nàнку! Ngèela meeji ne tudi bamutwàdijile mudimu mpindyewu; s'ke cikondo cyà yèyè kulwa eci's. Yèyè neàkine màngumba! Elìyà ùvwa muàkine, nènku ki mùvwà kàbidì Yone mukine dìngumba.

⁹² Yone wàkamba ne: “Kanùlù to, nwela meeji ne: ‘Mpindyewu tudi ne Abraham bu taatù wetù.’ Nwènù Báfàalèsà ne Bàsadokà, nwènù musumbà wa nyòka yà ntòòka nwè! Nyòka yà mu bisoosa,” mèyì makwàbò. “Bwalu nyàwù nnwambila, Nzambì ùdi ne bukolè bwà kujjudila Abraham bânà ku mabwe aa.”

⁹³ Elìyà wàkamba ne: “Bwònsò mbapàmbùke, muntu yònsò wa kùdìbò! Kì nkushàale muntu to ànu mèmè nkààyanyi.” Kaa, ekèlekèle!

⁹⁴ Yèyè neàkine kàbidì bakàji bàà maleela! Elìyà wàkabàkina: Izàbèlà. Mmwómò anyi? Yone wàkabàkina: Helodiàsè. Bapròfetà bwònsò bàbidì abu, Nyumà, Nyumà umwèumwè awu. Bààkakina bukwà-màngumba, èkèleeziyà wa pa buloba. Bààkakina, kàbidì, bakàji bàà maleela, bàà babi abu. Bwòbò. . . Cintu kampànda mu nyumà wabò cyàkeela lubilà cipùisha cintu aci's! Izàbèlà wàkenda ùkèbangana ne mutù wà Elìyà ne ùvwa ne cyà kuwùkosa; ne wàkakosa kàbidì mutù wà Yone, Helodiàsè awu's. Bùbidì bwàbò!

⁹⁵ Mupròfetà ewu neikalè munangi wa cipèèlà! Bu Elìyà, yèyè ùvwa musòmbèle mu cipèèlà, nkààyendè. Yone, mu cipèèlà, nkààyendè. Dìbà adi tudi bamanyè ne neciikalè Elìyà. Èyo.

⁹⁶ Ne mupròfetà ewu neikalè umwe wíkala mwà kushàala ne Dìyì dilelèlè dyà Nzambì. Èyowà, yèyè neàshaalè naaDì, Dìyì dyònsò. Bwà kwenza cinyi? Bwà kwakajulula Diitabuuja (ku èkèleeziyà wa Efèsò) divwà dijimija cikondo cyònsò eci, Diitabuuja, mu èkèleeziyà uvwa ne “Ciibi cyunzulula” citèeka kumpàla kwèndè kàdi kuCìbenga.

⁹⁷ Kî mmutnu mulonge mukàndà to. Eliyà kàvwa muntu mulonge mukàndà to, mwena Tiishibà awu. Yone kàvwa muntu mulonge mukàndà to. Luukà 1:67, Bible mmwambe ne yêyè ùvwa... “Mwànà awu ùvwa munda mwà...mmwenze ànu ùlediibwa, kuyaye mu cipèèlà, ùvwa mu cipèèlà too ne ku ditùkù dyàkaleejiiibwàye kùdi Izàlèlèlà.” Ncyà bushùwà. 1... Luukà 1:7 too ne ku mvensà wa 80, panwikala baswè kucifùnda.

⁹⁸ Mupròfeta ewu neikale muntu wa cilunji cyà buumfiikààmùndà. Eliyà, paanyimà pàà yêyè mumane kwenza disangisha dinène, muntu nànsha umwe kàvwakù mwà kupetangana nendè to. Eliyà ùvwa ne mabika ne mala. Pààkapatukàye kuntwaku ne kutùulula kapyà mu dyulu ne kwoshaku byoshelu byà Baalà ne bikwàbò byònsò, wàkapatuka kubwela mu cipèèlà e kwambayè ne: “Mukalenge, ncyèna mwimpè mutàmbe baataatù bàanyi nànsha, mfwè nànsha kufwà.” Ncyà bushùwà anyi? (Ne Yone...) Yêyè—yêyè wàkasòmba mwinshi mwà kaci kàà mupenga, ne paanyimà pàà ditàbuluja dinène, mpindyewu ùvwa muswè kufwà.

⁹⁹ Nènku Yone, pààkamwelabo mu bulokò (mukàji wa maalu mabole ewu) wàkasòmba mwaba awu ne kubanga kubìnduluka. Ngèèla meji ne ùvwa m’Pember anyi umwe wa ku bwòbò wàkamba ne: “Mèsù èndè à mukanku awu kubwicidilawù, mu bulokò amu.” Kutùmaye bàmwè bàà ku bayiidi bèndè.

¹⁰⁰ Nènku, mòna’s, yêyè ùvwa mwakule patòòke, mwambè ne: “Wàwa ki Mwànà wa mùkòòkò wà Nzambì udi uumusha mpèkaatù wa bàà pa buloba.” Yone kumòna Dikunji dyà Kapyà dìlèmbèlèle pamutù Pèndè, bu mùdi Nkuci amu, dipweka, dishikama pambidi Pèndè. Kuciijaadikaye cyònsò, ne kwamba ne: “Wàwa ke Mwànà wa mùkòòkò wà Nzambì!” Ki yêyè ne: “Bidi bikèngela bwà mèmè kubàtijiibwa Kùdi, kàdi bwà cinyi Wèwè udi ulwa kùndi?”

Yesù kwamba ne: “Itàbà bwà bìikale nànkù mpindyewu.”

¹⁰¹ Kàdi pààkamwelàbo mu bulokò, pèndè kumba kushààla mwena dibungama ne lùkàsà lwònsò. Nwamònu’s, bidi ànu bu bikolè’s, mbikolè bwà kudipetululaye. Nènku pààkènzabo nànkù, kwambaye ne: “Ndaayi nukaMwebèjè ní n’Yêyè Awu menemene, anyi nebikèngele bwà twètù kwindila mukwàbò bwà kulwa?” Ànu mwàkènzà Eliyà amu menemene, nwamònu’s, ànu byà mwomùmwe.

¹⁰² Yêyè, muntu wa cilunji cyà bumfiikàmùndà, nànkù tudi tumuumvwila luse bwalu tudi bamanye ne ciine aci ncinyi. Eyo.

¹⁰³ Mpindyewu, mpindyewu ku... È—èkèleeziyà, ku dimwèneshiibwa dyèndè... Mbimpè ndekele aci’s. Ku dimwèneshiibwa dyèndè, Èkèleeziyà awu—awu... Pààdimanyishaye, Eliyà wa bukolè wàtùtùmina Nzambì awu, pààdimanyishaye bu mwàkadimanyisha Eliyà amu, Èkèleeziyà ùkaavwa mudilongolole bwà kupikudiibwa, ùvwa

mupikùdìbwe ku byanza byà cimpààngaanù. Mmwómò anyì? Ànu pàakajuukàye kuntwaku e kwamba ne: “Netùjaadikè ne nganyì udi Nzambi,” Eliyà wàkapikula Èkèleeziyà. Nènku Yone, ànu mwà kenza Yone amu, wàkamba pàakamònaye Yesù, kwambaye ne: “Ndi ne cyà kupweka ne Yèyè ùdi ne cyà kubàndà.” Yone wàkabanga kuyiisha, wàkadimanyisha pabwipi menemene ne dilwa dyà Mukalenge. Ànu ku ndekeelu mene, dimwèneshiibwa. Èyo.

¹⁰⁴ Mpindyewu, tudi tujandula ne Eliyà ùdi ne cyà kumvwija cikondo eci kùdi Èkèleeziyà ewu. Bwà kujaadika ne ùvwa ng’Eliyà: Eliyà paanyimà pàa yèyè mumanè kufila cipròfetà cyèndè, Eliyà kàvwa ne cyà kufwà to, wàkatentemunyibwa ne wàkambwibwa mu Dyulu; cifwànyikijilu cyà Èkèleeziyà (ku ndekeelu kwà Eliyà wíkala mwà kulwa awu, ku ndekeelu kwà cikondo *cyèndè*), Èkèleeziyà neàyè mu Dyambwibwa, kàyì ùpicila mu mindidimbì yà lufù to. Neciikalè Dyambwibwa! Ngèèla meeji ne Eliyà munène, udi ne cyà kulwa awu, neikale Eliyà mulaaba udi mwamba mu cipròfetà bwà matùkù à ndekeelu awu. Amen! Ngèèla meeji ne yèyè neikalè, pàalwàye, mwanjèlò, anyì mùsànjeela kùdi èkèleeziyà mu matùkù à ndekeelu (cisàmbà cibèngiibwe, cipwekèshiibwe milongo, bu mwikalà èkèleeziyà ewu mwà kubwelamù, ne ùkaadimù mene). Ngèèla meeji ne Eliyà mmulayìbwe mu Bible. Ngèèla meeji ne tudi mwà kuumvwa aci, ne Eliyà ùvwa ewu wàkalayibwa mu Bible bwà kulwa ditùkù edi awu. Nudi nwitabuuja aci anyì?

¹⁰⁵ Mpindyewu, twàlukilààyaaku mpindyewu ku Laòdikiyà ne netùmonè cidì Mukalenge wetù ne cyà kutwàmbila dilòlò edi bwà Laòdikiyà, Laòdikiyà. Eyo, mwoyi mwela èkèleeziyà:

... *kùdi mwanjèlò wa Mukalenge* ...

¹⁰⁶ Mvensà wa 14 wa nshapità mwi3 wa Bwàkabuulwibwà:

... *fùndila mwanjèlò wa Mukalenge*... *wa*... *beena Laòdikiyà; Maalu aa ke adibo bamba kùdi Amen, ntèmù wa lulamatu ne mulelèlè, ne cibangidilu cyà bufùkì bwà Nzambi;*

¹⁰⁷ Kaa, ekèlekèle! Tudi ne byònsò... Bu twètù mwà kushààlapù bufùku bujimà ànu pa bwalu ebu, mùshindù mene ùdi Mukalenge mufwànyine kutùbuulwilaci’s wè! Tàngilàayi’s!

¹⁰⁸ “Amen” ki wa “Ndekeelu.” Yèyè mmumwènèkemwènèke mu bikondo byònsò too ne ku ndekeelu, ne bintu bishiilèshiiàngàne, kàdi’s ke cikondo cyà ndekeelu cyà èkèleeziyà eci mùdìbo bamba ne: “Ndi... Eci’s ki dijikija, Ndi wa Ndekeelu.”

¹⁰⁹ Mpindyewu, bwà kuleeja ne Yèyè ùvwa “Wa kumpàla” kàbidi, mùvwàYe amu, Yèyè ke “cibangidilu cyà bufùkì bwà Nzambi.” Kaa! Nudi nuCyùm vwa anyì? Nwamònu anyì? Mmunyì mùdi Nzambi mwà kwikala mufùkibwe piikalàYè ùdi Nyumà? Mmunyì mùvwàYe mwà kwikala nànkù? Yèyè—Yèyè ùdi wa Cyèndèlèlè! Yèyè kàakafukiibwakù to, Yèyè

kàadyàkufùkiibwakù to, bwalu Yèyè ùvwa Nzambì ku cibangidilu. Kàdi Yèyè udi “cibangidilu cyà bufùki bwà Nzambì” ùvwa n’Yesù Kilistò pàvwàYe mumwènèshìibwe, pàvwà Nzambì musòmbèle munda Mwèndè. Yèyè ki *bufùki* bwà Nzambì! Kaa, ekèlekèle! Nwamònu’s: “Wa Kumpàla ne wa Ndekeelu; Amen, cibangidilu cyà bufùki bwà Nzambì.” PààkaDifùkilà Nzambì mubidi, Wàkapweka ne kulwa kusòmbelamù, ki cibangidilu cyà bufùki bwà Nzambì ncyòci aci. Nwamònu anyi? Kaa, kí mMulenga anyi?

¹¹⁰ Mpindyewu, tudi tusangana dyàmbedi ne, Wàkaleeja Bunzambì Bwèndè *kaaba aka* mene ne: “Mémè ndi wa Bukolè bwònsò! Mémè ki Yèyè Wàkadiku, Udikù Awu, ne Wàlwa. Wa Bukolè bwònsò!” Wàkacyàmbila èkèleeziyà wa Efèsò, misangu yisàtù. Mmwómò anyi? Úlwa buludi too ne ku Laòdikiyà wàmba ne: “Ndi Amen. Mvwa wa Kumpàla lwà *mwab’ewu*, Ndi wa Ndekeelu lwà *mwab’ewu*. Ne Ndi cibangidilu cyà bufùki bwà Nzambì. Mu bikondo byà èkèleeziyà bidì bikèngela bwà twètù kwikala naabì, nenüyiile ne Mémè ndi Nzambì, Nzambì mufùka mu mmwènèkelu wa muntu. Mémè ndi cibangidilu cyà bufùki bwà Nzambì!” Amen.

¹¹¹ Aci’s ncifwànyine kufikisha Presbytérien ku dyela mbilà. Anji elàâyibi meeji bwà bwalu abu! “Cibangidilu cyà bufùki bwà Nzambì.” Mpindyewu, ndi . . . Kaa, mùshindù mwine wùndì munange aci’s cyà ne: “bufùki bwà Nzambì,” pààkafùkiibwa Nzambì, pàvwà Nzambì muvwijiibwe mubidi mu Yesù Kilistò ne musòmbèle munkaci mwètù.

¹¹² Mpindyewu—mpindyewu, mvensà udi ulonda mmufwànyine kwikala (bwà èkèleeziyà mikwàbò) ùtwa makùmbù, kàdi Yèyè kèna ùtwa èkèleeziyà ewu makùmbù nànsha. Yèyè ùvwa ne didyùla bwà bwalu bwèndè, kî ngùmutwa makùmbù nànsha. Kàvwaku mwà kutwà ewu makùmbu bwà bwalu nànsha bùmwe to, cikondo cyà Laòdikiyà eci. Ne Bukènkè bwònsò bùvwàbo naabù abu, ne kwalukidilaPù, kabàvwa bakùmbànyine ditwà dyà makùmbù nànsha dyà kànà to. Uh-huh. Bivwa bikèngela kubàtandisha, kàdi ki bòbò kwakanagana naadi’s wè! Yèyè ùvwa ne didyula bwà èkèleeziyà ewu, kî nditwà dyà makùmbù nànsha.

¹¹³ Mpindyewu ndi muswè kubala mvensà wa 15 ne mvensà wa 16 kaaba aka mpindyewu:

Ndi mumanyè byenzedi byèbè, . . . wèwè kwèna ní nku mashika ní nku luuyà to: mvwa kuswa bwà wèwè kwikala ku mashika anyi ku luuyà. (Mu ngaakwilù mukwàbò ne: “Kwikadi—kwikadi ànu civùmvù to.”)

Nàнку dibà adi bwalu wèwè udi civùmvù, ne kùyi ní nku mashika ní nku luuyà, nènkutwile mukana mwànyì. (Hmm!)

¹¹⁴ Mémè kwela meeji ne. . . Aci nditwa dyà makùmbu anyi? Aci’s nditandisha dyà cikondo cyà Laòdikiyà cidì kacyi

cineemeka Nzambi eci, citàmbe bubì cyà ku byònsò. Byònsò bikwàbò abi mu maoyooba ne byònsò byàkapticìlabi abi; kabàvwa ne kantu nànsha kàmwè to, bàvwa balandike ne ku mènù, bàlálakana bavwàle bisèbà byà mikòòkò ne byà mbuji, ne bapòòpòdiibwe, ne bakòshìibwe ne scie ne bwòsha babutula, ne beelega nyama yà ntambwe, ne bikwàbò byònsò, kàdi kacya ànu bààkwàta ku Diitabuuja. Kàdi ewu musùmbà wòwù wùdi “mubanji ne kawùyi dijinga ne cintu nànsha cìmwè,” ne bikwàbò byònsò, ne ndumbà! Ncyà bushùwà.

115 Mpindyewu, tudi ne dileesònà dinène dyà menemene, ndi ntékemena bwà ne Mukalenge àtùkwàcishèku. Yèyè—Yèyè kwamba ne: “Bwalu kwèna ní nku luuyà ní nku mashika, mwikale civùmvù.”

116 Byenze bu mabèèle, nwamònu’s. Mabèèle mîmpè matalàle atù mîmpè. Kí mmwòmò anyi? Mabèèle à luuya mmîmpè bwà mubidi. Kàdi mabèèle à civùmvù neàkulùkishè.

117 Ndi mvùluka ne dilòòlò kampànda ngakasaama, ku musùlu kwàka, kùkaadi bidimu biipacila ku makùmi àbìdì ne bìtaanu nànkù. Mvwa nsanganyibwa mu katuntatunta kàà kazùbu kacyoòke, musòmbelemù. Mémè kusaama, ne kulwaboku, bukwenda bwànyì ùvwa muye naanyi kwà Ngàngàbuka Isler. Yèyè ne: “Bwalu bùdi bìshi?”

Mémè ne: “Cifù cyànyì cìdi cìnsaama bikolè be!”

118 Yèyè ne: “Nwakukù ngalasa wa mabèèle à cyuyuyà.” Kaa, mwanèètù! Mabèèle à civùmvù, atù angendesha ku mwoyi, ki mémè kuàlùka ànu wònsò ne byònsò bìvwà munda.

119 Mpindyewu, Nzambi kwamba ne: “Mvw’a kuswa anyi nwìkale ku luuyà, ne luuyà lukolè lwà ngwèng, anyi mukwàte mashika à dibwe, kwikala eci anyi cikwàbò. Kanwikadi civùmvù to, bwalu nudi nuNgendesha ku mwoyi.”

120 Ki cìdi cikondo cyà èkèleeziyà ewu cyènzela Nzambi, cìMwendesha ku mwoyi! Nwamònu anyi? “Anyi udi... Kuteeci...Any-...kuteeci kwikala wà lwà ngwèn-...Anyi ikala ku luuyà lwà ngwèng anyi...Kuteeci kwikala wa civùmvù nànsha! Cyuyuyà anyi luuyà, bwalu udi uNgendesha ku mwoyi.”

121 Dikwàcika dyà mashika dikolè dyà èkèleeziyà wa ba-Anglicans mu matùkù à John Wesley dyàkamufikisha ku diya kenza masangisha mwaba mu kwàbò, bwalu ùvwa ne mashika, mu kwàcike mashika makolè.

122 Dikwàcika dikolè dyà mashika dyà èkèleeziyà wa ba-Méthodistes dyàkafikisha William Booth ku dilwa muiyishi wà lupàndù wà luuyà lukolè lwà ngwèng. Nudi numòna ne Nzambi wàkamba ne: “Nwènù kanùyi balwe kunyingalala to, Nèngùumushe citèekedi cyà mwèndù pa mwaba wàci. Nèncyumùshe, kucipèèsha mu kwàbò muntu.” Nànkù

pàakabenga èkèleeziyà wa ba-Méthodistes bwà kwakidila dijidiibwa dyà John Wesley, William Booth kujuukaye ne Armée du Salut kutungunuka naadi. Ncyà bushùwà. Bwà cinyi? Bàakacivwija bulongolodi! Aci's mmwômò menemene. Kucivwija bulongolodi, ki Nzambi kwamba ne: "Ndi mukine cintu aci!"

¹²³ Nàнку awu ke . . . William Booth kupàtukaye ne kucyàngata, ke Armée du Salut awu, dîbà adi civwaye mufwànyine kwenza ncinyi? Cintu cimwècimwè aci, kukùdimuka e kucivwija cyàkàbìdi bulongolodi. Paanyimà pèndè kulwaku beena Campbell, ne kushàalabo katanci nàka; ne pashìishe John Smith ne ba-Baptistes; ne pashìishe paanyimà pàà cyôci aci kulwakù ba-Nazaréens; ne pashìishe paanyimà pàà ba-Nazaréens kulwabò kùdi Mpenta.

¹²⁴ Ba-Nazaréens, Cyàkenzàbo ncinyi? Kwenzabo cyàbò aci ànu mùshindù ùmwèùmwe awu, kucivwija òngumba.

¹²⁵ Cyàkalwà ncinyi mu cikondo aci? Mâpa makesè àbìdi, Église de Dieu ne bikwàbò, kupàtukilabi muntwamu. Bàakenza cinyi? Kudyènza bulongolodi; kubàlekela ànu baya batungùnuke.

¹²⁶ Kulwaku beena Mpenta ne mvùla mishìishè yà dibènesha, cyàkenzabo ncinyi? Kudyènza bulongolodi, ki Yèyè kubalekela bàtungunuka. Ncyà bushùwà.

¹²⁷ Mpindyewu netùfike kwìnshì eku kundekeelu, nudi nupeta cintu kampànda cyà cikolè menemene mu katanci kakesè emu. Èyo.

¹²⁸ Èyo, Yèyè mmuswè bwà wikale ku luuyà lukolè lwà ngwèng anyi—anyi ku mashika à dibwe, eci anyi cikwàbò. Kwikadi civùmvù to! Kudidingi kwela meeji ne udi cintu kampànda cyùdi kùyì naaci to, anyi kwikala ku kapyà bwà Nzambi anyi kwalukila mu—mu—mu bulongolodi. Kwikadi—kwikadi civùmvù to!

¹²⁹ Ncintu cimwècimwè aci mpindyewu! Ki cintu cimwècimwè aci kwenzekaci mu . . . èkèleeziyà eyi kaaba aka. Yèyè mmuswè wikalè anyi ku luuyà anyi ku mashika. Kî mmusweku wa "civùmvù nànsha." Aci's ki kùdi Mpenta mukafikè, ngiikàdilù wa civùmvù. Bàdi balenga pyàno ku musangu ne musangu, ne biine abi ne ndambù wa ngoma, kàdi kwenza ndambù wa mutooyi katanci kakesè; ne bapeta mijiki mikùmbàne, muntu kampànda ujuuka ne mùshindù wà . . . nudi bamanye's, dyakula dyà mùshindù bu wà ne: "Mukalenge àtumbe! Àlèluuyàh!" Uh-huh. Ki mùjiki wènda ùjika ne: "UH, Uh, uh, uh," ànu nàнку awu's. Kaa, ekèlekèle, cidi cyendesha ànu Nzambi ku mwoyi Kwèndè! Nwamònu anyi? Uh-huh. Èyo.

¹³⁰ Kakwèna nànsha cyànsongo cidi cyenzeka dîbà adi to, bwà—bwà bìdi bitàngila ditabuluja dyà luuyà lukolè lwà ngwèng dyenzeka munda mwàbò, kàdi bàvwa ànu ne byamu byà bivuma bùngi kabùyì kwamba mu èkèleeziyà amu, nudi numòna's,

bwalu bàvwa babanji ne, kaa, ekèlekèle, bàvwa munkaci mwà kudisanga ne bènza masangisha manène ne bikwàbò byònsò. Bàvwa munkaci mwà kucyònkomoka mu èkèleeziyà ewu, bwà aci kaayi ncilelèlè, kàdi's mbyamwamu byà bivuma cyanààna. Kàdi kakwènàkù luuyà lwà Nyumà Mwîmpè to. Nwamònu anyi?

¹³¹ Tàngilàayi mwab'ewu cyàkambàYe mu mwaba ewu, nwamònu's:

Ndi mumanye byenzedi byèbè, . . . wèwè kwèna ní nku mashika ní nku luuyà: mvw'a kuswa bwà wèwè kwikala ku mashika anyi ku luuyà.

Kàdi bwalu wèwè udi civùmvù, . . . kùyi ní nku mashika ní nku luuyà, nènkuwile mukana mwànyi.
(Nwamònu anyi?)

¹³² Mpindyewu, Wàkamba ne: “Mvw'a kuswa wikale ku mashika anyi ku luuyà. Kàdi bwalu kwèna nànkù to, ne bikèngele bwà Mémè—Mémè kukulekela, kwàjikì, kukukùpula ànu mukana Mwànyi.”

¹³³ Mpindyewu, bàvwa ne mfrangà bùngì cyanààna, bàvwa ne nzùbu minène, bàvwa ne bintu binène byènzeka, kàdi kabàvwa ne luuyà lwà Nyumà Mwîmpè nànsha. Kaa, bàvwa ne byam- . . . n—ndongolwelu kampànda. Kaa, ekèlekèle! Bàvwa ne èkèleeziyà mudisange pàmwè, balumyàna wa yààyà, bàvwa ne nzùbu mitambe bunène yà kacya ne kacya, ne bintu munkaci mwà kwenzeka, kàdi Nyumà Mwîmpè nànsha wa mafi. Nwamònu anyi? Ki cidì Nzambì mutùme bwà Èkèleeziyà, Nyumà Mwîmpè.

Mpindyewu, patùdi tutùngunuka mu mvensà wa 16 ewu apa.

¹³⁴ Bàdi ne tusùmbù twà mîshindù kanà yònsò. “Kaa, tudi ne ndongolwelu munène wa cyòci aci. Cisùmbù cyà bainábànzà banunu cyà dyambulwishangana, ne di—dinaya dyà baansòngà dyà ambùlà mfùmù ùdye mbonga, ne—ne dinaya dyà mubèlè mu diitaanu dilòlò, ne di—dinaya dyà ndundu wa bibòndu mu dyàlumingu mu mapingaja, ne, kaa, dinaya dyà ndundu wa byanza mu ditùkù *kampànda*. Nènku, kaa, tudi tufuma kudyenza kasùmbù kàà muyiiki wà bantu balùme. Kàdi, kaa, tudi ne bintu byà mîshindù yònsò.”

¹³⁵ Ndi nnwambila ne, mmukùngwije mushiki wà, tusùmbù, ne tunsànkì, ne baamùyàpàndì, ne binganyì bikwàbò, kàdi luuyà lwà Nyumà Mwîmpè nànsha lwà mafi. Nwamònu's, cinùdì naaci ndongolwelu munène, kàdi kanwenamù ne cintu cidì mwà kufila luuyà to. Nudi nudinàngulula ku maalù à buloba kàdi kí nkùdì Nzambì to, ki bwà cinyi nudi civùmvù.

¹³⁶ Kaa, nudi ne bidimba bipite ne binùvwà naabi kwònsò eku. “Bushùwà's, mulumyàna! Mòna's, tudi bapete mùlìyò mukwàbò mutenteka mu cidimu cyà 1944,” ki mùdì ba-Baptistes bàmba. Kàdi—kàdi cinùdì naaci ncinyi? Mushikì munène wà byamwamu!

137 Ànu mu èkèleeziyà umweumwe mungààkumvwa bàmba bwalu ebu, bivwa bikèngela banji kutangalaka mu tusunsa dikumi, bwà kupèèsha mpaasàtà mpungà wa kupàtukakù, ne balami bwònsò ne bwònsò bwàbò abu, bwà kunwàku mfwanka, ne kubwela kàbìdì. Nwamònu anyi? Ki bwalu mbwòbù abu's. Mbitòòke tòò ne Bible ùdì ùpiisha bintàkanyì abi! “Wèwè ukooyisha mubidi ewu. . .”

138 Bangàngàbukà bàdì bàcìpiisha bàmba ne: “Cìdì ne kansèrè ntèntè.” Pashìishe bàyaaya ku cisanji bàmba ne: “Kataacilu kàà muntu udi wela meeji.”

139 Bu mwàkambà Billy Graham ne: “Yèyè mmukùtākàne bwà kwela meeji mùshindù awu ku cibangidilu.”

140 “Kataacilu kàà muntu udi wela meeji,” muntu *wa wela meeji* kèna mwà kumunwàku to nànsha kakesè, ncyà bushùwà, udi wangata ngeelèlù wa meeji mwibìdì. Kàdì ùdì wambila bakàjì ne cìdì cibàvwija bà tunyitunyi, nudi bamanyè's, bwà bààmòna mwà kulwàta yimwè yà ku nkanzu mipyamìpyà yidìbo naayi. Balùmàyànà, bwà aci bàdì bàsakula's! Bakàjì bààbùngì bànwana mfwankà kutàmba mùdì balùme bànwa mpindyewu, ne mukàjì ùnwana mfwankà misangu yisàtù pa ùmwè, kutàmba mulùme. Ncyà bushùwà menemene, bwalu mmuswè kunyaana. Yèyè kèna ùmanya ne aci ndisaamà dyà cyàdì ne kansèrè ne bintàkanyì bìdì munkaci mwà kumuvwija nànu awu abi, ànu mu mmwènekèlu wa bicìbangilaku, kàbwela munda mwèndè, kènda kàmukunya mùshindù awu, munkaci mwà kumushipa. Kakwena cintu cìdì mwà kupatukamù to ànu bubì! Ncyà bushùwà. Nwamònu anyi? Kàdì aci's: “Cìdì—cìdì kataacidi kàà muntu udi wela meeji.” Ha! Kaa, ekèlekèle!

141 “To! To! Kaa,” mùdìbo bàmba ne: “kàdì twètù tudi ne. . .Mwanèètù Branham, ndi ngèèla aci kadyòmbò! Tudi ne masangisha manène! Tàngilàayi cìvwa naaci Billy Graham mu ditùnga dijimà.” Kaa, bushùwà, ndongolwelu munène, bàfuta batangadiki, balombodi bàà misambu bàfuciibwa.

142 Èyowà, bàdì bàfuta batangadiki bààbò. “Èè, nenùmpèèshe cinyi bu mémè mwà kulwa kwenza ditàbuluja adi? Èè, wèwè kuyì mwà kupatula binunu byà ndola *bùngì yakaa* to ncyàkulwakù to nànsha kakesè. Ncyà bushùwà. Nènu nganyi uwàlekela bwà kulombola misambu? Èè, uyààya kafuta *Kampànda*, mmwìmbi munène wa solo. Udi umwangata ku mudimu bwà. . . Neànkungwijile cyàbìbìdì cyà musumbà wànyì, neàcyenze yèyè nkaayendè.”

143 Bimbi bàà solo bafuciibwa! Batangadiki bafuciibwa! Mòna's, mbikafike too ne mu cipidì cyà ne disùngila dyà misùùkà dikaadi mushinga wa dyenda. Disùngila dyà misùùkà kì mmushinga wa dyenda wà èkèleeziyà to, mbukolè bwà Nyumà Mwimpè mu èkèleeziyà. Disùngila dyà misùùkà kì. . .kwena udisumba ku mfranga to. To, mukalenge! To! Cyònsò cidìdì,

cìdi mbyenzedi, byenzedi, byenzedi, batangadiki bàfuciibwa, balombodi bàà misambu bàfuciibwa, kòralè yifuciibwa, ne bikwàbò byònsò. Nzambi kàtu muswè aci to, byònsò bìdi ànu byenzedi! Nzambi kàtu muswè byenzedi to, Yéyè mmuswè Nyumà Mwímpè àkwàcila mudimu munda mwèbè. Ncyà bushùwà.

144 Mvensà wa 17 ùdi wàmba ne:

Bwalu wêwè udi wamba ne: ndi mubanji, . . . mubanjike bikolè, ne ncyèna dijinga ne cintu to; kàdi kwèna mumanyè ne udi mukèngeledi wa luse, (Kaa!) . . . kwèna mumanyè ne udi mukèngeledi wa luse, . . . mwena dikènga, . . . mupèlè, . . . mpofo, ne butakà: (Hmm! Hmm!)

145 Bàvwa bèèla meeji ne bàvwa “babanji,” beena Mpenta aba mu èkèleeziyà yà cikondo cyà ndekeelu eyi. Bàdyambidila ne . . . Ne bàvwa nàнку bwa mmwenekelu. Èyowà’s, mukalenge. Mbabanji. Anji elààyiibi meeji bwa èkèleeziyà, ùvwa ne ciibidilu cyà kwikala kùkaadi ndambù wa bidimu, wìmana pambèlu lwà mu ditumba, bàvwa bàlálakana bàtwa eku ne eku, bàvwa bàpìcila mu cikondo cicolè. Kàdi mpindyewu bàdi ne yìmwè yà nzùbu mitàmbe bunène yidiku.

146 Nudi numòna mwaba ùdi Assemblées de Dieu yàya, yìvwà ne ciibidilu cyà kupetela mwaba mu nzùbu wa cyanààna mwenza ne mabaya, cintu kampànda bu ewu ewu, kàdi mpindyewu bàdi munkaci mwà kwibaka nzùbu wa miliyò yisambòmbò yà ndola, ne bàdi bàmba: “Yesù ùlwalwa àbìdi aa.” Byenzedi byènu bìdi bijaadika ne kanwèna nwitabuuja aci to. Ndubombo! Baditwe mu kwibaka nzùbu yà miliyò yà ndola ne bintu byà mùshindù bu nàнку, eku nwamba ne: “Yesù ulwalwa àbìdi aa.” Kàdi baa mìsiyònèrè bakwàte ne byà luse mu budimi bwa bwambi, bapangile bisàbaata ku makàsà, baa mìsiyònèrè bàà baciina Nzambi bulelèlè, kabàyi bisàbaata ku makàsà, kàdi bapeta losà njila yìbìdi ku lumingu; bàdya misangu yìbìdi ku lumingu bwa kutwàla Èvànjeeliyò mu meetu ne bintu byà mùshindù awu, bwa kuMutwàdila bàna bààbò. Kàdi pèètù twibaka nzùbu yà miliyò yisambòmbò yà ndola, ne èkèleeziyà miikale ne madidiishi manène, à mmwenu milaaba mukubu, ne bikwàbò byònsò, ne kubitèèka pa cyòci aci. Kaa, nudi mene ne mfranga mipite búngi mu mùshindù wà ne misangu mikwàbò bàdi ne tusumbù twà disombeshangana mfranga mu èkèleeziyà yàbò ayi. Ncyà bushùwà!

147 Ngàngàbukà mwómò amu bwa kukenketa batangadiki bààbò anyi baampàndànjlà bààbò abu. Nènku muntu yéyè muswè kuya mu bwambi, bàdi bàmupìcisha ku diteeta dyà ngàngàbukà bwa kumòna ní ùdi . . . anyi kùdi ngàngàbukà wa mitù, bwa kumòna ní udi . . . kaa, pìikalaye ne mutù wèndè ne Cipidi cyà Dimanya mu cyòci, nudi numòna’s. Nyumà Mwímpè

ngudi ukenketa aci, kabyèna bikukèngela ngàngàbukà wa mitù to.

148 “Kàdi, mabanji ne kàyì dijinga ne cintu nànsha cimwè.” Kaa, bushùwà’s. Nudi ne mfranga yiyiila ne panshi. Ku mmwènekelu wa pambèlu, mabanji àyiila ne panshi; biikale ne nzùbu myalàbale, ne mmwenu myela mùkubù.

149 Ne bayiishi baakudi bàà dipòkò! Kaa, ekèlekèle. Ekèlekèle, ncinwambidì, hmm, mbaakudi bàà dipòkò. Bàdi mwà kwimana ne kuyiikila bufùku bujimà, kàdi kabàyi ne cidìbo bàmba to. Nwamònu anyi? Pàdìbo bajuuka. . . Ndi nswa kwamba ne mbwà bintu bivwà kabìyi bikèngela ne bàakule nànsha, nudi numòna’s. Bàjuuka kuulu, ne bimwè byà ku bintàkanyì abi, kàdi kwakula bwà *cikampànda* cikesè ne *cikansanga* eci. Nènkù’s nudi bamanyè mùshindù ùtùbi awu. Bimbi bàà misambu bàfuciibwa. Neyà bushùwà. Èyo. Kàdi, bàbanda mu cyambilu, bayiishi baakudi bàà dipòkò. Bòbò kabàyi balwàte nkooci wa kapelu ne nkoolù mujìngila mu nshingù, ne nkooci mwenza bu udi ne mukila pambidi, mòna’s, disangisha dyàbò didi didyùmvwà dyedìbwe màyi ku makàsà.

150 Ki bimbi bàà misambu abu bàpàtuka mwaba awu, bakàjì abu, ne nsuki mibèbula mishiya mìpì bu Izàbèlà, ne mùkubù kwìsù bùngì bukùmbane mwà kufiita ku cikùmbì. Pàdìbo ànu ne bàvwàlu nkanzu awu, bàdi bàvwàla tùpùtulu ne bilàmbà byà bantu balume, pèndè Bible mmwambè ne: “Mukàjì yèyè muvwàle civwàlù cikùmbànyìne muntu mulùme, ncinyangu ku mèsù Kwèndè.” Bènda bàpweka ne mùsèsèsù ne dyulu dyela muulu, mvùla yèyè mudidìnge mulòke mbafwànyine kwinyijibwa. Ba-Izàbèlà bàà bamanyè byònsò, beena dyambu, bàà cilunji cibànde! Ki bwà cinyi katwèna ne ditàbuluja to, ncinkunkutu cyà mitooyi yà byamu munkaci mwà didilakana.

151 Kaa, udi mwà kwikala ne dīyì bu mwàrkanjèlò, kàdi Nzambì neàkulumbùlwishè bwà bwalu abu! Ba Elvis Presleys ne bakwàbò, ne Ernie Fords, anyi ní ncinyi mene cidìbo bàbàbìikila aci ne mèyi malenga kàdi bàkwacila naawu dyabùlù mudimu, Nzambì mmwàmbe ne: “Nèmbalòmbewu.”

152 Ki bwà cinyi ntu nneemeka mpofò Fanny Crosby; mukàjì neebè kacya katùkù mwanji kupaanyisha dipà dyèndè ku maalu à buloba to. Mmushààle mudìlamine ne Nzambì.

153 Bààbùngì bàà ku bantu aba mbimbi bàà dipòkò, bantu baakudi bàà dipòkò, bantu banène, ne bikwàbò, pamutù pàà kukwàtabò mudimu ne dimanya dyàbò bwà Nzambì, dyabùlù mmubàkonyàngàje ne mbòbò abu kuntwaku munkaci mwà kumukwàcila mudimu. Bantu, bantu bàà ku bisanji ne ku tèlevisiyò, bàdisumbisha, kuntwaku bwà maalu à buloba pamutù pàà kudifila kùdì Nzambì. Bàmwè bààbò bàlwalwa mu èkèleeziyà, baya mu èkèleeziyà, bavwàle nkanzu munène mulenga, bàpatuka mwaba awu bìmba mùshindù awu, kàdi

bààlukila buludi bàkimba bindundadùndà dilòlò didi dilonda. Bù bimbi bààbwena batùdi bamanyè, bàà mu maèkèleeziyà kampànda, banji baàpatuka ne bàdikwacisha maafòtò, fòtò yà mu sèndemà ayi, bàpàtuka mwaba awu ne bìmba bidundadùndà. Banène bàà bidundadùndà, kàdi kulàka mukana kwamba mùdibò batèndeledi! Cintu's ndiyele dyà dyabùlù's!

¹⁵⁴ Muntu kampànda ùvwa ne ndambù—ndambù mukùmbane wa meeji mîmpè lwà kaaba aka. Ùvwa wàmba ne ùvwa ne cyà kwikala muiishi, kujuukaye mu dindà dyà dyàlumingu e kuyiisha, ne pashiishe kupwekayè kuntwaku mu...ne kufikaye ku tudyòmà kàdi kwimba misambu yà bidundadùndà ne bikwàbò byònsò byà bu nàku, ki ndekeelu wa byònsò kwangatayè cingoma ne kuditaayishaye bwòngò. Ndi nneemeka muntu awu bwà mwàkenzaye nàku. Ncyà bushùwà. Ncyà bushùwà. Ùvwa—ùvwa ne byàbùngì...Ùvwa ne luumvu lukumbàne ànu muvwabo naalù kùdi ngulube ayi, twamb'eku twamb'eku, pààkabwela dyabùlù munda mwàyì yàkapweka lubilu ku màyi ne kudikùpamù. Bàmwè bantu kabèèna nànsha ne byà bu nàku to.

¹⁵⁵ Ndi mumanye ne nudi...Ncyèna—ncyèna muswè kuumisha maalu nàku to, kàdi, mwanèètù wa balùme, mwanèètù wa bakàji, bikèngela—bikèngela kupoopela musonso bikolè bwà kuwùfikisha—kuwùfikisha ku dikwàta bikolè! Edi ki ditùkù ditùdimu ne mwoyi edi. Ngèèla meeji ne pìikalabi ne Yesù wàkabiikila Helòode ne “mukenge wà kale,” ne Yone kubàbiikila ne “lukòngò lwà nyòkà yà ntòòkà,” mbîmpè.

¹⁵⁶ Bàdi ne nzùbu myalàbàle, ne mmwenù myela mùkubù, bayiishi baakudi bàà dipòkò, bimbi bafuciibwa. Èyowà's, mukalenge. Cìdìbo naacimu ncinyi? Cìdi munda mwàci ncinyi? Kantu nànsha kàmwè kàà Nyumà Mwîmpè. Bajuuca kuulu muntwamu ne bàpàtuka ne bavwala tùpùtulu, kàdi bàbwela kàdi kwimba misambu mu kòralè. Wèwè mwena lubombo mukwàte luse wè! Èyowà's, mukalenge. Ncyà bushùwà.

¹⁵⁷ Ne wèwè, muiishi, wìkala mwà kuya mu disangisha bwalu bàdi bàkupèèsha mfranga yàbùngì kutàmba mùdìbo bafila mu mwaba mukwàbò! Wèwè mwenzàvi, kwèna mukùmbànyine bwà kwikala mu cyambilu to. Ncyà bushùwà. Mfranga! “Wèwè kùyì mwà kutùpèèsha binunu byà ndola *byàbùngì menemene* to, èè, katwèna mwà kulwa to. Bèètù—bèètù—bèètù balongolodi bàà ndongamu ne bikwàbò nebànji kulwa, wèwè mwà kukòokèsha mfranga ayi netùlwe. Mèmè nciyi mwà kupeta dyelangana dyà dibòko ne bantu bwònsò to, ncyàkulwa to. Bantu bwònsò kabàyi bàswè kungeela mu dibòko to (èkèleeziyà yònsò) bwà ngààfwàna kupeta mfranga yàbùngì bwà kujikija mabànza àanyi, ncyàkulwa to.”

¹⁵⁸ Mwanèètù, muntu wa Nzambi mulelèlè neàye pìikala Nyumà Mwîmpè mumulombole, nànsha kwikale cinyi mu milàmbù.

Byòbì bikèngela bwà kudyàye cisùkwítà cyà mukèlè ne kunwà màyi à ku mulonda. Ncyà bushùwà, yèyè's mmusadidi mulelèlè wa Nzambi.

¹⁵⁹ Kàdi bantu bàdi bàdiswika ku tudyòmbà ne ku bisanji ne ku tèlèvisiyò, ne bintu byà mìshindù yònsò byà pa buloba, mu mùshindù wa ne bikèngela kupetabo mfwalanga yà mùshindù awu. Ncyà bushùwà menemene. Nwamònu anyi? Aci kí n'Nzambi to.

¹⁶⁰ Yèyè ne: “Kaa, wèwè's udi mubanji, kwèna dijinga ne cintu nànsha cimwè.” Bushùwà, kàdi cintu cyena diinà cidì cikukèngela, kwèna naaci to. Ncyà bushùwà. Kàdi kùvwa mucìmanyè to. Nwamònu's: “Mubanji, kùyì dijinga ne cintu to.” Báfuciibwa bwà kwenza bidìbo benza, banaya twarta. “Kaa,” mùdì wamba, “tudi ne masangisha manène.” Kaa, bushùwà's. Èyowà's, mukalenge. “Disangisha ditàmbe bunène! Mòna's—mòna's, nudi bamanyè's, mulombodi wa cimenga ùtu ùlwa mu èkèleeziyà wetù.” Um-hum. Ncyà bushùwà. “Èè, udi mumanyè's, *Kampànda*, pàakafikàye mu cimenga, wàkalwa mu èkèleeziyà wetù.” Um-hum. “Tudi ne bantu bamanyìke bikolè bwònsò mu èkèleeziyà mwètù.”

¹⁶¹ Èyowà, kàdi bansantu bapèle, ne bakèngeledi bàbwelebi mu èkèleeziyà, bàdi kadiwu kunùdì. Kanwèna nànsha babàswèmu to. Nudi ne bwòwà bwà ne muntu kampànda neàmbe ne “Amen!” panùdì munkaci mwà kuyiisha.

¹⁶² Byenze bu inàbànzà mukesè mwena bwalu bungàakabala musangu kampànda mu mukàndà mukesè kuntu kwaka, wàkabwela mu èkèleeziyà kampànda. Bàna bèndè, ùvwa mubàkoleshile mu èkèleeziyà wa cyena kale lwà mu meetu mwaba kampànda mùvwàbo bulelèlè bàà difwàna dyà Nzambi. Pa nàнку ki. . .Nsongàalùme kampànda kubwelamù dīngà ditùkù e kusèlayè nsongàakàjì awu. Yèyè ne ùvwa wa mu èkèleeziyà wa *pambèlù*, nudi bamanyè's, umwe wa ku èkèleeziyà minènè yà dīngumba dīm̀wèdīm̀wè adi lwà mu cimenga amu. Ki kwambilayè maamù ne ùvwa mwena Kilistò. Ki kusèlayè mwanèndè wa bakàjì ne kukwàta njila kuyayè nendè.

¹⁶³ Èè, ndekeelu wa byònsò kuumumushishaye mu èkèleeziyà mukesè wa kale wa ku cisuku mu mikùnà amu, kupatukaye mwab'ewu, ku èkèleeziyà munènè menemene, wa dīnà dīm̀wèdīm̀wè adi; kàdi mwitu mwamwà bàvwà ne Nyumà Mwimpè, pambèlù apa kabàvwà ne cintu nànsha cimwè to. Ki dībà adi pàakabwelàbo, mu èkèleeziyà munènè menemene mulenga ewu.

¹⁶⁴ Ki Maamù kwambayè, dīngà ditùkù ne, ùvwa ùlwa bwà—bwà kumòna mwanèndè wa bakàjì awu. Èè, kudyèbejabò menemene mùshindù ùvwàbo mwà kupita nendè. Pa nàнку pàakalwàye ùvwa ùmwènèka bu cintu kampànda cyà mu mukàndà wà biikùlùkuuku, ne nkanzu yà nshingù mile, yà

mikesè ayi, nudi bamanyè's, yà mabòko male, ne yèndè nsuki mipingaja paanyimà apu, ne kwisù kwengelela bu ditungulù dipeya, mùshindù awu (mikoka paanyimà, nudi bamanyè's). Ke kupwekayè, ne kwamba ne: “Èè, Àlèluuyàh, munanga wanyì! Nudi bishi nwènu bwònsò?” Èè, yèyè ne: “Mpindyewu, mu dindà pààmù emu n'dyàlumingu.” Yèyè ne: “Nwènu bwònsò nenuyè mu disangisha, kî mmwômò anyi?”

¹⁶⁵ (Bàyendè wa mwànà kwamba ne: “Netwènzè nendè bishi?” Yèyè ne: “Katwèna mwà kuya nendè kuntwaku mùshindù awu to!” Ki yèyè ne: “Èè, ncyèna mumanyè cyà dyenza to.”) Èè, yèyè ne: “Maamù, ndi nkwambila's, twètù. . .”

¹⁶⁶ “Kaa,” mwàkambaye, “kàdi, munanga wanyì, ncyèna mwà kupùmbisha èkèleeziyà to. Ncyà bushùwà ne kùdi èkèleeziyà *kampànda* mwab'ewu.” “Kaa,” nsongaàkàjì. . . mulùme kwamba. . . Yèyè ne: “Ndi mumòne mukwàbò lwà mu disangu mwàmwa, nènyè ànu mwômò amu.”

(Ki yèyè ne: “Kaa, èè, nebikengelè ànu bwà twètù kucyènza.”)

¹⁶⁷ Nànku pààkabwelabomù, kwanjibo kumulekela yèyè kubwela dyàmbedi, (Nwamònu anyi?) bamuumvwa bundù. Ki yèyè udi usambuka mùsèèsù awu ne jipè wendè mukesè awu, nudi bamanyè's, ne Bible wendè mu dyàpà. Èè, mwanèètù, mmufwànyine kwikala kàyì ne dìnà dyèndè difùnda mu *Baa Lwàkamanyabo* to, kàdi ndi ndifwànyikijila ne yèyè ùvwa ne dìnà dyèndè mu Mukàndà wà Mwoyi wà Mwànà wa mùkòòkò. Ki civwa cintu cyà mushinga ncyòci aci.

¹⁶⁸ Pààkabwelaye mu èkèleeziyà wàkashikamina lwà paanyimà apu, kupetaye wendè nkwasà, nudi bamanyè's, ne kukangula Bible ne kubangayè kubala. Nènku ke bantu bwònsò kubanga kukènzakana, bàdyàmbedila ne muntu kampànda wa kale ne kalèèle ùvwa mupàtùkile mwaba kampànda. Bàkènzakana mùshindù awu ne: “Kaa, ekèlekèle!” Bwònsò bavwàle bilàmbà byàbò bilenga, nudi bamanyè's, cimfwànyì cyà beena Laòdikiyà, ne nkanzu yàbò milenga ne bikwàbò. Bèèla mèsù paanyimà e kumònabò maamù mukesè ewu musòmbe mwaba awu, ne mimwemwe yà dikèma kwisù kwèndè aku, nudi bamanyè's, munkaci mwà kubala Bible. Èyowa.

¹⁶⁹ Nènku mpaasàtà, paanyimà pàà katanci, paanyimà pàà bamanè kupicila mu bintu bikwàbò byònsò abi, ki yèyè ndekeelu wa byònsò, ùvwa ne tusunsa tutwè ku dikumi ne tùtaanu bwà kwakula. Ki kujuukaye e kwamba ne: “Mukalenge mmmwìmpè.”

¹⁷⁰ Maamù ne: “Nzambi àtumbè! Ncyà bushùwà! Àlèluuyàh!” Ki bantu bwònsò kwololabu nshingù bu nyuunyì yà ntuubà, bàkènzakana ne: “Ùvwa nganyì awu?”

¹⁷¹ Ki pashishe paanyimà pàà katanci, kwambayè ne: “Uhm! Uhm! Uhm!” Yèyè ne: “Beena Kilistò mu cikondo ne cikondo

cyònsò bàvwa ne cyà kwikala beena Kilistò bàà bukitù, banène ne bimpè,” anyi cintu kampànda cyà mùshindù awu.

172 Yèyè ne: “Nzambì àtumbè! Ncyà bushùwà!” Ki bòbò bwònsò kukènzakana.

173 Ki yèyè ne: “Uhm!” kwoshayè kasùmbù kèndè kàà balami aku dísù.

174 Ke kasùmbù kàà balami kuumvwakù cìvwàye ùswa kwamba. Kuyabo paanyimà apu ne kukwàtabò mukàjì mukèsè ewu ku dibòko ne kumwelabo pambèlù pàà ciibi, bàmba ne: “Wèwè udi wimanyika mpaasàtà.”

175 Nudi bafwè kàdi kanùyì bacìmanyè to! Èyowà. Kaa, mmushinga kaayi ùdi naawù madìdiishi ènù à mmwenù myalabala awu? Bibàsà byènù bilamika myòsà abi mbyà bwalu kaayi? Ne disangisha dyènù dinène adi ndyà bwalu kaayi? Nuyààya ànu buludì mu ifernò, ànu mùdì kandìndì kàya ku diswa dyàkù amu. Bwalu wèwè kùyì ne Nyumà wa Nzambì to, udi mujìmine! Wèwè kùyì mulediibwe cyàkàbìdì kwèna mwà kumòna Bukalenge bwà Nzambì to.

176 Aci cidi ne bululu. Mbyenze bu pàmvwà ne ciibidilu cyà kunwà màfutà à mùdyàntondo, mvwa ngàmba ne: “Maman, kcyèná mene mwà kuàtwàla to.”

177 Yèyè ne: “Wòwò kàyì makuumvwija bibi to, kaàkukwambulwisha to.” Nàнку ndi ngèèla meeji ne ke mùshindù awu ùdi Eci, kàbìdì.

178 Kaa, bu wèwè mwà kwakula naabò! Kaa, nzùbu minène, milenga, ne bikwàbò. Kaa, bòbò—bwòbò—bwòbò . . . Paùyaaya mu èkèleeziyà wabò, udi mwà kufika ku dyamba . . . Ndàaku ànu mu èkèleeziyà wabò wambe ne: “Èè, ndi nkwambila’s, wèwè udi mwena Mpenta anyi?”

“Kaa, èyowà. Uh-huh. Bushùwà’s, twètù tudi beena Mpenta.”

“Udi witabuujà mu kulediibwa kwà cyàkàbìdì anyi?”

“Èyo.”

“Èè, ndi muswè kukuleeja cintu kampànda . . .”

179 “Kaa, tàngila nzùbu ewu! Udi mumanyè mùdì kwibaka . . . búngì bwà mfranga yìdì nzùbu ewu mudyè anyi? Ncìtùdila byà binaayi bisàtù byà mùllyò wa ndola bwà kwimanyika cintu eci. Nudi bamanyè’s, pa ciibidilu katùvwa nendà mùshindù awu to. Tuvwa—tuvwa ne ciibidilu cyà kwikala lwà kwinshì kwà kajila kakesè kwàka.” Um-hum, kàdi kènzakana, udi ujàndula bintu byònsò binène bidìbo naabi ebi. Èyowà’s, mukalenge. Ne pashìishe bwòbò bàdì bàmba ne: “Kaa, twètù—twètù’s tudi ne bintu binène byònsò ebi!” Kàdi kabèèna ne bujitu bwà misùukà mijimine to! Mbaswè díbà dyònsò kukuleeja búngì bwà nzùbu yidìbo naayi. “Tàngilà búngì bwà bèètù bantu bàà mu kàlaasà

kàà Dyàlumingu, búngì bùdibu mene!” Bìdi ne dikwàcisha kaayi pìikalàbo kabàyi ne Nyumà Mwímpè? “Babanji, babanjike bikolè, kabàyi dijinga ne cintu nànsha cìmwè.”

¹⁸⁰ S’ki cyàkambàYe ne: “Udi wela meeji nàнку, kàdi kùyì mumanyè ne udi mupèle, mukengeledi wa luse, mwena dikènga, mpofo, butakà. Kàdi kùyì mucimanyèkù to!” Nwamònu anyi? Ki cyòci aci.

¹⁸¹ Kaa, bushùwà’s, bàdi bàmba ne: “Udi mumanyè mùdi bwalu anyi? Tuvwa ne ciibidilu cyà kwikala. . . Kààèkèleeziyà kakesè katùvwà ne ciibidilu cyà kusambidilamù kàdi lwà paanyimà pàpa, ewu ke munène udikù mpindyewu!” Kàdi ndi nnwàmbila ne, kakùyìku bujitu bwà misùùkà nànsha, kàdi bikèngela bwà kumòna ne bàdi batabaleela bintu byònsò ebi. Dyambulwisha dyà bainàbànzà, ne bintu bikwàbò byònsò ebi, bikèngela bàbitabalèèle byònsò, kàdi nànshapu bujitu bwà misùùkà mijimine. Kaa, mulùmýànà wa yaààyyà, mmu cinyi—cinyi mùdi èkèleeziyà ewu mukadìsangane’s wè!

¹⁸² Kabàvwaku ne bujitu bwà misùùkà to, kàdi bwàbù bùvwà bubàtonde ng’ànù bwà mabanji. Ncyà bushùwà. Bàvwa ne bujitu bubì. Bàvwa ne bujitu bwà mabanji ààbò kàdi kakùyìku bujitu bwà misùùkà mijimine nànsha. Mufùndu mmwambè ne: “Kabàvwa bamanyè ne bàvwa bakèngedeledi bàà luse to,” (Kaa!) “beena dikènga, mpofo.”

¹⁸³ Bàvwa bàdyàmbidila ne bàvwa mwà kwangata mfranga bwà kukùdimwisha bàà pa buloba micimà. “Kaa, bu twètù mwà kukùtula ndongamu, mutùdi mwà kupeta mfranga yàbúngì kaaba aka, ngèèla meeji ne tuvwa mwà kukùdimwisha bàà pa buloba micimà. Bu bàmwè bàà ku bantu babanji bàà mu èkèleeziyà wetù, Mwanèètù Branham, twètù ànu mwà kubàfikisha kудisanga kantu, nènku ndi ngèèla meeji ne tudi mwà kubanga kasùmbù kàà kafwànyine—kàà kafwànyine kuya buloba bujimà ne—ne kukùdimwisha bàà pa buloba micimà. Tudi mwà kwangata ndèkè ne kukùpa mikàndà yà dibala mu Àfrikè mujimà, ne bintu byà mùshindù awu. Bu twikala ànu ne ndambù wa mfranga!”

¹⁸⁴ Mwanèètù, bàà pa buloba kabààkukudimuna mucima ku mfranga to. Bàà pa buloba nebàkudimune mucima ku Nyumà Mwímpè; diyiisha dyà bukolè dyà Nyumà Mwímpè ne Nkùrusè ke bìikala cintu cìmwèpelè cyàkudimwisha micimà yà bàà pa buloba. Ndongamu wa Nzambì kí ngwa mfranga to. N’Nyumà Mwímpè, ki cidi ndongamu wa Nzambì bwà Cikondo cyà Èkèleeziyà wa Laòdikìyà anyi cikondo cikwàbò kanà cyònsò cyà èkèleeziyà. Èyowà’s, mukalenge.

¹⁸⁵ Mbaswè Nyumà Mwímpè. Kaa, bàdi bàmba ne: “Twètù tudi. . . tudi ne ngòlò.” Cìvwa ngòlò, èyo, kàdi kí ngwa mùshindù mwímpè to. Bàvwa ne ngòlò búngì kabùyì kwamba kàdi kàyì wa mùshindù mwímpè to. Mpindyewu, nàнку Yesù kubàtumina

díyì ne: “Ndi mumanye ne nudi babanji, ne biikàle ne ngòlò, ne kanùyì dijinga ne cintu nànsha cimwè,” kàdi:

Ndi nkubela bwà kulwa kusùmbà kùndi ngòlò muteeta mu kapyà, . . .

¹⁸⁶ Ngòlò wa mùshindù mushiilàngàne, èyowà’s, ngòlò udi muteeta mu cikùtù cyà kapyà awu, wàkápìcila mu kapyà kàà lufù, wàkápìcila ku Kálvariýò, kupatuka awu.

¹⁸⁷ Ngòlò wabúngì unùdì nendè mpindyewu mmubwicidile, neàdiike kùdì kamunguji, neàkwatè dimòmènà. Bu nwènu mwà kufùnda eci, Yakòbò. . . Yakòbò Munsantu 5:1 too ne ku 4, nènku nenùmvwè cìdici, mmwambe ne: “Ndaayi, nwènu bantu babanji, mpindyewu ku dilwa dyà Mukalenge, dilàayi ne nùtwe mikèmu bwà makèngà ènù àdi ànukwata, ngòlò wenù mmukwàte dimòmènà munda mwènu.” Nwamònu’s, awu’s ki mùshindù wà ngòlò utu ukwàta dimòmènà.

¹⁸⁸ Kàdi ngòlò udi Yesù ufla n’Nyumà Mwîmpè, Maanyi à ngòlò à Nyumà, apongoloka munda mwà mwoyi wèbè. Nènku—nènku, kaa, ekèlekèle: “Ndi nkubela ne, lwà ùsumbè ngòlò kùndi, pawikalà muswè kulwa mubanji.” Kaa, èyowà.

¹⁸⁹ Kàbìdì, bàvwa “mpofo.” Mpindyewu, mùshindù awu ke mubì wà kwikala’s. Ncyèna ngèèla meeji ne beena Kilistò aba bàvwa bafomijiibwa mu kaabujimà to cìvwàbo bàvwa “beena mèsù bitaayitaayi.” Ngèèla meeji ne mmèsù bitaayitaayi. Cintu cìmwèpelè cìvwàbo mwà kutàngila cìvwa nku nzùbu yàbò minène ayi. Cintu cìmwèpelè cìvwàbo mwà kutàngila nku disangisha dyàbò dinène adi. Cintu cìmwèpelè kuvwàbo bàtàngila kùvwa nku kòralè mulengeja bìmpè ne mìzàbì yàbò yònsò ne bikwàbò. Ngèèla meeji ne bàvwa ànu ne mèsù bitaayitaayi, kabàvwa mwà kumòna kule to, bìvwa bikolè. Ncyèna ngèèla meeji ne bàvwa mpofo to, bàvwa ànu ne mèsù à bitaayitaayi. Cyònsò cìvwàbo mwà kumòna cìvwa wabò. . . “Èè, nudi bamanyè mùdì bwalu anyi? Twètù tudi beena *Cikampànda!*” Màngumba ààbò manène, misùmbà yàbò minène ya bantu, bidimba bùngi cyanàànà, kàlaasà kààbò kàà Dyàlumingu, nzùbu yàbò milenga.

¹⁹⁰ “Kàdi bàvwa dijinga ne Nyumà Mwîmpè,” mwàkambà Yesù. Bàvwa bàjinga Nyumà Mwîmpè! Ki Mukalenge kubàmbila ne: “Disù. . . Panwikala. . . ne mèsù mabi nànu, ne nudi biikàle ne mèsù bitaayitaayi be mu mùshindù wà kanùyì mwà kumòna kantu nànsha kàmwè ànu nzùbu wènù munène ewu ne disangisha dyènù dinène edi, ne yènù. . . mulombodi wa cimenga ne bwònsò bàlwalwà mu ekèleeziyà wenù, nènku nudi ne bantu bàà luumù. Kàdi nudi bampwè Mémè mwoyi. Kàdi panwikala bafomija mùshindù awu, ne mèsù ènù miikale manyanguke mùshindù awu, Nènnùsùmbìshe bwanga kampànda bwà mèsù.” Èyowà.

¹⁹¹ Nwamònu's, bìdi bikèmesha bwà balongeshi bàà bunzambi abu kabàyi nànsha ne cimwè cyà ku byòbi abi to, kí mmwómò to? Bàvwa ne mànànanshì búngì cyanààna, bàvwa ne tèòlòjí búngì cyanààna. Kàdi bàvwa dijinga ne bwanga bwà mèsù, Nyumà Mwímpè wa Nzambi, bwà kufiita pa mèsù ààbò ne kubàfikisha ku dindila dyà dilwa dyà Mukalenge, kubàfikisha ku ditàngila ku Bible, kubàfikisha ku ditàngila ku Dìyi. Mbamanyè mwà kwamba ne “ah-man” ànu mu yéyè menemene. Bàvwa ne manànanshì, bàvwa ne maanyi à mshindù yònsò. Kàdi: “Bàvwa dijinga ne bwanga bwà mèsù,” mwàkamba Mukalenge. Yéyè ne: “Nudi dijinga ne ndambù wa bwanga bwà kulaaba pa mèsù ènù, ne nebùàkangule.”

¹⁹² Mvwa ne ciibidilu, pàncìvwà mwànà mukesè wa balùme . . . Nkaadi mulonde bwalu ebu, ngèèla meeji, ndi mufwànyine kwikala mubwàmbe ku èkèleeziyà. Eci ncyèci cìndwila mu meeji mpindyewu. Ntu mukolèle mu mikùnà yà mu Kentucky mwàmwa, ndambù, nènku tuvwa basòmbèle mu nzùbu wa kale wa mabaya. Maamù, ewu . . . Ne tuvwa ne—tuvwa ne kaaba kakesè lwà kuulu aku, ne tuvwa ne matèlà à—à bisoosà. Ne pashiishe pamutù pàà matèlà à bisoosà awu apu pàvwa cibwikilu cyà boyà. Ncyèna mumanye ní nudikù bamanye cibwikilu cyà boyà ncinyi anyi to, anyi bulààlu bwà bisoosà; bulààlù bwà kale, tuvwa bapèle bàà dikèma. Papa ne maman bàvwa bwòbò ne bulààlù mwinshì amu. Nènku tuvwa tubàndila kuulu aku ku kaacibandilu kakesè ne tufika ku lusongo aku, nènku maman ùvwa mwà kutèèka, yìmwè—yìmwè—yìmwè misangu, cipese cyà ntenta lwà pa cibwikilu apu ne bikwàbò, bwà kutwèpula ku . . . Nudi bamanyè's, nudi nwimana . . . udyàdija mwaba awu ne ubadila mitootò mu mpùngà yà mabaya à kale awu amu bisambakane ne bukènkè bwà ngondo, nudi bamanyè's, nènku kwikale masosò manène mu mùsongà amu mùshindù awu.

¹⁹³ Nànku pàvwa nêjè mifwànyine kulòka anyi cikampànda, anyi mvulà udìtuuta, twètù bânà batekète tuvwa bafwànyine kudìbunya mwínshì mwà cipese cyà ntenta eci—eci, nudi bamanyè's, bwà kulama abu . . . bwà ne katùlù kubola to. Nènku yìmwè misangu nkwaka wa lupeepà lùvwà lupìcila mu masosò awu, tuvwa—tuvwa—tuvwa mwà kukwacika cimpumpu ne mèsù ètù àlamakana. Nudi bamanyè's, àshààla wònsò malamakaja kuulu aku kùdi mashika, mashika malamàkàje mèsù ètù. Nànku maman ùvwa mwà kutùbìikila mu dindà ne: “Tuulukààyi.” Mvwa mufwànyine kwamba ne: “Ncyèna mwà kutùluka to, maman, bwalu mèsù àànyì mmalamàkàne.” Ndi ne—ndimù ne mpotà, nudi bamanyè's, mashika kacya àlamakaja mèsù. Kùyiku mwà kukòokèsha kuàkàngula to, nudi bamanyè's. Mwànà mutekète menemene mulààle mwaba awu, ne mèmè ne Humpy ne bakwàbò tuteeta bwà kukangula mèsù ètù kàdi katùyiku mwà kuàkàngula to, mafofòmìjìbwe.

194 Kaakù wanyì muntu mulùmè ùvwa cilembi mwedi wa matèyi, ùvwa ùkwata nshimbà, tusengela nshimbà. Nènku aci ke cìvwa bwanga bwònsò bwà lwondapu kwètù kembèlù, cìvwa mmáfutà à nshimbà. Bisàbaatà tuvwa tubìfiita mafutà à nshimbà. Nènku wèwè mwikale ne lukoso lwà lwòshà pa muminu, bàdi bèèlamù ndambù wa térébinthine ne ànu, èyowà, bikukèngela ùbimine, nàнку, bwà lukoso lwà lwòshà alu.

195 Nènku dìbà adi pàvwa mèsù ètù wònsò makàngiibwe, maman ùvwa mwà kwangata cintakanyi aci. . . “Èyo, indilaayi kakesè, bananga bàànyì.” Ùya lubilu mu cìkukù wàngata dikopo dinène dyà mafutà à nshimbà awu ne uatèèka mwaba awu, ne uasabisha menemene. Nènku ubanda bwà kutùfiitawù pa mèsù, nwamònu’s, too ne muvwàwu àkwàta mudimu. Nènku paanyimà pàà katanci ndyumvwaku bu ne mvwa mwà kumòna, nkangula mèsù. Ngangata. . . Mafutà à nshimbà ki àkaakàngula.

196 Nènku ndi nzwambila ne, tudi bapete nkwaka wa mashika wa wenza bwòwà’s! Nwamònu anyi? Kùdi mashika à enza bwòwà àdì mapite mu ditùnga. Ba-Baptistes bàakamba ne: “Matùkù à bishimà àkaadi mamanè kupita. Cintu pàaci ne n’Nyumà Mwímpè kacitukù to, ne dyakula dyà mu myakulu kaditukù to. Kakwènakù dibàtiiza mu Dìna dyà Mukalenge Yesù to.” Nènku, kaa, nkwaka yà mishindù kanà yònsò, ne mmikange mèsù àbùngi ne mashika à nyumà à mùshindù kampànda. Nebikèngele cyà citàmbe máfutà à nshimbà awu bwà kukàngula mèsù awu, mwanèètù. Nebikengelè dibàtiiza dipyadìpyà dyà Nyumà Mwímpè. . . ? . . . bwà kufiita pa mèsù ènù nènku nudi mwà kumòna, kuumusha butaayitaayi abu pa nwènù bwà nwamòna mwà kumòna Dìyi dyà Nzambi ne ndilelèlè. Ncyà bushùwà. Kaa: “Ndi nñubela bwà kulwa kusumbà ndambù wa bwanga bwà mèsù k’Ùndì, bùdi mwà kulaaba máfutà pa mèsù ènù.” Bwà nwènù. . . Bwà. . .

197 Balongeshi bàà tèlòlòjì bàdi ne yàbò. . . tèlòlòjì yònsò, ne manànanshi ààbò ne bikwàbò, kàdi bìdi bikèngela cyà citàmbe aci. Bìdi bikèngela Nyumà Mwímpè bwà kufila cikèènà-kumòna cyà nyumà bwà kumòna mùdì makolè à mu Dyulu àkwàta mudimu. Nyumà Mwímpè, bwanga bwà Nyumà Mwímpè! Bwanga bwà mèsù mmáfutà à luuyà, aci tudi bamanyè, nènku dìbà adi Nyumà Mwímpè ke Máfutà à Nzambi.

198 Ne tèlòlòjì yònsò ne manànanshi byà ne: “Kaa, mwanèètù, munanga, wèwè udi ànu bímpè. Kakwèna cilema bwà. . . Byònsò mbímpè. Èè, tudi ne èkèleeziyà mutàmbe bunène udikù mu cimenga.” Awu manànanshi kaàkwenza bwalu to! To, mukalenge! Neàkufikishe ku dimwenena ànu lwà *apa* (mèsù à bitaayitaayi) wàmba ne: “Èyowà, tudi ne èkèleeziyà mutàmbe bunène.” Kàdi bishi bwà Cilumbulwidi cilwalwà piikala Nzambi mwà kunùlumbulwisha, nwènù bidimba byà èkèleeziyà wa Laòdikiyà?

199 Ncyèna ngàmabila nangananga bàdi kaaba aka to, kàdi ndi pa mukàbà wà mèyi ne ùyaaya pa buloba bujima, nudi numòna's, pa nàнку ndi ngààkula kùdi miliyò yàbùngì yà bantu katàtaakà, nudi numòna's.

200 Nàнку díbà adi ki cyôci. Laòdikiyà! Civùmvù! Mutwè cìmpìngà! Wa mèsù à bitaayitaayi! Ncyèna mumanyè bikwàbò byònsò to. Tumpundu's wè! Kampundu ncintu cisopakaja, kakèena ne luumvu lwimpè to twamb'eku twamb'eku. Kàdi paùdi wakula naaku, kàdi kàbàwula maci ààkù manène awu, kenza ne: "Hin! Han! Hin! Han!" Kakàtukù ne kalolo to. Kòkù nkasopakaja, kàdi pankaci pàà kabalù ne mpundà. Ki lutatù lùdiku mpindyewu, nudi nutèeka beena Nikàlàwò ne beena Laòdikiyà pàmwe, ne nudi nupeta mpundà cyàkàbìdi. Cìdi citùkèngelà... Ncyà bushùwà. Ki mbamanyè to. Wèwè udi ùbàmabila bwà dyondopa dyà kùdi Nzambì, dibatiiza mu Dìna dyà Yesù. Bàdi bàmba ne: "Hin! Han! Mpaasàtà wanyi kàtu... Hin! Han! Twètù katùtu twitabuuja aci bu ba-Presbytériens to." Binyònga's nwè! Aci's ki mùshindù unùdi mwà kucìbìikila...?...

201 Ncìtu munange kampundu to. Kàdi ncinwambìdi, ntu munange kabalù kimpè, kapòlòbele kakuna ku dikàsà, balumyànà, udi mwà kukàlongeshaku cintu kampànda. Udi mwà kukàlongesha mwà kwinama, ne mwà kuditwala mu cipalu cyà manayi, ne kenza biswa kupetangana ne mùdi muntu mwà kwenza, bwalu kòkù kàdi... nkamanyè cintu kampànda. Kàdi ne mudìbu. Kampundu kì nkamanye tatwàkù anyi mamwàkù ne nganyì to, ne kakèena mwà kulelangana kòkù kiinè to. Ki mùshindù ùdìbi ne màngumba à kale, makwàte mashika, à mmwènekelu wa kwìsùkwìsù aa, kaèna mwà kujuukuluka kàbìdi to. Pàdi ànu èkèleeziyà ne wàshàadi dingumba, wàmanyi kufwà! Kàadyàkujuukaku kàbìdi to. Ncinyi aci? Mmusopakaja!

202 Martin Luther ùvwa ànu bimpè, kàdi pàakadivwijaye bulongolodi cyàkenzàye ncinyi? Ba-Méthodistes bàvwa bimpè, pàakadivwijàbo bulongolodi cyàkenzàbo ncinyi? Mpenta ùvwa bimpè, kàdi panwàkadivwijà bulongolodi cinwàkenza ncinyi? Nwakacisopakaja, nwakacisopakaja kucìbweja mu èkèleeziyà wa Kàtòlikè wa cyena Nikàlàwò. Ànu menemene cinwàkenza's! Kwangata mùshindù wèndè wà dibàtiiza, kwangata ngenzèlù yèndè ne byenzedi, pèndè Bible mmwambe ne: "Wèwè udi mwànà wa bakàji wa mukàji wa masandi, ndumbà. Mwànà wa bakàji wa bandumbà!" Cyà bushùwà menemene!

203 Kabalù kimpè kakuna ku dikàsà, èyo, nkàà kalolo. Kaa, nkimpè, ntu mukànage. Kàdi kakwambika mutù pa makaaya, kananga, kàà musangeelu. Bwà cinyi? Nkamanyè ne tatwàkù nganyì, nkamanyè ne kakwàkù mulùme nganyì, nkamanyè ne tatwèndè wa kakwàkù ùvwa nganyì. Kàdi mwà kwalukila paanyimà buludi, nkamanyè mudìbù wàkù.

204 Nènku ntu muswè kumòna mwena Kilistò mulelèlà mukuna ku dikàsà! Kí mmwambùle mukàndà mumufundila: yèye m'Méthodiste lumingu lushààle, ne Baptiste elu lumingu, ne mwena Mpenta elu lumingu, ne m'Pèlèrin de la Sainteté lumingu lùdì lùlonda. Kí mmumanye ne papa wendè nganyì anyì ne maman wendè nganyì to. Kàdi lekèlaayi nnwāmbilèku, muntu udi mulediibwe kùdì Nyumà wa Nzambì ùdi mwà kukwangata too ne ku Ditùkù dyà Mpenta; ùdi mwà kukwambila mudibu wendè, ku mpenta! Amen! Ndi muswè kwikala mpenta awu kuumukila ku lusukì lwànyì too ne mwinshì mwà makàsà. Ncyèna ngàmba Mpenta wa cyena dīgumba to. Ndi nswa kwamba bukolè bulelèlà bwà Kilistò mubiike ku bafwè, Dibènesha dilelèlà dyà Mpenta.

205 Bwanga bwà mèsù, bukangula mèsù èbè mu mùshindù wà ne tudi mwà kwela mèsù paanyimà ne kumòna kùdici cifùmìne. Wèwè muswè kumòna cidì èkèleeziyà leelù ewu; èlà mèsù paanyimà umòne kùdiye mufùmìne, pashìishe tūngunuka ne kuya mutàngile kùdì Nzambì, neùye kule naaci. Èyowa's, mukalenge.

206 Èyo, ndi mumòne cikwàbò cintu, mmwāmba ne: “Bàdi butakà; butakà kàdi kabàyi bacimanyè to.” Bushùwà.

207 Kaa, butakà kàdi kabàyi bacimanyè to. Mpindyewu, muntu awu ùdi mu ngiikàdilù wa dikènga, muntu yèye mukèngeledi wa luse, mpofo, mwena dikènga, butakà. Mpindyewu, yèye—yèye mucimanyè, neàdyenzejèku; kàdi yèye kàyi mucimanyè to, mukwacikwètù awu's mmufwè mu lungenyi. Ncyà bushùwà anyi? Yoyòyò! Aci's civwà cyà mùshindù mukolè wà kacya. Mufwè mu lungenyi, kí mmumanyè cyàdyenza yèye mwinè to.

208 Wèwè mumòne muntu wènda upweka ne mùsèèsù, mupèle, mwena dikènga, mpofo, mukèngeledi wa luse, ne butakà, kàdi wèwè kwamba ne: “Mwanèètù, udi butakà.” “Kaa, ndi butakà anyi? Kaa, Kaa, mwanèètù, nkwàcishèku mu mwaba kampànda, nkwàcishèku bwà mvwàlè bilàmbà.”

209 Kàdi uya mutàngile kùdiye aku wamba ne: “Amba tūng, wakapeta Nyumà Mwimpè kacya wítabuuja anyi?”

210 “Cyùdi wèwè ewu ncinyì, munsantu mubùnguluki wa mu malaba anyi? Èè, ambà tūng, cyùdi uswa kwamba ncinyi? Kùpimi kungàakwisha mùshindù awu to, mèmè ndi Presbytèrien, ndi Baptiste, ndi wa mu *cikampànda* ne *cikansanga*.”

211 Butakà kàdi kàyi mucimanyè to! Mpindyewu, kacya kí mmèmè utukù mwambè nàнку to, Bible ngudi mwambè cyòci aci bwà cikondo eci ne: “Butakà kàdi kàyi mucimanyè to. Lwàku ùsumbè ndambù wa bilàmbà Kùndì,” mwàkambà Ye.

... civwàlù citòòke...

Civwàlù citòòke ncyà Bansantu; mbwakàne bwà Bansantu. Nwamònu anyi?

212 Butakà? Kaa, bushùwà's! Èyowà's, mukalenge! Kaa, wêwè udi wamba ne: "Mwanèètù Branham, awu kî ng'èkèleeziyà wetù to, wetù ki èkèleeziyà udi muvwàdika mvwadilu mutàmbe bwîmpè mu cimenga!" Bwà aci ncyèna mwà kucyèla mpatà to; yimwè yà ku myòdelè yà ndekeelu, bintu byà bitàmbe bwîmpè, bivwàlù byà ndekeelu byà balumyànà bende luumù bàà mu Hollywood, bitàmbe kwikala byà bisalulangana masandi bifwànyine kukoka ntèmà yà muntu yònsò mu mùsèsèsù. Uh-hum. Bushùwà.

213 Inàbànzà kampànda kungambila, wàmba ne: "Mwanèètù Branham, ke cyùdi uswa kungambila aci anyi? Mpindyewu, tutu tusumbà nkanzu eyi mu makàjiinyi nènku kî cyònsò citùdi mwà kusumbà."

214 Mémè ne: "Bàcidi ànu basumbisha bilàmbà bijimà ne benza màshinyi à bilàmbà. Bwà apu kwenaku ne pàà kubingila to."

215 Bible mmwambè ne: "Ewu yònsò udi utàngila mukàji bwà kumwalakana ukaadi mwende nendè masandi." Mmwômò anyi? Èè, díbà adi, mukàji yéyè muvwàle mvwadilu wa usalulangana masandi ne ukaditádika kumpàla kwà mulùme, udibù ne cyà kudyula bwà bwalu abu nganyi? Mmukàji awu, yéyè ngudi mucyenze. Ncyà bushùwà menemene.

216 Mpindyewu, udi mufwànyine kwikala mukezùke bu cilòngò cyà mbata kùdi bàyebè. Udi mwà kwikala nsongààkàji wa citende utu kacya kùyì mwenze cintu cibi mu nsòmbelu webè to, mwikale virgo pawàkasèdiibwa kùdi bàyebè. Kàdi wèwè muvwàle mùshindù awu ne mufikishe balùme ku dikutàngila mùshindù awu, mulùme wa bwena awu mmumane kwenda *neebè* masandi mu mwoyi wèndè. Ngènzàmpèkààtù uvwa mukutàngile awu. Bu mwena Kilistò udi mwà kwikala ne bilàmbà bìdi bikosa mu mùshindù mutàmbe bwîmpè mu cimenga, byà bitàmbe bwîmpè byà myòsà yà mùkòòkò, kàdi kî mbyàkàne bwà Munsantu wa Nzambi kuvwàlaye mùshindù awu to.

217 [Katùpà kàà mukàbà wà mēyi munda mutupù—Muf.] Kaa, èyowà's, kî mbyàkàne bwà mwànà wa Nzambi to.

218 "Kaa, to," mùdìbo bàmba. Èè, bàdi bàmba ne: "Èkèleeziyà wetù. . ." Wèwè's udi muvwàle bilàmbà bìmpè's? Bàakamba ne bàvwa bavwàle bìmpè. Bàvwa "babanji, kabàyi dijinga dyà cintu nànsha cìmwè." Bushùwà. Mòna's, bàdi bàmba ne: "Nànsha mpaasàtà wetù utu upàtuka ne mùzàbì munène menemene pambidi. Kòralè yònsò utu upàtuka muvwàle mùzàbì munène menemene pambidi." Dyabùlù mmudivungilemù. Uh-hum. Uh-hum, ncyà bushùwà. Kaa! Hmm, hmm! Èè, bìvwà bitàmbe ne mémè ncyi mwambe aci mene to. Pa nànkù, ndi mwà kulekela aci. Èyo.

219 Kaa, bintu binène byònsò ebi's! Kòralè mivwàle mùzàbì, kòralè yifuciibwa, bìkèngela kubàfuta bwà kwimbabo. Hmm. Bìkèngela kukumbajila muiyiishi ndambù wa difwètà cyanààna

neàkakebè mûngà mudimu wà ùmufuta bîmpè bitàmbe. Neàkûngwije kasumbù kàà balubuludi wàmba ne: “Mpindyewu, bânà bèètù, ndi—ndi. . . nuvwa bansòmbèshe bîmpè mwab’ewu, nutu numpa nkàmà *bûngi kampànda* ku lumingu,” anyi cintu kampànda cikwàbò cyà bwena aci. “Kàdi Èkèleeziyà mukwàbò wa ba-Presbytériens wa . . .” (Ucibìikila ne “mwena Mpenta” anyi ní ncinyi cyònsò cidiku aci.) “dyàmwàmwa edi, bàdi ne—mbandaye ne nebàmpèèshè *yàbûngi* mitàmbe.” Kaa, ekèlekèle!

²²⁰ Dîbà adi cidi naaci munsantu mukwàte ne byà luse ewu ncinyi? Nganyì wabo wàbèèlela meeji? Ncinyi cidi naaci èkèleeziyà mukesè mùle tèntè ne Nyumà Mwîmpè, mpûngà kaaayi udibò nendè? Kabèèna mwà kukòòkesha cintu bu nànkuto. Ki Mukalenge kunùjuudila ànu cintu kampànda dîbà adi, amen, udiYe muDyambwile, kumùja ne Nyumà Mwîmpè ne kumutèèkapù bu mukùlù mutàngidi. Kutuma. . . Yèyè ne: “Ndi nkubela bwà kulwa kusumbà kùdiYe civwàlu citòòke.” Bible mmwàmbè ne: “Mizàbì mitòòke yidi bwakan-. . . bwà bansantu.”

²²¹ Mpindyewu, ngèèla meeji ne tudi. . . Twàngatàayi ku mvensà wa—ku mvensà wa 19 mpindyewu. Ngèèla meeji ne cidi bu ku mvensà wa 20 kutùdi, bwà ku dyànyi pàanyi dimòna. Èyowà, èyowà, netùjikijilepù. Mpindyewu, ikàlaayi bapùwe mpindyewu menemene ne nùtèèleje mpindyewu patùdi twenza cyòci eci apa. Tèèlejàayi:

Mònaayi, ndi mwimane ku ciibi, nkòòkola: muntu yèyè muumvwe dîyi dyànyi, ne munzùlùle ciibi, nèmbwèlèmu. . . ne nèndye nendè didyà dyà dilòòlò, ne yèyè neàdye naanyi pàmwè.

Kùdi ewu wàcimuna nèmmwanyishile bwà kusòmba naanyi pa nkwasà wanyi wa butùmbi, ànu mene bu mungàakacimùnà pàanyi, ne musòmbè ne Taatù wanyi mu nkwasà wendè wa butùmbi.

Ewu udi ne maci, ùmvwè cidi Nyumà wàmbila maèkèleeziyà.

²²² Edi’s ki dimwè dyà ku mèyi à matàmbe kwikala à pabwàwù ànkaadiku mumòne mu Dipungila Dipyadìpyà. Ndi muswè bwà numòne ne: “Ndi mwimane ku ciibi nkòòkola.” Eci’s bàtu bàcyangata nangananga, bu dîyi dyà kubiikila naadi bangènzàmpèkààtù. Ncyà bushùwà anyi? Tudi twambila bangènzàmpèkààtù ne: “Yesù ùdi ku ciibi, ùkòòkola.” Kàdi mwab’ewu Ùdi ùkòòkola ku ciibi cyà *èkèleeziyà* bwalu Wàkenda naabò musangu kampànda, kàdi bôbò (ne bulongolodi bwàbò ne maalu à cikwa-pànu ne mashìka) bàvwa baMwipàte. Ùdi ùsanganyibwa pambèlù pàà èkèleeziyà.

²²³ Mpindyewu, vùlukàayi ne, ku mbangilu kwà bikondo byà èkèleeziyà, patùdi tujikija apa, Ùvwa wènda munkaci mwà bitèèkedi byà myèndù byà ngòlò mwandamutekète (Ncyà bushùwà anyi?), bikondo mwandamutekète byà èkèleeziyà.

Nènkù ku ndekeelu eku, tudì tuMusangana pambèlù pàà èkèleeziyà kaayi? Èkèleeziyà wa Laòdikiyà, wa Laòdikiyà. Pambèlù, bàvwa bapàtùl-. . . baMupàtùle. Mòna's, Yèyè ùvwa mwimànyìne lwà pambèlù uteeta bwà kwalukila munda. Ncimfwànyi kaayi cyà cyèenza luse's wè! Musùngidi wa buloba, mwimàne pambèlù pàà èkèleeziyà udiYe musùmbe ku Mashì Èndè Sungasunga. Bundù bwàbò!

²²⁴ “Ndi mwimàne ku ciibi nkòòkola.” Paanyimà pàà mumanè kusàkiibwa pambèlù anyì mwedìbwe pambèlù, pashìshe ùteeta bwà kwalukilamù, wènda ùdikòka ne ukòòkola ku ciibi. Eci's ki bujaadiki bwà bùtamba kulenga ku mwoyi mu Dipungila Dipyadiyà. Ngèèla meeji ne kakwèna cintu cidi mwà kwikala citàmbe kwikala cyà dibungama menemene kutàmbe eci to, bwà kumòna Musùngidi wa buloba Mupàtula mu èkèleeziyà Wendè Sungasunga, cikondo cyà Laòdikiyà. Paanyimà pàà Yèyè mumanè kubàmbila cyàkadibo benze, bubanji bwàbò ne bikwàbò byònsò, ne cìvwàbo, ne mùshindù ùvwabo cìvùmvù ne bikwàbò, ne bwòbò—bwòbò bàvwa ne. . . bwòbò. . . Kabìvwa bikèngela bwà kubàtwilaYè mukana to, bwòbò mbàvwà baMutwile mukana. Nènkù ki cyòci cyònsò eci, mucii kale ànu ùkòòkola ku ciibi, ùteeta bwà kwalukilamù. Bwà cinyi? Bwà kubàpèèsha Mwoyi wà Cyendèlèlè. Aba biine bàvwà bàMushebèye ku Kàlvaryò abu, Ùvwa ùteeta bwà kusùngila musùukà wàbò. Ncimfwànyi cyà citàmbe kwenza luse cìnkààdiku mumòne bwà kacya bàndela, cìnkààdiku mwelèle meeji.

²²⁵ Mwipata! Ùvwa mwipata mu cinyi? Mpindyewu, tèèlejààyi, balunda bàànyì. Pìikala eci ní kacýèna cìtwa ku mwoyi's! Angàtaayi cimfwànyi cyàci, nucibweje mwinshì mwà mwoyi wènu. Musùngidi wetù, pàvwàYe pa buloba, Yèyè wàkiipaciibwa mu ditùnga Dyèndè Yèyè mwinè. Wàkabèngiibwa, Wàkiipaciibwa. Bàà pa buloba bààkaMwipata ne kuMupoopela ku nkùrusè. Ne mpindyewu, mmu èkèleeziyà Wendè Sungasunga, mùdiYe mwipàciibwe. Mu mwaba nànsha ùmwè kí mbaMuswè to, kabèèna Nèndè dijinga to. Bàdi ne dinguumba, kabàvwa Nèndè dijinga to. Bàdi ne paapà, cikwàbò nè cyàkuMujingila ki cinyi? Bàdi ne mwèpiskòpò wa mutàmbedìle, ne mukùlù mutàngidi, Nyumà Mwìmpè kènakù ne dikwacisha kùdìbo nànsha dìmwè. Kabàvwa Nèndè dijinga kàbìdì nànsha. Kilistò, Nyumà Mwìmpè, kabàvwa Nèndè dijinga to. Pa nànkù bàdi. . .

²²⁶ Ncyèna ngèèla meeji ne bàvwa ànu bajuuke ne baMwele pambèlù to, bwalu kabàvwa batàbàlèèle ne Kàvwamù to. Kabàvwa batàbàleele ne Kàvwamù to, bwalu bacìvwa ànu munkaci mwà kuMwimbila misambu. Muiyishi ùcìvwa ànu mumònangane ne kwakula Bwèndè, nànkù kabàvwa batàbàleele ne Kàvwamù to. Kàdi cikwa-pànù cyàbò ciinè ne bulongolodi bwàbò, munkaci mwà kudivwija bulongolodi, bàmba ne:

“Matùkù à bishimà àkaadi mapite ne kakwènakù cintu pààci ne *cikampànda* ne *cikansanga* to.”

227 Ndi nnukonka. Ditàbuluja dyònsò dikaatùku dilwè edi (nànsha dyà munyi, nwènù balongi bàà maalu-malonda), mpindyewu, kacya kale too ne mpindyewu, èkèleeziyà eyi, ditàbuluja dyònsò dikaadiku dilwè edi, kùdì. . . òwà misangu yònsò ditwàdiibwa ànu pambèlù pàà bulongolodi. Muntu kanà yònsò ukàadikù mutwadije ditàbuluja ewu, ùwà ùsanganyibwa pambèlù pàà malongolodi. Nènku musangu wònsò wàkabangaku di—ditàbuluja ewu, bàwà ne bimanyinu ne bishimà byà dyakula dyà mu myakulu ne dyondopa, ne bikwàbò byà mùshindù awu, munkaci mwà kwenzeka. Pàwà ànu mudijuudi awu ne wáfwe, díbà adi bàwà bacìwija bulongolodi ne benzèlapù bulongolodi kampànda, ne bumba “bafwa” buludi ne Nzambì kàvwakù ùbwèlakana naaci kàbìdì nànsha. Aci’s ncyà bushùwà menemene.

228 Nènku ki Yèyè ewu mu cikondo cyà ndekeelu cyà èkèleeziyà, mwimane pambèlù pàà ciibi, Nzambì wa Bukolè bwònsò. Aci—aci cidi cìcìbuluula mwoyi wànyi bwà kwela meeji ku cyòci aci. Mukalenge Wanyì mwimàne pambèlù pàà ciibi cyà èkèleeziyà Wèndè Sungasunga, paanyimà pàà mumane kwikala musakila pambèlù kùdì dinanga dyà maalu à pa buloba ne mashika ne òngumba ne dibenga kucyùka maalu, mwimàne pambèlù pàà ciibi, ùkòòkola, ùteeta bwà kwalukilamù. Pàngèdikù meeji, mu katanci emu, mèmè kwinaama pa mèèsà ne kukùtula cibòòbo wa mwadi. Mèmè kudyàmbidila. . .

229 Ntu misangu mivùle ndyambidila ne, pàwà Yesù musòmbè ku nzùbu kwà mufaalèsà wa kale aku, muntu nànsha umwe kààkaMutàbaleela to, pàwàYe ne makàsà manyaanù apu. Kabàakatwilangana Nèndè ku ciibi bwà kuMwowesha màyi ku makàsà ne kuMwela maanyi to, bwà kuumusha tumvì twà nyama ne bintakanyi mùwàYe mwendele amu; mùzàbì Wèndè wènda wùbooyangana naabi, mwambulangane ne cimpèpèmpè cyà kale cyà mu njila mùwà tubalù ne bikwàbò byendele amu, kàdi—kàdi Mwikale ne cimpèpèmpè aci pambidi.

230 Bàwà misangu yònsò bwòweshangana màyi ku makàsà, ki cìvwà cilèlè’s. Nènku mwoweshanganyi wa màyi ku makàsà ùwà kacya ànu wìmana ku ciibi aku. Nènku pàwà muntu ùlwa, bàwà mwà kumwowesha màyi ku makàsà èndè, ne bwolola cyanza mwaba awu bàngata mukòlo wà sàndalà yà yimukùmbana, bàmuvwàdika. Nènku bàwà bamwela maanyi pa mutù ne wèndè. . . ne benza bwà apatule dipembu dímpè, ne dyoshika dyà mu dikoshi dyà ku nsèsè yà díbà, bamusaamuna nsuki lwànyimà. Ùmba ubwela.

231 Ne dyakidila dyà mwenyi, mpindyewu s’ki mùshindù ùwàbo. . . Juukila kuulu kaaba aka ndambù, Pat, ndi muswè kunuleeja cintu kampànda. Ke mùshindù ùwàbo benza ngwòwò

ewu, bàvwa bamwakidila mùshindù ewu. Mpindyewu, ngèèla meeji. . . To, nùnkù ewu, ngèèla meeji ne ncintu kampànda mu mùshindù ewu ewu, bwà kumwakidila nùnkù ewu, nwamònu's, ne bèèlangana mu citupà muntu ne mukwèndè. Nènku ùvwa mwakidila bîmpè.

²³² Kàdi pàakalwà Yesù ku difestò edi, ànu mùvwàYe mulwè ku difesto dyà beena Mpenta kaaba aka, muntu kampànda wàkapanga kuMumòna. Bàvwa batàmbe kudifila mu maalu ààbò, bèèpiskòpò ne bakwàbò bàvwa mwaba awu abu. Yesù ùvwa mubiikidiibwe kàdi muntu nànsha umwe kàakaMwowesha màyi ku makàsà to. Kàdi's ki Yèyè awu musòmbe lwà mu ditumba, bikolè bwà kumanyabò ne Ùvwa mwaba awu, ne makàsà Èndè ànunka, manyaanu pambidi Pèndè pajimà, lupwishi.

²³³ Nènku díbà adi ki mwaba awu kulwaku ndumbà wa kale wa wenza ne luse wènda ùpweka ne mùsèèsù awu, ùvwa ànu ne ndambù mukesè wa mfranga mu kabuta kèndè. Nènku wèla mèsù kuntwaku ne kumònaye Yesù musòmbe mwaba awu ne manyaanu ku makàsà. Kumucìbululacì mwoyi wèndè. Kwambaye ne: “Wàwa's mmuntu wakafwila mukàji wàwa luse ku mpèkaatù yèndè. Wàwa's mmuntu ungàakùmva ne mmwenzè dyondopa. Bwà cinyi kabèèna baMutàbaleela?”

²³⁴ Bwalu bèèpiskòpò ne bwònsò bwàbò bàvwa mwaba awu, kuMwelabo pambèlù. Ki Yèyè awu. . . KuMubiikilabo bwà kulwa.

²³⁵ Mùshindù awu ki utùdì twètù twenza. Tudi tuMubiikila bwà kulwaYe mu masangisha ètù, kàdi pashiishe patùdì tulwa tudi tuMuumvwa bundù. “Kaa, ncyèna mufwànyine kwimana kuulu kwamba ne ‘Mukalenge àtumbè to.’ Kaa, to, Ba-Jones s'mbòwbabu basòmbe, mbafwànyine kwela meeji ne mvwa munsantu mubùnguluki wa mu malaba.” Wèwè mwena lubombo! Ncyà bushùwà. “Ndi ne bwòwà bwà kwakula mu myakulu bwalu mbafwànyine kumbiikila ne ‘mwena myakulu.’” Wèwè udi mwena dikènga mukèngeledi wa luse!

²³⁶ Mpindyewu, vùlukaayi, eci cidì cibwela, nudi numòna's. Wèwè udi mwena dikènga, mukèngeledi wa luse, mupèlè, butakà, ne mpofo, kàdi kùyi mucimanyè to.

²³⁷ Yesù musòmbe mwaba awu ne makàsà kaàyi mwowesha màyi to. Kàdi ndumbà wà mu mùsèèsù, ndi mwà kumumòna wènda ùpweka, twanjibi—twanjibi kwakula. . . kumwangata bwà katancì kakesè. Ndi mwà kumumòna upweka ku makàjiinyi, wàmba ne: “Ndi. . .” Ne binsonji bimwicikidila pa matàma, ki kwambaye ne: “Ncyèna—ncyèna mwà kucyènza to. Bu—bu—bu mèmè ànu mwà kubànda ne cintàkanyi eci kuntu kwàka, Yèyè's neàmanyè kùndì mupetele mfranga eyi. Yèyè mmumanyè mùndì muyìpetè, kàdi's ki cintu cimwèpelè cìndì naaci.”

238 Aci's ki cyônsò cidiYe muswè. Aci's ki cyônsò cidiYe muswè. Nwamònu anyi? Yèyè kèna ucyùka to. Wèwè lwàkù ne: "Ncyèna ne cìndì ndwa naaci mu byanza byànyì to."

239 Pa nàнку ùvwa ne ndambù wa manànsanshi ne kubandaye naawù. Ki kubàndayè kuntwaku e kudyàmbidila ne: "Kaa, bu mémè ànu mwà kuMumòna's!" Ki díbà adi kudifindayè ne kufikayè lwà ku ciibi aku mwaba kampànda.

240 Nènku, to, kabàvwa baMwakidile bîmpè to. Ki kwangatayè mulòndò wà alabasta awu ne kuwùkangulaye ne kuwèlaye pèndè. . . pa makàsà Èndè, ne kutwadija kuMusukula makàsà. Ke kutwadijaye kudila ne: "Kaa, n'Yèyè cyà bushùwà's. Ki Yèyè awu ùndi mubale misangu yònsò mu Bible. Ndi mumanyè ne Yèyè mmufwànyine kucijingulula." Kàdi katanci aka anyi. . . Mmâyì malengapù kaayi bwà makàsà Èndè, binsonji byà kanyinganyinga bîmacila pa makàsà Èndè. Yèyè kàvwa ne cikowelu cyà kuMukupula naaci ku makàsà to, ki kwololayè byanza ne kwangata nsuki yèndè. Nsuki yà mvwàngalà milenga yònsò ayi mikùtulula, ne binsonji bimupwekela pa matàma mùshindù awu. KuMwoweshaye màyi ku makàsà, ne ku misangu ne ku musangu ùvwa mwà, "*kutwà mishiku*," kuMutwà mishìku ku makàsà, wòwèsha makàsà Èndè màyi mùshindù awu.

241 Yesù ne makàsà manyaanu, ne kakùyi muntu nànsha umwe wa kubùcyùkakù to. Kàdi leelù wa ndaaya mMwambule dína dyà manyaanu dyà ne munsantu mubùnguluki wa mu malaba, *cintu kampànda* cyà bu nàнку, ne bantu kabàyìku ne dikima dyà kutwà ku Cyèndè to!

Nèngàmbule nkùrusè mujidila ewu,
Too ne pàndekelelè lufù,

Nèndondè njila pàmwè ne banyaabanya
badyombòdìibwè bàà Mukalenge,
Ndi mutwàdije ne Yesù, Éyi Mukalenge,
ndombòlèku too ne ku ndekeelu.

242 Ndombòlèku too ne ku ndekeelu, Mukalenge, nànsha byòbì bindòmba cinyì, Bu Yakòbò, ndi ne musààmù wa ditenteka mutù, n'dibwe. Bidi bishintulula cinyì? CyàkangenzelaYe aci's wè!

243 Kàdi mukàji wa ndumbà mwenze ne luse ewu mwaba awu, wèla mbila, ùdila. Kàdi katanci aka anyi, ki Simonà ewu mwimane kaaba aka, muntu munène uvwa muMubìikidische bwà kulwa awu, kwambaye ne: "Uhm, uhm, uhm, uhm! Aci's ki cidi cileeja ne Yèyè mmupròfetà anyi kí n'Yèyè, s'Úvwa kwikala mumanyè ne mwine awu mmukàji wa ngiikàdilù kaayi wàwa." Mwena lubombo awu's!

244 Ki mukàji mumanè kujikija. . .Kàdi Yesù kààkanyungishaku makàsà Èndè to, Úvwa ànu kacya musòmbè mutàngile mukàji awu ne umukenketa. Kaa, ntu munange aci's. Kí mbintu binène bitùtù twenza to, ntuntu tukesè tutùtù tupanga kwenza misangu mikwàbò atu. Yèyè kumutàngila, ànu

kacya wàmutàngila musòmbe mwaba awu. Kakùyi muntu wa kuMucyùkakù to; ndekeelu wa byònsò, mukàji awu muntwamu munkaci mwà kudila ne kuMwowesha makàsà, uvwaku mwenze bu udi umucyùka awu, kukòkabi ntèmà yà bantu. Kàdi Yèyè ùvwa ànu mumutàngile, kàyi wàmba díyi.

245 Simonà mukùlumpè awu mwimàne paanyimà pààpa, wàmba ne: “Uhm! S’nudi numòna ne Yèyè mmupròfetà anyi to, kí mmwómò anyi? S’mvwa munwambile! S’mvwa munwambile! Wìkala mupròfetà, nùnkù’s mmumanye ne mukàji awu ùvwa nganyì. Nudi numòna’s, tuvwa èkèleeziyà munène kaaba aka, nudi numòna’s, tudi bamanye’s, bidi nànkù. Tudi bamanye ne Yèyè kí mmupròfetà to, Ùvwa mwà kwikala mucimanyè.”

246 Paanyimà yèyè. . . Paanyimà pàà mukàji mumanè kujikija, binsonji byà kanyinganyinga abi bimumtùnkumukila pa matàma, wowesha makàsà à Yesù. Yèyè. . . Ngèèla meeji ne kuDyumvwaye ne cyashima ndambù.

247 Éyi Nzambi, mvw’a kujinga ngìkalapù’s! Nùnkù’s ndi muwoweshe cyàkàbidì. Éyowa’s, mukalenge.

248 Balumyànà wa yààya, mukàji wa leelù kí mufwànyine kupicila mu cikondo cyà bwalu bukolè bwà kukùpula makàsà ne nsukì yèndè anyi? S’mbifwànyine kumukengela kutwàye mutù panshi bwà kucyènza, bwà kupeta nsukì búngi bukùmbane yà kukupula naayi. Éyowà’s, mukalenge, yònsò mmikòsa.

249 Kàdi mwaba awu, makàsà à Yesù, muntu nànsha umwe wa kutàngila. . . (ànu basendeki), musòmbe mufwishibwe bundu, ne cimpèpèmpè aci ku makàsà Èndè. KuMusukulayè. Paanyimà pàà Yèyè mumanè—paanyimà pàà Yèyè mumanè kujikija, Wàkatàngila mukàji awu byenze bu úsua kwamba ne: “Mbìmpè.”

250 Ùjuula mèsù, kwamba ne: “Simonà, Ndi ne bwalu bwà kukwambila. Wèwè kuMbùikila mwab’ewu, kàdi nànshapù kulwa kuNgaakidila ku ciibi. Kwena muMpèèsheku nànsha máyi bwà kwowesha makàsà Àanyi to. Kwenaku mungeele maanyi pa mutù Wànyì paNgààbwèdì, bwà kuNguumusha dyosha dyà díbà to. Kwenaku muNtwe mishikù yà mwakidilu mulenga paNgààbwèdì nànsha. Kàdi mukàji mwenze ne luse ewu,” (Kaa, èkèlekèle.) “muntu wa pambèlù ewu, ndumbà wa mu mùsèèsù, kàvwa nànsha ne máyi bwà kuNgwowesha ku makàsà to kàdi muwoweshe ne binsonji byèndè. Kàvwa ne cyàkuàkupula naaci to, ki kwangataye nsukì yèndè, kuàkupula. Ùdi ànu munkaci mwà kuNtwà mishiku ku makàsà. Mpindyewu Ndi muswè kukwambila wèwè ne: mpèkaatù yèndè, yìvwà búngi kabùyì dibala ayi, mmimufwidìibwe luse.” Ncyà bushùwà, kàyi wambaku bwalu bwà yèndè to. “Yèbè mpèkaatù, yìdì búngi kabùyì kubala ayi, mmimufwidìibwe luse.”

251 Nènku leelù ewu pàdi Yesù, mwimàne pambèlù pàà ciibi cyà malongolodi à cyena Mpenta, malongolodi à ba-Baptistes,

malongolodi à ba-Méthodistes, uteeta kwalukilamù cyàkàbìdì ne mpenta, kàdi bantu bàdi munkaci mwà kuMulèngulula. Paanyimà pàà nwènù...bukwa-pànù bwènù ne bikwàbò mbiMusakile pambèlù pàà èkèleeziyà, N'Yèyè ewu mwimane, uteeta, wèla mbila bwà kwalukilamù cyàkàbìdì. Kàdi, kaa, s'ki cintu cyà cyenza luse citàmbe cìndì mumòneku kacya bandela. Kabàyi Nendè dijinga to! Yèyè, pambèlù, ùkookola, ùteeta bwà kubwelamù. Ki cintu cimwècimwè aci cidìYe ùteeta bwà kwenza. Bwà cinyi? Bwà cinyi? Úvwa pambèlù.

²⁵² Kabàvwakù baMwimanshe pambèlù to. Bàcìvwa ànu baMwimbila, bàyiisha bwà bwalu Bwèndè, kàdi bapange kujingulula ne Yèyè kàcìvwa munkaci mwàbò to. Ncyà bushùwà. Bàvwa ànu kacya batùngùnukè. Bwà cinyi? Bàvwa ne mèsù bitaayitaayi. Bàvwa munkaci mwà kutàngila ànu citanda cyàbò cinène aci. Bàvwa babanji. Bàvwa batàngile ku bulongolodi bunène bùvwàbò beenamù abu, bateeta kubwìbaka, kufikisha bidimba byàbùngì bwà kubwelamù, kàdi kupangabo kujingulula ne Kàcìvwakù to. To, to. Dyakula dyà mu myakulu kadivwa dibàpangika to. Kupangabo kujingulula dipangika dyà mikenji minène, yà bukolè yà Nzambì Uvwa ubàlenga ku mwoyi ne utengula mwoyi awu, usùsulakaja bintu byà pa buloba ne unùvula bu ditala. Kaa, bàvwa . . .

²⁵³ Wèwè muyiishe mùshindù awu mu èkèleeziyà wabò, mbafwànyine kukwela pambèlù. Kàdi's ki mùshindù awu ùtù Nyumà Mwimpè uyiisha. Yesù wàkamba ne: “Nwènù lukongo lwà nyòkà yà ntòòkà! Nwènù—nwènù nyòka mu bisoosa!” Ne Yone wàkamba cintu cimwècimwè aci, yèyè pèndè, ne bantu baneène balaaba, bàvwa misangu yònsò ànu bàlamunangana cisèba ne mfimbù. Ncyà bushùwà.

²⁵⁴ Kàdi bàkapangila kujingulula ne Kàvwa munkaci mwàbò to, bwalu kabàvwa ne Cyà nàнку to. Nwamònu anyi? Pa nàнку bàvwa bòbò ne kaacintu kalengeja ne bilòngù kàvwà kàbàtuuta cyanza paanyimà, kamba ne: “Wèwè lwàkù ushààle ànu wa mwab'ewu, fùndisha dìnà dyèbè apa, nènku—nènku netùkubweje mu buumambala bwèbè abu. Nènku nda ùkangate mukàndà wèbè kùdì èkèleeziyà mukwàbò awu nàнку netùkwakidile, ne—ne bikwàbò. Mpindyewu, mucipù wèbè newikalè ne mbùngì kaayi ku cidimu cyònsò?” Nudi numòna's, ki cyòci aci's: “Mubanji, kàyi dijinga ne cintu nànsha cimwè to.” Kaa! Kàdi bìdì bìkukèngela cintu cidì citàmbe bunène ne kwèna naaCì to, Yesù mwimàne pambèlù ùteeta bwà kwalukilamù ne mpenta.

²⁵⁵ Nudi nwela meeji ne ncinyi cidì cifwànyine kwenzeka dilòlò edi mu èkèleeziyà wa ba-Méthodistes bu Nyumà Mwimpè mwà kupona pa èkèleeziyà ne kubangabò kwela mbilà, kutùpika, kwakula mu myakulu ne kwenza maalu bu bakwàcike maalà...musumbà wa bantu bakwàcike maalà? Mòna's, Cipàngù aci—aci ncifwànyine kwimansha

èkèleeziyà wa ba-Méthodistes awu pambèlù pà Cipàngù aci. Bwà aci's nudi bamanyè. Ncinyi ciwà cifwànyine kwenzeka mu èkèleeziyà wa ba-Baptistes bu cyà nàнку mwà kwenzeka? Cintu cìmwècimwè aci. Beena Mpenta? Mòna's, kùdi bààbùngì bàà kùdìbo, ncyenzèke cintu cìmwècimwè aci. Bushùwà. Èyowà's, mukalenge, kì mbafwànyine kupetangana ne macimbu bu nàнку to. Mbafwànyine kwamba ne: "Mòna's, mbanyangakaje mene ne tàpì yètù mipyamìpyà." Uh-hum, cyà bushùwà. Ekèkèkè! Ekèkèkè! Mmusùmbà wa beena dikènga's wè. Ncyà bushùwà.

²⁵⁶ Èè, èyo, Ûvwa naabo musangu kampànda, Wàkenda naabo munkaci mwà bitèekedi byà myèndù byà ngòlò mwandamutekète. Kàdi dyandamuna ndyòdi edi: màngumba ne bintu byàbò byà pa buloba, bèèpiskòpò bààbò, baa kàrdinalè, ne dinanga dyàbò dyònsò dyà maalu à pa buloba, bàvwa baMwele pambèlù ne bàvwa bapangile kujingulula dipanga kwikalaku Dyèndè. Nènku èkèleeziyà . . .

²⁵⁷ Mpindyewu, citwenza ncinganyi bwà kuMwalujamù? PìkalaYe pambèlù pàà èkèleeziyà wa Mpenta mpindyewu, citwenza ncinganyi bwà kuMwalujamù? Nebikèngele masungulangana à cyapàmwè à bantu bwà kuMwaluja anyi? Nebikèngele disungula dyà paapa mupyamùpyà, kàrdinalè mupyamùpyà anyi? Anyi pàmwàpa nebikèngele—nebikèngele—nebikèngele dijuula dyà dingumba dipyadipyà. Aci kacyàkumana bwalu to! Aci kacyèna ne cyenzaci to. Dingumba dipyadipyà kadyàkwenza bwalu to, mupyamùpyà—kà—kà—kà—kà—kàrdinalè mupyamùpyà kàakucyènza to, mpaasàtà mupyamùpyà kàakucyènza to, mutangadiki mufuciibwe bimpè kàakucyènza to. Kakwèna cintu nànsha cìmwè pa buloba apa cidi mwà kucyèna to pa kuumusha ànu wèwè mwìnè. Mmunyi mutùdi tuMubwejamù? Kì nku masungulangana to. To, mukalenge. Twètù katwèna twela tukànda bwà kwalujamù Yesù to, bwalu Yèyè kàakubwelamù to.

²⁵⁸ S'ki cyòci eci—ki cyòci eci: "Muntu yèyè muumvwe Dìyi Dyànyì ne mukangule ciibi." Mpindyewu, tudi bamanye ne ciibi ncinyi díbà adi. "Muntu yèyè mukàngùle ciibi, muumvwe Dìyi Dyànyì."

²⁵⁹ Kì ne—kì nne "Bu èkèleeziyà kampànda . . . Bu bulongolodi kampànda . . ." To, mukalenge. Yèyè kàtu ùkwàta naabi mudimu to, mbifwè ne kwàbì nkujike ànu kwònsò kwònsò aku. Yèyè's mmucikine, Ûtu misangu yònsò ànu mucikine. Wàkamba ne Ûtu mucikine! Ne Ûcidi kàbìdi mucikine dilòlò edi!

²⁶⁰ "Kàdi muntu kanà yònsò ewu," Méthodiste kanà yònsò ewu, Baptiste kanà yònsò ewu, Presbytérien kanà yònsò ewu, anyi mwena Kàtòlikè kanà yònsò ewu, mwena Église de Dieu kanà yònsò ewu, Nazaréen kanà yònsò ewu, mwena Mpenta kanà yònsò ewu. "Muntu kanà yònsò ùmvwa Dìyi Dyànyì ne wàkangula ciibi, Nèmbwèlèmù ne ndye nendè ne yèyè pàmwè

Nanyi.” Ki mukenji wa èkèleeziyà wa beena Mpenta ngwôwò awu. Kí nkuteeta kufùlulula bulongolodi bwà cyena Mpenta to, kàdi kufùlulula Dibènesha dya Mpenta mu mwoyi wà muntunkàaya. Ki mùshindù ùmwèpelè ngwôwò awu. “Nènku Nèndye pámwè nendè, ne yèyè, ne Mèmè.”

²⁶¹ Ncinyi cidi mùsànjeela wa èkèleeziyà...mukenji wà èkèleeziyà ùtùlongesha díbà adi, ùtùlongesha—ùtùlongesha? Kí nditanta mu Nyumà to. To, mukalenge. Ndibwucidila dya mu Nyumà, tudi díbà dyònsò ne dibwucidila. Ngenzeli... Mì—mìsànjeela yà èkèleeziyà ne mukenji kùdi cikondo cyà èkèleeziyà cyònsò ùvwa ùpiisha bwena dingumba. Mukenji wònsò mutumina èkèleeziyà, èkèleeziyà ùvwa díbà dyònsò ànu wènda ubwucidila ne kàyì mufwànyine kuMutèeleja to. Mu—mukenji wà èkèleeziyà ùvwa ùdyùla màngumba. Nènku mmalelà beena Kilistò basopakaja, bàà ku dìnà, ncyà bushùwà, bàdi kabàyi ne cidibo bamanyè bwà Nzambi anyi bwà Nyumà Mwimpè to. Aci’s ncilelèlà ànu bu mùndi mwimane ku cibùmbà cyà ku cyambilu eku dilòlò emu. Bidimba bìmpè byà civùmvù, ànu bwà kutwidiibwa mukana Mwèndè.

²⁶² Pólò wàkadimwija ne, bàà Bisàmbà byà bendè bàvwa ditàmbà. Mpindyewu, ndi muswè bàmwè bàà kunùdi, bu nwènu mwà kuswà, bwà kubuulula mu Loomò, nshapità wa 11, mvensà wa 15 too ne ku wa 27, ànu bwà nwamòna mwà kucifùnda, nwènu bwònsò. Nènku pashìishe, bu mùdìbi ne díbà dikaadi diyè bikolè, nènùtèelele eci mpindyewu ànu kumpàla kwà kushiyangana, bwalu cidi. . . Mpindyewu, Loomò, nwènu baswè kucifùnda, 11:15 too ne ku makùmi àbìdi ne. . . too ne ku 27. Pólò wàkabàmbila, kubàmbilayè, wàkula ne bàà Bisàmbà byà bendè mwaba awu, Loomò, wàkamba ne: “Bu Nzambi...” Mpindyewu, tèelejàayi patùdi tujikija pa bikondo byà èkèleeziyà apa! Pólò wàkamba ne: “Bu. . . Nzambi kàakeepula mucì wà Olivà mulelèlà to, kàdi wàkawùkosa bwà bupidyà.”

²⁶³ Ncyà bushùwà anyi? Cyàkabàfikisha ku dikòshiibwa ncinyi? Bwalu bàakabènga Mpenta. Ncyà bushùwà anyi? Mu Ditùkù dya Mpenta bàakaseka ne kupenda Nyumà Mwimpè.

²⁶⁴ Pàvwà Yesù pa buloba apa, Wàkamba. . . KuMubiikilabò—kuMubiikila ne: “Beelèzèbùlà,” bàmba ne “Ùvwa dyabùlù,” ne “Ùvwa mwena lubùku,” ne bikwàbò byònsò.

²⁶⁵ KwambaYe ne: “Ndi nufwila luse bwà bwalu ebu, kàdi pààlwà Nyumà Mwimpè kanwàkudiku bibi Bwèndè to; bwalu nwènu bàakule bibi Bwèndè, kacyàdyàkunufwidiibwa luse to.”

²⁶⁶ Ne nùvùlukàayi pààkatùmà Yesù bayiidi Bèndè ne mudimu ne: “Kanùyì kùdi bàà Bisàmbà byà bendè to.” Ncyà bushùwà anyi? “Kàdi ndàayi ànu kùdi mikòòkò mijimine yà Izalèèlà.”

²⁶⁷ Mmunyi mwàkadipiishabo bwòbò biinè? Ku dipenda Nyumà Mwimpè, bàbiikila Nyumà wa Nzambi ne “ncintu cyà bukooya.” KuMusekabo pàvwàbò bàja maja mu Nyumà, ne bikwàbò, mu

Ditùkù dyà Mpenta. Cimenga cìmwècimwè aci, kuMusekabo, Titus kubàshèbelamù ne mashi ààbò kutuuta nkoka kupatukila ku ciibi cinène. Bààkadya bânà bààbò balela, ne bikwàbò byònsò, mu cicyà cìmwècimwè aci. Nènku aci's ncyà bushùwà. Dimwè dyà ku matùnga matàmbe bunène à pa buloba kuvwijibwadi dyà ditàmbe kushàadila, ne dyàkatangalajibwa ku nte- . . . mpeepèlè yìnaayi yà buloba. Bwà bwalu kaayi? Bwà bupidyà's! Ne aci's ki civwa cikuuku cyà ku cibangidilu, mucì wà ku cibangidilu, Izàlèèlà.

²⁶⁸ Kàdi Pòlò kî mmucyàmbe mwaba awu anyì? Nganyì udi mupete Mufùndu ànu mwaba awu mene? Udi mucìpete anyì, Pat? Juukila kuulu ùbalè kutwadijila ku mvensà wa 15 too ne ku wa 27. [Mwanèètù Pat ùdi ùbala Loomò 11:15-27—Muf.]

[Bwalu pùikalabi ne dimanshiibwa dyàbò didi dipungishiibwa dyà buloba, ncinyi cùkala dyakidiibwa dyàbò—dyàbò, s'mmwoyi kuumukila ku lufù?]

[Bwalu pùikala mamuma à kumpàla à cijila, àdi alonda ngàà cijila kabìdi: ne pùikala muji wà cijila, ke mudì kabìdì matàmbe.]

[Nènku pùikala àmwè à ku matàmbe makòseke, nènku wèwè, mwikale mucì wà olìva wa mu cisuku, wakasomekiibwamù munkacì mwàbò, ne kwabanyangana naabù muji ne maanyì à mucì wa olìvà;]

[Kanùditambishi kumpàla kwà matàmbe to. Kàdi wèwè muditambishe, kî ngwèwè ùdi utwala miji to, kàdi miji ke yìdì mikutwàle.]

[Dìbà adi udi mwà kwamba ne: Matàmbe àkakòshiibwa, bwà ngaamòna mwà kusomekiibwamù.]

[Èè; mbwà bupidyà ke bwàkakòshiibwawu, . . .]

Tèelejààyi: “bupidyà.” Èyo, tùngunukà.

[. . .nènku wèwè udi mwimane ku diitabuja. Kwikadi wàditambisha to, kàdi ciina:]

[Bwalu pùikala Nzambì kàyì mwepule matàmbe à mu bufuki to, wadimuka bwalu kààkukwepula ne wèwè kabìdì to.]

[Mònaayi dìbà adi bwìmpè ne disù dikolè byà Nzambì: kùdì aba bàdi badishinde, dísù dikolè; kàdi kùdì wèwè, bwìmpè, pawikala mwà kutùngunuka mu bwìmpè bwènde: cyanààna wèwè pèèbè neùkòshiibwè.]

[Nènku bwòbò pààbò, bwòbò kabàyì bashààle bakalame ànu mu bupidyà to, nebàsomekiibwemù: bwalu Nzambì mmukumbane bwà kubàsomekamù cyàkabìdì.]

[*Bwalu pùikalabi ne wêwê wàkakòshiiibwa ku mucì wà olivà udi wa cisuku ku ngiikàdìlù, ne wakasomekiibwa bibèngàngàne ne ngiikàdìlù webè ku mucì wà olivà mwîmpè: mmisangu búngì kaayi yikala aba, bàdi biikale matamba à ku cifùkìlù, mwà kusomekiibwa ku mucì wàbò sungasunga wà olivà?*]

Hmm!

[*Bwalu ncìvwa mwà kuswa, bàna bèètù, bwà nwènù kupanga kumanya bwalu busokoka ebu, bwà kanùlù kudìbala bu beena meeji mu mmwenenu yènù nwènù biine to; bwà ne citùpà cyà Izàlèèlà cyàkapòna mu bufofo, too ne pààbwela kaabujimà kàa bàà Bisàmbà byà bendè.]*

[*Nèuku dîbà adi Izàlèèlà yònsò neàsùngidiibwè: bu mwàkafùndàbo ne: Mu Sìonà nemùpàtukè Mupikudi, ne neùmushile Yakòbò dipeetù dyà maalu à Nzambì.]*

[*Bwalu eci ke cipungidi cyànyì kùdìbo, pangùikala mwà kuumusha mpèkaatù yàbò.]*

269 Nudi nuCyùmvwà anyì? Pòlò mmwambè ne: “Pùikalàbi ne Izàlèèlà wàkabànda e kumòna bimanyinu mwab’ewu byà Nyumà Mwîmpè, kàdi kukòshiiibwa...” Vùlukàayi ne, bwalu bààkabènga mukenji wà Pòlò (dibàtiiza mu Dìnà dyà Yesù, kanyinganyinga ne dibàtiiza mu Dìnà dyà Yesù, bimanyinu ne maalu à kukèma bilonda mwena kwitabuujà), kàdi bààkaCibènga. Ki bôbò kwamba ne: “Mònaayi, tudì tukudimuka tuya kùdi bàà Bisàmbà byà bendè.” Ncyà bushuwà anyì?

270 Tùmonèbi, ngèèla meeji ne cìvwa ku...kwàkabiiikilàbo beena Kilistò bwà musangu wà kumpàla, kùvwà nku Efèsò, anyì, ku Antiokiyà.

271 Mpindyewu—mpindyewu, pùikalàbi ne—pùikalàbi ne mucì wà kumpàla wùvwà wà cijila, matambà àwù à cijila, mucì wà ku cibangidilu awu, ne bwalu bààkabènga kwitabuujà Mukenji wà beena Mpenta ùvwà Pòlò ùyiisha (Bidi nàнку awu anyì?), Nzambì wàkabàkòsa ne kwangata mucì wà olivà wa mu cisuku (uwva mwikàlàngàne bàà Bisàmbà byà bendè, twètù) ne kutùsometamù bwà twamòna mwà kwikadila ne mwoyi ku matamb-...bidì bidìisha mucì awu.

272 Mpindyewu, nebiiikale bishi mu ditùkù edi patùdì tubènga Mukenji wa Mpenta ùdì mutwàdije mu bikondo byà èkèleeziyà too ne ku ndekeelu, mmisangu búngì kaayi yidì Nzambì mukùmbane bwà kujoomonaku mucì wà kale wà cisuku awu, twamb’eku twamb’eku, ne kwalujaku mukwàbò awu? Bwalu yêyè neàWùbenge, bwà bupidyà. Mpindyewu swikakajàayi aci ne dileesònà dyà mu dindà emu. Nudi bamanyè mwaba utùdì biimànyine mpindyewu, kí mmwòmò anyì? Tùkàadi ku cikondo cyà nshiiikidilu bwà dyumushiibwa dyà Èkèleeziyà wa bàà

Bisàmbà byà bendè, Dyambwibwa Dyèndè; ne dibwela mu cyalu dyà Nyumà Mwímpè bwà kulwa Yè kùdi beena Yudà, ne bwà Yesù kuDimanyisha, bwà kutwà binunu lukàmà ne makumi anaayi ne binaayi abi citampì. Ki bwalu mbwòbù abu's. Kwaluja mucì wà ku cibangidilu (kwalukila mu Dibènesha) mu Izàlèlèlà cyàkàbìdì.

²⁷³ Yesù kààkushààla mwimane pambèlù pàà ciibi cyèbè aci bwà kukookola dībà dyònsò to. Nekùlwe cikondo cyàMutondabi ne kuumukaYè, dībà adi wèwè ke wàkookola kàdi kwàdyàkuMupeta to. Lwàkù pàcìdiku dībà apa. Lwàkù pàcìdiku dikookola apa. Kùdiku cibàngà ne cintu nànsha cìmwè pàdìci kaciyi dibatiiza dyà Nyumà Mwímpè wa bwena wakapetabò ku Mpenta awu, ne dibatiiza dyà mu màyi dyà mùshindù ùmwèùmwè adi, bintu bìmwèbìmwè byàkenzàbo kuntwaku abi. Kulekediku cintu nànsha cìmwè citèèka ní ncinyi ní ncinyi mu mwoyi wèbè pàdìci kaciyi aci to.

²⁷⁴ Mpindyewu, bwenu nwènu balunda bàànyì beena Kàtòlikè, lekelaayi nñwàmbilèku cintu kampànda, nudi nwtabuuja Màriyà virgò awu. Virgò Màriyà, mwikàle maamù wa Yesù Kilistò, byàkamukèngela bwà kuyayè ku Mpenta ne kuujiibwa tètè ne Nyumà Mwímpè, ne wàkenza maalu bu muntu mukwacike maalà. Úvwa munkaci mwà lukàmà ne makumi àbìdì abu, mwikàle ne dibatiiza dyà Nyumà Mwímpè, kwàkula mu myakulu ne wènza maalu bu mukàji mukwàcike maalà mwaba awu, ku bwenzeji bwà Nyumà wa Nzambì. Nènku piikalàbì ne byàkakèngela bwà virgò Màriyà kwenza nànkù bwà kubwela mu Butumbi, mmunyi munwàbwelaMù, ne ní ncinyi ní ncinyi cyà cishààdile ku aci? Elààyibi meeji bwà cyòci aci. Ncyà bushùwà.

²⁷⁵ Ba-Baptistes...Muyiishi wa ba-Baptistes awu udi paanyimà apa ewu mmuswè kwikala mutwishìbwe ne ncyambila ba-Baptistes pààbò. Aci's mbwà muntu kanà yònsò, nànsha yèyè nganyì.

²⁷⁶ Pa nànkù ànu kukashààla wa mu èkèleeziyà ne kwamba twitabàayi kampànda, ne kuya mu èkèleeziyà dindà dyònsò dyà dyàlumingu, kabyèna bikwambulwìshaku nànsha byà kàna to. Udi munkaci mwà mwà kuseka Nzambì. Anyi ikàlà mwena Kilistò mulelèlà anyi kwikadi cintu nànsha cìmwè to. Ikàlà anyi ku luuyà anyi ku mashika. Anyi ikàlà pambèlù. . .Bwalu kwena mwà kwikala. . .Kacya kanutuku banji kumòna nyuunyì mufiike mutòoke to, kacya kanùtukù banji kumòna muntu mukwàcike maalà mwikala kàyi mukwàcike to, kacya kanùtukù banji kumòna ngènzàmpèèkààtù munsantu to. To, nànshapu, kabyèna mwà kwenzeka to. Anyi udi mùle tètè ne Nyumà Mwímpè ne Nzambì mwikale ne mwoyi munda mwèbè, anyi kwèna nendè nànsha wa mafi to. Udi—udi nànkù anyi kwèna nànkù to.

²⁷⁷ Pa nànkù ki bwà cinyi udi ne cyà—udi ne cyà kuvùluka ne

Yesù mmwimane ku ciibi cyèbè, ne vùlukàayi mulayi wà Nzambi kaaba aka ne Yèyè neenzè nàнку mu matùkù aa, bwà cinyi? Bwà dibènga. Cyàkafikisha Izàlèlèlè ku dikòshiiibwa, ku mucì wa ku cibangidilu awu ncinyi? Bwalu bààkabènga Mukenji wà Pòlò wà Mpenta. Kàdi nudi nwitabuuja ne eci ki cikondo cyà ndekeelu cyà èkèleeziyà anyi? Bible ngudi mwàmbe nàнку's! Mbàmbe bishi bwà ciikala mwà kubènzekela? Nebàkòshiiibwe bwà dibènga dyà Mukenji wà Mpenta, ne pashiishe Nzambi neàlukile kùdi beena Yudà.

²⁷⁸ Ne Izàlèlèlè mujimà dîbà adi neàsungidiibwè, bwalu Yèyè neàbàngàtè bu ditùnga, kî mbu muntu-nkààya to. Kàdi bwènu nwènu ne mèmè mbu muntu-nkààya, bwalu Yèyè wàkalwa kùdi beena Yudà. . . Byenzedi, mu Mukàndà wà Byenzedi, Wàkalwa kùdi bàà Bisàmbà byà bendè bwà kwangata “cisàmbà mu bàà Bisàmbà byà bendè bwà Dîna Dyèndè,” Mukàj'Èndè-musèla. “Cisàmbà,” ewu apa, ewu pàpa, ewu lwà apa, ne Yèyè ùdi ùkwàta mudimu neetù bu bantu-nkààya, kàyì ucyùka dikòbà, twitabàayi, anyi diikala. Ùdi ùkwàta neetù mudimu bu bantu-nkààya, cintu's n'cilòngò Cyèndè cyàtèekàYe pa cyoshelu Cyèndè. Kàdi bu beena Yudà, Yèyè wàkàkwàta mudimu misangu yònsò ne Izàlèlèlè bu ditùnga, bàdi ditùngà dyà bantu, ditùngà Dyèndè.

²⁷⁹ Ndi ne disànkà dilòòlò edi dyà ne tudi ne Mukenji ewu. Nèнку ndi ne disànkà dyàbùngi bwà munùdi balwe mwab'ewu, ne dilwa dyènu adi ndi mudyanyishe bikolè be. Ndi nsàkidila bikolè Nzambi wa Bukolè bwònsò bwà kumfikisha ku dimòna cîndi mumòne eci, ne mukùmbane kucifikishila èkèleeziyà ewu, nèнку mpindyewu Cyùmùkù pa mwoyi wànyì. Bwalu cikondo kampànda Nyumà Mwîmpè wàkàkwàta mudimu mu mwoyi wànyì, nciyiku mwà kuMusakila to, byàkankèngela ànu bwà mèmè kwenda Naaci.

Kùdi bintu bibidi bìndi ndyumvwa mulombodiibwe bwà kwenza.

²⁸⁰ Kuya ku Shreveport, mu Louisiane, bwà disangisha kampànda pàmwè ne Mwanèètù Moore. Nànsha mukàjàànyì udi musòmbe mwaba awu ùdi mwà kunwàmbila. Kukaadi mbingu yîndi ànu ngèèla lubila ne: “Ndi muswè kuya ku Shreveport. *Bwà cinyi?*” Kàdi ewu yònsò uvwa kuntwaku ku Shreveport mmumanyè ne *mbwà cinyi* mpindyewu. Kacya kabàtukù banjì kumòna anyi bumvwè cintu bu cyòci aci to. Bayiishi bàfùmina myaba yònsò, ba-Baptistes ne bàà mîshindù mîshiiilèshiiilàngàne. Muntu kampànda kwamba ne wàkabanga, ànu ne àtèkè byanza byèndè pa frigo, ki Nyumà Mwîmpè kumutùlukila kwamba ne: “Nda ku Shreveport, mu Louisiane, nebàkwambileku cyà kwenza.” Kumwambila dîna dyànyì ne mwaba wà kupeta. . . Yèyè ne: “Yèyè neàkwambile cyà kwenza.”

²⁸¹ Mèmè kwamba ne: “Ciina cyà màyi cidi bwàshi lwà kwinshi

kwà bibàndilu kwàka. Wèwè udi dijinga ne dibatiiza dyà Nyumà Mwímpè.” Nènku mwaba awu . . .

²⁸² Pa nàнку bintu byà mùshindù awu, bantu bààkula, ne—ne biprófetà ne bintu byà didyànjila kwamba maalu àkenzekà ànu mwaba awu munkaci mwètù.

²⁸³ Pashiishe mèmè kwamba ne: “Ndi ne cyà kuya ku Jeffersonville bwà kufùnda mukàndà ewu, bwalu ncyèna mumanye ntàntà bule kaayi ùndi ne cyà kwikala mwab’ewu to. Kàdi bu mèmè mwà kwamba Eci ne kufùndiibwaCi, paanyimà pàà mèmè mumanè kuya Mèyi neàtùngunuke ne kwikala ne mwoyi.” Ndi ne maalu-malonda mafùnda kaaba aka ikalà mwà kusanganyiibwa mu mukàndà. Nènku ndi mulwè mwaba ewu bwà kucitwala kumpàla kwà èkèleeziyà bwà kupeta disonsodiibwa dyà Nyumà Mwímpè, bwalu ncivwa mumanyè maalu aa mèmè mwìnè to. Aci’s ncilelèlè. Aci mmu Dìnà dyà Mukalenge, aci’s ncilelèlè ne: “Ncivwa mubimanyè to.”

²⁸⁴ Mpindyewu ndi ndyùmvwa musùlùdìibwe, ndi ndyùmvwa ne Nzambi mmutùtwàdile Mukenji. Ndi ngiitabuujà ne tukàadi ku ndekeelu kwà njila, Ndi ngiitabuujà ne dībà dyàkùmbanyi bwà dimwèneshiibwa dyà Nzambi kumanyishiibwadi munkaci mwètù. Nènku ncyèna mumanyè ne nebìnenge ntàntà bule munyi to, kàdi dībà dikaadi pabwìpì.

²⁸⁵ Netwikale bindile bwà muntu munène awu kjuukaye. Mmufwànyine kulwa mu ditùkù dyànyì, mmufwànyine kulwa mu ditùkù dyà bitende, ncyèna mumanyè to. Mmufwànyine kwikala ànu munkaci mwètù mpindyewu, katwèna mwà kumanya to. Nyumà Mwímpè ùdi kaaba aka bwà kutùlombola too ne ku cikondo aci, dībà adi pàtùlombola mulombodi awu yèyè neikale ànu mulaabiibwe kùdì Nyumà Mwímpè; Eliyà awu—awu, mu bushùwà bwà bwalu, wikala mwà kulwa awu. Kàdi neikale mulombodi wìkala mwà kukùdimuna myoyi yà bânà, anyì, kwaluja myoyi yà bânà ku Mukenji wà Taatù, kwalukila ku Mukenji wà Taatù wètù wa mu Dyulu wà mu Ditùkù dyà Mpenta pàakapòngololàYe Nyumà Wendè.

²⁸⁶ Bukesè bwàci ebu, ndi mubùtwàle ànu menemene ne mwànyì mwònsò ku maalu-malonda ne Bible, ne kuleeja ne cintu aci ncitwàdije kwenzeka ànu mu bikondo byònsò byà èkèleeziyà, ne ki cyòci leelù ewu, kuleeja ne màngumba mmulawu kumpàla kwà Nzambi. Ndi ntèkemena ne aci ncimana kushìndika mu meeji ènù, ku Bible, ku byenzi byà bapostòlò, ku maalu-malonda ne byònsò. Aci . . .

²⁸⁷ Ne kakùtuku kwanji kwikala musangu nànsha ùmwè ukaadiku Nzambi muvwije Èkèleeziyà Wendè bulongolodi to. Mamwèndè wa maèkèleeziyà mavwija malongolodi mbalombodi bàà myanzu bàà Kàtòlikè kàà cyena Loomò. Èkèleeziyà wa Kàtòlikè wa cyena Loomò, ke mamwèndè wa malongolodi awu. Nènku pàdì ànu ditàbuluja dikùtuka mu musumbà kanà wònsò

wà beena Mishòònyì, bàdi bàalukila buludi ne benza cintu ànu cimwècimwè aci. Ne Bible mmwambè ne: “Yèyè ùvwa mukàjì wa masandi. Ne yèyè awu, ùvwa ne bânà bàà bakàjì mbwena kwamba ne èkèleeziyà yà mifùmine ku yèyè.” Bìvwa bikèngela kwikalabò bakàjì, bwà kwikala bandumbà. Ki yèyè awu. Pa nàнку tуди basòmbè. . .

²⁸⁸ Kàdi wàkamba kàbìdì eci ne: “Kanuùinyi to, nwènu kasumbù kakesè kàà mìkòòkò, ndiswa dimpè dyà Tatwènu bwà kunùpèèsha Bukalenge.” Pa nàнку byènzekeku ne twètù byònsò, mu ditùkù adi, nwènu ba-Méthodistes, ba-Baptistes, cyònsò cinùdì aci ne: “Ewu yònsò wakàngula ciibi awu, Nèmbwèlèmù bwà kudyà nendè pàmwè.”

²⁸⁹ Tubadiibweku, bânà bèètù wanyi bàà balùme, bânà bèètù bàà bakàjì, twàbadiibwakù pèètù mu kasumbù kakesè kàà mìkòòkò aku mu ditùkù adi. Twikalekù pèètù citùpà cyà ku kasumbù kakesè kàà mìkòòkò kùkàla munkaci mwà kwindila pààlwàYe, bu mùdìYe ùlwa bwà kukàmbula kuya naakù dyàmwàmwà dyà buloba. Bwalu Dyambwibwa adi—adi nediiikale dyà buloba bujimà. “Nekwikale bàbìdì pa bulààlù, Nèngàngate umwe; bàbìdì mu budimi, nènku Nèngàngate umwe.” Bileeja ne nebiikale elu luseke lwà buloba bufuku ne mundaamunya ku lukwàbò luseke, nwamònu’s. Pa nàнку, bìdì ne: “Bàbìdì nebiikalè mu bulààlù, bàbìdì nebiikalè mu budimi,” nwamònu’s, “Nèngàngatè umwe wa ku bòbò.”

²⁹⁰ Nènku ànu bu mungàmbì mu dindà emu, nenwikale munkaci mwà kwendesha màshinyi mu njila dìmwè dyà ku matùkù aa, uyikilangana ne maamù, dyà ukenzakana anyi, yèyè muyè. Nenwikale basòmbè ku mèèsà, munkaci mwà kunwa kàfè kèènù—kèènù anyi mukanci mwà kudyà cyàkudyà cyà dindà, anyi—anyi cikampànda, kàdi katanci aka anyi, dyà ukenzakana anyi papa kàciyipù kàbìdì to. Aci ncyà bushùwà menemene. Cìdì cìlwa, kàdi katwèna bamanyè ne ndìbà kaayi to. Kàdi bwalu bùdì ne, pàkaadiku kujike dìbà adi’s nkujike, dìbà adi kakwèna cikwàbò cintu cyùdì mwà kwenza bwà bwalu abu to. Wèwè udi wamba ne: “Nkààdi muumvùmwè aci ntàntà mule.” Kàdi’s neùcyùmwè bwà musangu wèbè wà ndekeelu. Ncyà bushùwà. Necyènzeke bwalu N’Dìyì dyà Mukalenge. Nènku, nwavùlukaayi ne, Cikaadiku cipangile musangu kampànda munda mwà malòlò mwandamukùlù àmvwà munkaci mwà kuyiisha aa anyi? Kàdi cyà—cyàkambà Yesù mwab’ewu, ncyènzeke, ne cikumbaaaje cikondo ne cikondo cyà èkèleeziyà ànu mu cyòcì menemene.

²⁹¹ Nènku tуди tumòna cikondo cyà èkèleeziyà eci cidìbwinkemù, ne ànu pa dìbà mene. Nànsha mene mu dindà emu, mu kwangata cimfwànyì cyà virgò, cikondo mene cìvwà virgò mukùtākàne. . .Mpindyewu, nudi bavùlùke ne, Bible mmwambè ne virgò mukùtākàne. . .pàakeediibwa lubilà ne: “Mònaayi, Mubàki nyà ùlwa,” dilwa dyà Mukalenge, diyiisha dyà Dìyì. Ne pashiishe cyàkenzekà ncinyi? “Cikondo

cikaadi pabwîpi, bombes bwà mushindà ne bikwàbò byònsò mbilongolola,” bayiishi bàdi munkaci mwà kunyemakana mu misèèsù ne batwàdije kukobola Mukenji.

²⁹² Nènku pàdìbò ànu benza nàнку, dîbà adi èkèleeziyà munène, virgò mukùtākàne awu, ùdi wàmba ne: “Aa, èè, twètù’s tudi ba-Presbytériens bàà ntantà mule, pàmwāpa tudi bafwānyine kulonga bwà kujandula. Èyowà, nudi bamanyè’s, ngèèla meeji ne tudi bulelèlè dijinga ne Nyumà Mwímpè.” Nènku bàdi munkaci mwà kufùnda tuumikàndà twà dibala ne bikwàbò byònsò pa Bwalu abu mpindyewu, ki kumònanganabo naabi eku. Ki bóbò kwamba ne: “Nudikù mwà kutùpèèshakù ndambù wa Wòwò awu anyi?”

Ki abu ne: “To, tudi ànu ne búngì bukùmbàne bwètù twètù nkààyetù.”

²⁹³ Nàнку pààkayàbo bwà kupeta Nyumà Mwímpè, kuyabo kasambila, bu mùdì maèkèleeziyà, mwenzenzabo kùdì èkèleeziyà minène leelù ewu, malongolodi awu. Pààkayabo kakeba Maanyì awu, Mubàki kulwa. Pa nàнку bàdi bàteeta kuÀpeta mpindyewu mene, èkèleeziyà minène, malongolodi, masangisha manène à buloba bujimà bwà bwalu Bwàwù mu—mu èkèleeziyà mivwija malongolodi ayi, bàmba ne: “Bikèngela twàlukile ku Dibènesha dya Mpenta. Bikèngela twikale ne bondopi bàà kwà Nzambì mu èkèleeziyà mwètù. Bikèngela twikale ne baakudi bàà mu myakulu. Bikèngela twikale ne bumvwiji bàà myakulu. Bikèngela twikalè ne mapà wònsò à Nyumà aa mu èkèleeziyà mwètù, nènku netùtwadije ànu dyenza masangisha bwà kubanga kucyènza.” Bàdi munkaci mwà kwenza bipàngu, mbatwadije kubyènza. Pàdìbò baye bwà kwenza nàнку, ki mu cikondo aci mene mùdì Mubàki ùlwa ne wàngata aba bàvwa ne Maanyì mu myèndù yàbò, ne ùkwàta njila uya.

²⁹⁴ Pashìishe kulwabò, ne cyàkenzekà ncinyì? Bààkeediibwa mu mîdimà yà pambèlù (cikondo cyà Dikènga Dinène) mwikalabo bàdila myadi ne bàtwa mikemu ne bàsumakaja ménù, piinè apu mpàdì Mukàji-musèlè ùsanganyiibwa mu Dyulu. Kaa, ekèlekèlè!

²⁹⁵ Pashìishe ku ndekeelu kwà bidimu bisàtù ne citùpà abi, Yèyè neàlwe bu mwàkenza Yozefù ne kuDimanyisha kùdì bàna Bààbò. Necìtwale madilu myaba yònsò, ne nebàmbè. . . Nebàtapulule mèkù ààbò, ne badila ne—ne bàmba ne: “Nkwèpi Kùdì mupetele bibangu ebi?” Ne—ne byà bitwibwe mafumà. . . aba bààkaMutwà difumà nebàMumòne, ne Yèyè neàDimanyishe kùdì bàna Bààbò.

²⁹⁶ Mpindyewu Ùdi munkaci mwà kuteeta bwà kuDimanyisha kùdì Èkèleeziyà Wendè, kàdi’s mbaMusàkile pambèlù. Kàdi Yèyè ùcìdì ànu mwimane, ùkookola, wàmba ne: “Kùdikù mukwàbò muntwamu anyi? Umwe udi mufwānyine kukangula ne kulekela bwà Mèmè kubwelamù ne kuyiikila nendè anyi?”

297 Kaa, ndi ne disànkà, ne kusàkidila kwàbúngì bwà bwalu abu. . . kùkaadi bidimu byàbúngì, pabwìpì ne bidimu makumi àbìdì ne mwandamukùlù nànkù, kungààkuumvwa dikookola adi ku mwoyi wànyì. Ki mèmè. . . KubwelaYe munda mwànyì, kacya ànu piine apu ki mèmè kudyà Nendè ne Yèyè naanyi eku's. Ki mèmè kupeta Dibènesha dyà beena Mpenta, kupeta Nyumà Mwimpè.

298 Ngààkabàtìijibwa mu Dìna dyà Yesù Kilistò bwà dilekelediibwa dyà mpèkaatù yànyì, musangu ùmwèpelè ungààkabàtìijibwaku kacya bándela, musangu ùmwè. Pàncìcìvwa ànu mwàna mukesè wa citende, kakùvwaku muntu mwà kungambila ne kùdi Nzambì yisàtù nànsha. To, kuvwakù mwà kunswikila aci mu nshìngù to. Kwena mwà kucipèèsha ní nganyi ní nganyi udiku mumanyè ní ncinyi. . . mumanyè ne Nzambì ncinyi to. Ncyà bushùwà. Nànkù pàngààkabàtìiiza. . . muyiishi kampànda wa ba-Baptiste ngwàkambàtìiiza. Mèmè kwamba ne: “Ndi muswè kubàtìijibwa mu Dìna dyà Mukalenge Yesù Kilistò.” Docteur Roy E. Davis wàkambatiiza mu Dìna dyà Mukalenge Yesù Kilistò pàncìcìvwa ànu mwàna. Nwamònu anyi? Ncyà bushùwà. Pa nànkù mèmè—mèmè kucitabuujà, ntu mushààle naaci, ne ndi mumanyè ne m'Bulelèlà. N'Dìyì dyà Nzambì dyà Cyendèlèlè. Ncyà bushùwà. Ncyà bushùwà.

Ndi ne disànkà dyàbúngì dyà kwamba ne ndi umwe wabò.

Ndi umwe wabò, umwe wabò,
Ndi ne disànkà dyàbúngì dyà kwamba ne ndi umwe wabò;

Ndi umwe wabò, umwe wabò,
Ndi ne disànkà dyàbúngì dyà kwamba ne ndi umwe wabò.

Nànsha mùvwà bantu aba kabàyi bafwànyine kwikala balongè to,

Anyi bàditàmbisha bwà luumù lwà pa buloba,
Mbapetè bwònsò Mpenta wabò,
Babàtìijibwe mu Dìna dyà Yesù;
Ne bàlondelangana leelù, ne kule ne ku nseke yònsò,

Bukolè Bwèndè bùcìdi ànu bùmwèbùmwe abu,
Ndi ne disànkà dyàbúngì dyà kwamba ne ndi umwe wa. . .

299 Udi ne disànkà anyi? Pawikalà ne disànkà, elà cyanza cyèbè muulu.

Umwe wabò, umwe wabò,
Ndi ne disànkà dyàbúngì dyà kwamba ne ndi umwe wabò;

Paùdi ànu ushààla Wendè newikale kumutù kwà mpèkaatù yònsò, mu Dìna dyà Yesù Kilistò.

Lwâku, mwanèètù wanyì, kèbanganà ne
 dibènesha edi
 Dyàkezulà mwoyi wèbè ku mpèkaatù,
 Dyàtwadija kudidishà ngonga yà disànkà
 Ne dilama musuùkà wèbè ulàkuka kapyà;
 Kaa, s'ki kwoshadi mpindyewu eku munda
 mwà mwoyi wànyì,
 Kaa, butùmbi kùdì Dîna Dyèndè,
 Ne ndi ne disànkà dyà kwamba ne ndi umwe
 wabò.

Kaa, umwe wabò, umwe wabò,
 Ndi ne disànkà dyàbùngì dyà kwamba ne ndi
 umwe wabò; (Àlèluuyàh!)
 Umwe wabò, umwe wabò,
 Ndi ne disànkà dyàbùngì dyà kwamba ne ndi
 umwe wabò.

Bàvwa badisangìshe mu cibambalu cyà kuulu,
 Bwònsò munkacì mwà kusambila mu Dîna
 Dyèndè,
 Bàakabàtìijibwa ne Nyumà Mwîmpè,
 Ne bukolè bwà mudimu kulwabù;
 Mpindyewu cyàkabènzela Yè ditùku adi
 Yèyè neàkwenzèlè byà mwomùmwe,
 Ndi ne disànkà dyàbùngì dyà kwamba . . .

³⁰⁰ Mpindyewu tulabulanganàayi ku byanza, ne bàdi mumpàla,
 paanyimà, ne eku ne eku.

Umwe wabò, umwe wabò,
 Ndi ne disànkà dyàbùngì dyà kwamba ne ndi
 umwe wabò;
 Umwe wabò, umwe wabò,
 Ndi ne disànkà be dyà kwamba ne ndi umwe
 wabò.

Kaa, umwe wabò, umwe wabò,
 Ndi ne disànkà dyàbùngì be dyà kwamba ne
 ndi umwe wabò;
 Umwe wabò, umwe wabò,
 Ndi ne disànkà dyàbùngì be dyà kwamba ne
 ndi umwe wabò.

Umwe wabò, umwe wabò,
 Ndi ne disànkà dyàbùngì be dyà kwamba ne
 ndi umwe wabò;
 Umwe wabò, umwe wabò,
 Ndi ne disànkà dyàbùngì be dyà kwamba ne
 ndi umwe wabò.

Kanwènaayikù ne disànkà dyà kwikalakù umwe
 wabò anyi? [Disangisha didi dyamba ne: “Èyowà! Amen!

Àlèluuyàh!”—Muf.] Ndi munangè aci. Musùmbà wa mutooyi wà dikèma!

Shh! Shh! [Mwanèètù wa balùme kampànda udi wakula mu myakulu, mukwàbò mwanèètù wa balùme kampànda udi wàndamuna—Muf.]

³⁰¹ Mùshindù mwine wutùdi tuKusàkidila’s, Taatù, bwà bwímpè Bwèbè ne luse kutùdi, twètù bàdi kabàyi bakùmbànyine aba. Pa kwela meeji ne Wèwè uvwa mwà kushindika Mukenji Wèbè mpindyewu, Mukalenge, mulaya bantu. Ndi ndòmba, Nzambì, bwà luse Lwèbè lwikile pambidi pààbò.

³⁰² Kwòkò muntu kaaba aka udi kàyì muMumanyè bu Musùngidi to, udi mufwànyine kuMupeta mpindyewu mene mu myoyi bu Musùngidi, nudikù mwà kujuukila kuulu patùdi tulàmbula disambila bwèbè apa anyi? Wàkamba ne Yèyè ùvwa mwà...muvwije Mukenji ewu kuntwaku ne Ùvwa muswè kushindika Dìyì Dyèndè kùdi. Kwòkò kwikàle bàmwè kaaba aka bàdi kabàyi baMumanyè ne kabàyi bapetè Nyumà Wendè to, Yèyè ngudi wakula neebè awu.

³⁰³ Èyo, ewu udi paanyimà wàwa. Udikù mwà kujuukila kuulu anyi, mwanèètù? [Mwanèètù wa balùme kampànda ùdi wàkula—Muf.] Yèyè mmuswè kubàtijiibwa mu Nyumà Mwímpè, mmwòmò anyi, mwanèètù? Nzambì àkubènèshè. Juukila kuulu mwaba wùdi awu. Kùdikù mukwàbò mwà kujuuka kwamba ne: “Ndi muswè kubàtijiibwa mu Nyumà Mwímpè anyi?” Nzambì àkubènèshè, mwanèètù. Nzambì àkubènèshè. Abi mbímpè. Imànyìnà ànu kuulu cyanààna. Shààla wèwè ànu mwimane kuulu. Nkufwànyineku kwikala muntu mukwàbò udi muswè kwakidila Nyumà Mwímpè ne kubàtijiibwa, muswè bwà kumuvùluka mu masambila ètù mpindyewu mene, bwà kubàtijiibwayè mu Nyumà Mwímpè anyi? Kùdikù mukwàbò, kumpàla kwà mèmè kwamba cìndi nswa kwamba eci, udi muswe kujuuka ne kudisàkidila?

Kaa, udiku muswè bwà kubadiibwa bu umwe wa ku cisùmbù Cyèndè anyi? (Udi muswè kwenza nàнку anyi?)

Ikàlà kùyi katobà munda to, ikàlà mutàbàle ne mwindile dibandila dyà bùlwalwà ebu;

Yèyè ùlwalwa cyàkàbidi.

³⁰⁴ Yèyè ùlwalwà cyàkàbidi. Udikù muswè kwikala mulwishi Wendè anyi udikù muswè kwikala mwàn’Endè? Nzambì wa cijji mu dindà adi, kàakwitaba cingà cintu to ànu Mashi à Yesù. Yèyè kààdyà...Bu mambàla bwèbè bwà mu èkèleeziyà kabwàkuMwambila bwalu to. Ànu Mashi!

Kaa, lwà mushinga mukolè ndukòka alu

Lùdi lùmvwijà mutòòke bu nêjè;

Bitùùlùbitùùlù.

Ncyèna mumanyè mukwàbò mpokolo to,
Ànu Mashi à Yesù.

Ncinyi cidi mwà kusukula ne kuumusha
mpèkaatù wanyi?

Ànu Mashi à Yesù;

Ncinyi cidi mwà kungaalujulula kàbìdì?

Ànu Mashi à Yesù.

Kaa, cyà mushinga mukolè ndukòkà alu

Lùdì lùmvwijà mutòòke bu nêjè;

Ncyèna mumanyè mukwàbò mpokolo to,

Ànu Mashi à Yesù.

[Mwanèètù Branham ùdi wimbila mu matàma

Ànu Mashi—Muf.]

Ànu Mashi à Yesù;

Eci ki bwakàne bwànyì bwònsò,

Ànu Mashi à Yesù.

Kùdikù mukwàbò anyi?

Kaa, lwà mushinga mukolè lùdì . . .

Kakwèna cidi mwà kwimana to, mwanèètù wa balùme,
mwanèètù wa bakàjì. Buloba bùdì munkacì mwà kutùkina,
bwàbù mbujike!

. . . bu nêjè;

Ncyèna mumanyè mukwàbò mpokolo to,

Ànu Mashi à Yesù.

³⁰⁵ Bitùlùbitùlù, Teddy, bu wèwè mwà kuswà: “Kùdi Mpokolo
mùle tètè ne Mashi, makoka mu mijilu yà Emanùwèlè.”

³⁰⁶ Mpindyewu, nwènu balunda bàànyì, nwènu bàdì biimàne
kuulu bàdì—bàdì bàteeta kwitaba kalolo kàà Mukalenge Yesù.
Bible umweumwe udi utwàmbila ne bintu ebi nebyenzekè,
wàkabìfikisha ku dikùmbana ànu menemene mùshindù
wàkabìlayàYe awu. “Mpindyewu, mulayi,” mwàkambà Peetèlò,
“ùdi bwènu ne bwà bàna bèènu balela ne bwà aba bàdì kule,
mu búngì bwònsò bwàbìikila Mukalenge Nzambì wetù abu.”

³⁰⁷ Wèwè uwu mwimane kuulu bwalu udi muswè dibènesha
dyà Nzambì pambidi pèèbè. Nèku bu musadidi Wendè, ndi
nkusambidila, nensambile bwà Nzambì àkupèèshe dibatiiza dyà
Nyumà Mwímpè. Nèku ndi ndikonka ní udiku mwà kwenza
cyòci eci mu mwoyi wèbè, pawikalà ne meeji matòòke, bu wèwè
mwà kwenza mulayi ewu kùdi Nzambì ne: “Nzambì, mmèmè
ewu, kubangila ànu ku cikondo eci, mwimàne kuulu, nkèba
dibatiiza dyà Nyumà Mwímpè edi, nensambile ku musangu ne
ku musangu nengìndile too ne paWàngúja ne Nyumà Mwímpè.”
Udikù mwà kwenzela Nzambì mulayi awu mu dyela dyà byanza
byèbè muulu anyi? “Nènsambilè ku musangu ne ku musangu,
dìbà dyònsò, too ne paWàngúja ne kalolo ne bwímpè bwà
Nyumà.”

Ndi nkulàmbula disambila dyànyì mpindyewu patùdi twinyika mitù yètù apa:

³⁰⁸ Taatù wetù wa mu Dyulu, bôbò ki bitàdi byà bucimunyi byà Bwikadi Bwèbè. Mbamanyè ne Mèyi aa mmalelèlè bwalu Ngèèbè. Mbamanyè ne mmafidiibwe kùdi Nyumà Mwímpè, bwalu wôwò ki Dìyi dyà Nzambì. Nènku mbatwishiiibwe ne bàdi Neebè dijinga, bwà ne bàdi dijinga ne kalolo kàà Nyumà Mwímpè mu nsòmbelu wabò bwà kubàpèèsha bukolè bwà bucimunyi. “Nènku nebàpetè bukolè bwà ku Dyulu,” bapeta bukolè bwà kwikala ne nsòmbelu wa bwena Kilistò, bwà kupeta bukolè bwà kucimuna mateeciibwa. Bu musambu utùvwà tufùma ku dimba ne: “Bààkasangila mu nzùbu wa kuulu ne bàvwà basambila mu Dìnà Dyèndè, bààkabàtijiibwa ne Nyumà Mwímpè ne bukolè bwà mudimu kulwabù.” Ki cidìbo baswè, bukolè bwà mudimu bwà kulwabù pambidi pààbò.

³⁰⁹ Ndi nKulòmba, Taatù, bu musadidi Webè, bu Mùdi mubàmòne beele byanza kuulu, mbacipe cyèlekà Kùdi ne benze mulayi ne kabàakulekela to, kabàakucilekela ku luseke to, kàdi nebàsambile too ne muWàbùja, Mukalenge, ne citùpà cidì cisankisha cyà Bwikadi Bwèbè bwà Cijila mu nsòmbelu wabò. Nyèwù nsambila bwàbò, Mukalenge, bu musadidi Webè, bwà bààmòna mwà kùjiibwa ne Nyumà Mwímpè. Mukalenge, ndi ndòmba bwà kabùumuku mu èkèleeziyà emu aci kaciyi cyanji kwenzeka to, bwà ne nebiikalè ànu kaaba aka too ne pàdi musùukà wònsò mùjiibwe tètè ne Nyumà Mwímpè. Enzàku nàнку, Mukalenge.

³¹⁰ Wèwè udi Nzambì, wa Bukolè bwònsò, Wèwè wàkamwèneshiiibwa mu mubidi bwà kuumusha mpèkaatù yà bàà pa buloba. Wakabiika ku lufù mu ditùkù diisátù, kubanda mu Dyulu. Ne Wèwè udi kaaba aka dilòlò edi, munkaci mwètù, ne mu dìnà dyà Nyumà Mwímpè. Nènku tudi tulòmba, Taatù, bwà Wèwè, Mukalenge wetù wa mushinga mukolè awu, újakù yònsò wa kùdìbo ne Wèwè Mwinè Sungasunga. Nènku swàkù bwà biikale di—dibènesha bwà Bukalenge Bwèbè ne mu buloba buciilwalwà. Nènku dìngà ditùkù paWàfika ndekeelu wa byònsò ku ndekeelu wa njila, cidì mwà kwikala leelù ewu kàbìdi, katwèna bamanyè dībà diikalaci to. Kàdi swàkù bwà ngiikaleku mukumbàne, Mukalenge; ngiikale mubadiibwe munkaci mwà aba bàyaaya mu Dyambwibwa. Swàkù bwà aba biikale bàdi bàya mu Dyambwibwa. Swàkù bwà muntu yònsò, Bwikadi bwà Bunzambì ne aba bònsò bàdi bùjiibwe ne Nyumà, bàdi bàà Nzambì, bàye mu Dyambwibwa.

³¹¹ Bwejaku aba dilòlò edi, Taatù. Bàdi Bèèbè mpindyewu, ndi mbàlàmbula Kùdi. Mu Dìnà dyà Yesù Kilistò. Amen.

³¹² Mpindyewu ndi muswè bwà bwònsò bàà kunùdi bàdi biimane pawipi ne bantu aba, bàdi ne Nyumà Mwímpè, juukilaayi kuulu, nubàtentèkele byanza.

. . . Mpokolo mûle tètè ne Mashi,
 Makoka mu mijilu yà Emanùwèlè,
 Ne bangènzàmpèkààtù biinyija mwinshi mwà
 lukòkà alu,
 Bàdi bàjimija dikeji dyàbò dyònsò dyà dipiilà.
 Bàdi bàjimija dikeji dyàbò dyònsò dyà dipiilà,
 Bàdi bàjimija dikeji dyàbò dyònsò dyà dipiilà;
 Ne bangènzàmpèkààtù biinyija mwinshi mwà
 lukòkà alu,
 Bàdi bàjimija dikeji dyàbò dyònsò dyà dipiilà.
 Mwívi uvwa upùnga ne lufù wàkasànka bwà
 kumòna
 Mpokolo awu mu ditùkù dyèndè;
 Ne mwómò amu ndi mwà, nànsha mûndi mubi
 bu yéyè emu,
 Kukùpula mpèkaatù yàànyì yònsò.
 Kukùpula mpèkaatù yàànyì yònsò,
 Kukùpula mpèkaatù yàànyì yònsò;
 Ne bangènzàmpèkààtù biinyija mwinshi mwà
 lukòkà alu,
 Bàdi bàjimija mpèkaatù yàànyì yònsò.

³¹³ Mpindyewu elàayi byanza byènu muulu kùdi Nzambì ne
 nuMupèèshè ànu butùmbi cyanààna. Ambàayi ne: “Twasàkidila,
 Mukalenge. Ndi mwimanyine kuulu, nènKupèèshe butùmbi.
 NènKusàkidila bwà mabènesha Èbè, bwà bwímpè Bwèbè, ne
 bwà kumpèèsha dibàtiiza dyà Nyumà Mwímpè.” Twasàkidila,
 Mukalenge! Twasàkidila, Mukalenge! Ndi nKusàkidila, Nzambì
 munanga, bwà ditupèèsha. . . Wèwè udi ulama mulayi Wèbè,
 Wèwè ngwàkambà nànkù. Tudi tuKwitabuuja.

³¹⁴ Kanwènaayikù ne disànkà anyi? Ambàayi ne: “Mukalenge
 àtumbè!” Teddy, ndekèlèku. . . ànu mukwàbò kàbìdi ne: “Tudi
 tusangana bantu bàabùngì bàdi kabàyi mwà kuumvwa. . .” *Eci
 Ncyenze Bu Dyulu Bwànyì Mémè.*

Tudi tusangana bantu bàabùngì bàdi kabàyi
 mwà kuumvwa to
 Bwà cinyi tudi ne disànkà dyàbùngì ne
 badìshikàmìne;
 Tudi basabukè dyàmwàmwà dyà Yadèna bayè
 ku Buloba bulenga bwà Kanààna,
 Ne eci cìdi bu Dyulu bwànyì mémè.
 Kaa, eci ncyenze bu Dyulu bwànyì mémè,
 Kaa, eci ncyenze bu Dyulu bwànyì mémè;
 Kaa, tudi basabukè dyàmwàmwà dyà Yadèna
 bayè ku Buloba bulenga bwà Kanaana,
 Ne eci ncyenze bu Dyulu bwànyì mémè.
 Kaa, pàndì nsànka, ndi ngìmba ne ngèèla
 mbila,

Dyabùlù kèna ùCìitabuuja to, ndi mmòna;
 Kàdi ndi mùjìbwe tètè ne Nyumà, kakwèna
 mpatà to,
 Nènku ki lutàtu lùndi naalù mèmè alu.
 Kaa, aci's ki cidi...Dyulu bwànyì mèmè,
 (Nzambì àtumbè!)
 Kaa, eci ncyenze bu Dyulu bwànyì mèmè;
 Ndi musabùke dyàmwàmwà dyà Yadènà bayè
 ku Buloba bulenga bwà Kanaànà,
 Ne eci ncyenze bu Dyulu bwànyì mèmè.

³¹⁵ Kabyèna binwenza disànkà anyì? Bìmpè. Labùlàngànaayi ku cyanza ne muntu kampànda, nwamba ne: "Mukalenge àtumbè!" Eci cidi bu Dyulu, Mukalenge.

Angata Dìna dyà Yesù wëndè naaDì,
 Wèwè mwànà wa tunyinganyinga ne dikènga;
 Nedìkupè disànkà ne busàmbi,
 Nda naaDì kwònsò kùyaaya.


Dìna dyà mushinga, Éyì dyà bupolè be!
 Dìtèkemena dyà buloba ne disànkà dyà Dyulu;
 Dìna dyà mushinga, Éyì dyà bupolè be!
 Dìtèkemena dyà buloba ne disànkà dyà Dyulu.

Twinamina Dìna dyà Yesù,
 Tupòna mikookwela ku makàsà Èndè,
 Mfùmù wa bamfùmù mu Dyulu netùMwasè
 cifulu cyà butùmbi,
 Pààjika lwendu lwètù.

Dìna dyà mushinga, Éyì dyà bupolè be!
 Dìtèkemena dyà buloba ne disànkà dyà Dyulu;
 Dìna dyà mushinga, Éyì dyà bupolè be! (Dyà
 bupolè be!)
 Dìtèkemena dyà buloba ne disànkà dyà Dyulu.

Mpindyewu, mu cimùmà, ne mitù yètù miinyika:

. . . Dìna dyà Yesù kashidi,
 Bu Ngabu ku butèyi bwònsò;
 Pàdì mateeciibwa akunyangulukila,
 Nungàna ànu Dìna dyà Cijila adi mu
 disambila.

Dìna dyà mushinga, Éyì dyà bupolè be! 

60-1211E Cikondo Cyà Èkèleeziyà Wa Laòdikiyà
Branham Tabernacle
Jeffersonville, Indiana États-Unis

CILUBA

©2024 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Dîyì dya bwena-cintu

Makenji ònsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiyi bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyì wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org